

4
V
24

1
2
3
4

14-25. A. 14.

1845. Oct. 7. 2
C. W. C. C. C. C.
M. C. C. C. C.
C. C. C. C. C.

1845. Oct. 7. 2
C. W. C. C. C. C.
M. C. C. C. C.
C. C. C. C. C.

1845. Oct. 7. 2
C. W. C. C. C. C.
M. C. C. C. C.
C. C. C. C. C.



1
IACOBI SA
doleti de laudibus
Philosophiæ

Libri duo.



VIRTUTE DVCE.



COMITE FORTVNA.



LVGDVNI APVD SEB.
GRYPHIVM,
1548.

Capaccinovum + Roma

12 24 F. 25

NICOLAUS BORBONIVS
VANDOPERANVS AD IACO-
BVM SADOLETVM
- VIRVM ELOQVEN-
TISSIMVM.

*Quum studium Sophiae, quid sit, quid nō sit agendum,
Monstret, ut ad ueras perueniamus opes:
Hoc totis quur non omnes amplectimur ulnis?
Quur, quæ uulgus amat, malumus illa sequi?
At iam tandem utinam resipiscant secula nostra,
Iudiciūq; probent, ó SADOLETE, túum.
Esse magis brutos homines ego iudico brutis,
Quos tua non fando flexerit alma Charis.*

IDEM BORBONIVS
AD LECTOREM.

Ἦνδ' ἀγνοοῦσέ τις τὸ πῶς ἐγκώμιον
φιλοσοφίας, μᾶλλον δὲ ἔσθλον πνύον,
τὸ ἐχράττει σοὶ ὁ κίων Σαδύληος μέγας,
Ἄνθρ' ὁ θεῖος, ὁ τεχνίτης ἐφαίρει.

IACOBI SADO-

LETI AD MARIVM MAFFEVM

Volaterranum de Philosophia liber

primus, qui inscribitur

PHAEDRVS,



In quo accusatio Philosophiæ
continetur,



MNIS, MARI
Volaterranæ, quæ
ad bene beatęq; ui-
uendum pertinet do-
ctrinæ institutio, du-
cta primū mihi qui-
dem à Philosophiæ
pręceptis uidetur es-
se: atq; ab eius facul-
tate disciplinæ, quæ
in cōtemplatione re-

rum naturalium, & moribus ad uirtutem fingēdis,
constituendisq; cernitur. Pōst autem his literis, quę
quemadmodum sunt, sic etiam uocantur sacrę: in
quibus uera Dei percipitur cognitio, cū aucta &
corroborata, tum ad extremum ex uarijs fluctibus

a 2 iactatio

iacitationibusq; uitæ, quas nostra imbecillitas fert, ad stabilem certamq; spem immortalitatis conuersa, atq; translata. Ac nos, qui (ut tu ipse optimus testis es) harum artiũ utranq; adamauimus semper, & nunc quidem iam in alteram hanc, quæ nostræ & personæ propria est, & religionis, tanquã in portum uela deflectere, & pleno cursu contendere cogitamus: adhuc tamẽ in Philosophia magis exercitati, quòd in illa plurimum operæ, & quantum ab occupationibus publicis, quæ nos diu & multũ distictos tenuerunt, disiungi licuit, antè actæ ætatis consumpsimus: duximus non alienum nec nostra dignitate, nec eorum, quos ad uirtutis studium atque amorem genuit ipsa natura, utilitate, nos facturos, si quæ de hominibus doctissimis, Græcis præsertim, quorum in hac laude sine ulla dubitatione excellit industria, accepta à nobis fuissent, ea Latino sermone conscriberemus: primumq; gratia hac debita ea quidem & merita Philosophiæ reddita, toto deinde pectore, ut dicitur, maturescẽtib; etiam annis ad illam cœlestem scientiã incumberemus. Atq; hoc ita agere id studiosius etiam sumus meditati, quòd in hoc tempus Latinis quidem literis desiderari uidetur Philosophia: nō quin & apud ueteres, & nostra etiam, ac patrum auorumq; memoria extiterint docti uiri, qui eam uelut incertis sedibus peregrinantem & uagam, & maxime quidem posteaq; eiecta è Græcia est, in hanc urbem adsciscere & potuerint,

tuerint, & partim etiam conati sint : sed ita ferente casu quodam bonis artibus infesto, & qui uoluerunt uarijs plerunque rationibus impediti, in medio spatio restiterunt: & qui potuerunt non ferè sunt ad eam uoluntatem adducti. Ita illa necessario penes barbaros morata, tanquam iuris nostri morisq; experts, caruit honore & nomine ciuitatis. Ac ut illū omnis doctrinæ & eloquentiæ parentem potissimum nominemus, Marcus Tullius Cicero etiam professus fuit hoc se populo exhibiturum, ut Græcè tum loquentem Philosophiam ad Latinam sermonis consuetudinem adduceret: quem ego unum maximè statuo incredibili quadā magnitudine ingenij, quæ & omnes longè uicit superiores, & posteris spem penè sui imitandi ademit, cumulatè quod susceperat præstare potuisse: Verum siue infinitis nouæ Academicæ (sic enim appellabatur orta ab Archesila, à Carneade confirmata disciplinæ ratio) disputationibus impeditus, quarum illa contra omnia dicēdo nunquam terminauit modum: siue quòd propinquo & celeri cum suo, tum Reip. fato, illius per uim nefariam fuit interrupta industria, minus aliquanto nobis præbuit, quàm aut optaremus, aut ab illa diuina mente potuit expectari. Morale partē Philosophiæ psecutus est, eamq; carptim separatis quaestionibus: in physicis quidē nihil attigit: nec uerò de ea parte, quæ ad differendū tota est, literā omnino fecit ullam. Quòd si ille tum hoc conatus est, in quo illi

nō animus aut ingeniū , sed ex parte quadā fortuna defuit, ut Philosophiā è lingua nobili, & in primis memorata transferret in Latīū, aliquantūq; ei splendoris & dignitatis se adiūcturū à Romana facundia existimaret: quid nos tandem, & nobiscum unā cæteros omneis, qbus cordi Philosophia est, agere conuenit: aut quanto elaborare studio, ut tendentē nobis ultro manus , fidemq; & opem nostram implorantem, pro sua parte & facultate quisq; à barbarorū inscitia & moribus in Latinitatem uindiceremus: Etenim quid est quod æquo minus queat animo ferre quisquam institutus liberaliter , quā caput artium optimarum, ornatricem uniuersæ uitæ Philosophiam possideri ab ijs , qui ut acutē forsitan aliquando moueri uideantur ad discerendum de ea, inaniter tamen & id agunt, & orationem afferunt ineptam, & horridam, turbantem cogitata tū deblatterantium ipsorum, tum eorum qui audiunt: nihil ut ex ea proprium, nihil ut dilucidè significās percipi possit: Ex quo factum est, nō ut in exquirenda ueritate, quod est unū munus Philosophiæ maxime proprium, sed ut in uerborū, & inanium questionum inutilibus cōtrouersijs omnis iam pridem ab his suscipiatur cōtentio. Sed ut in ueteri prouerbio est, Balbi balbos , sic istos sui & agnoscunt, & probant. At nos, quibus expetenda illa semper, & præcipuè colenda uisā est , quæ sapientiæ cum eloquentia naturalis est societas, quicq; mentis simulachrum

chrum ducimus orationē, ut ex huius forma & pulchritudine, illa quoq; quæ intus est spectari animi dignitas & elucescere foris possit: demus operam, si modò assequi possumus, ut Philosophiam iam pridem laborantem barbariæ nomine Latinis literis illustremus. Quod profectò adnitemur, eo ingressi animo, ut nisi uitam uis aliqua peremerit, aut auctoritas maior occupauerit, omnem ipsam Platoniciā, & Aristotelicam formam disciplinæ nō interpretis munere, sed ordine & iudicio nostro nostris hominibus tradere parati simus. Quod maiore etiam cū spe, lætitiāq; aggredimur, quòd intelligimus non solum in Italia, quæ semper omnium bonarum artium parens iure existimata est: uerùm etiam trans Alpes in Gallijs, Germanijsq; quàm multi iam existant, qui se ad politiores dedant literas: quicq; hæc ipsa, quæ nos reprehendimus, minimè probanda putent: etiam insectentur eorum infantiam, qui audiant præclaras è Philosophia sententias, sermonis ruditate tanquā cœno aliquo inquinare. Qui quidem tali ingenio præditi, barbari certe non sunt. Non enim quos à nobis aut montiū excelsitas, aut latitudo æquorū disiunxit, sed quæ cum uerè religionis cultu non peragrauit humanitas, & artium amor ingenuarū, ea certa & sola est barbaria. Atqui horum ope atq; auxilio, aliorumq; multorū, quos similiter ad iudicandum, agendumq; idoneos ingenij dotibus natura ipsa subornauit, si plures in hanc præclaram

præclaram uoluntatem consenserint, haud diffiden-
dum sane est, quin celeriter è sordibus omnibus se
emersura Philosophia, & dignitatem ad quam spe-
ctat, obtentura esse uideatur. Quibus cum aut nos-
tra communicabitur laus : aut si prior nostra fors
in hoc certamen exierit, non dubium est futuros,
qui eandem petessant gloriam: à quibus non certari
modò nobiscum, sed uinci etiam nos æquo pati ani-
mo sumus parati. Quippe qui non tam singularem
nostram laudem, gratiamq; deposcimus (etsi ne ea
quidem, cum bonorum consensu recte factis tribui-
tur, à præstantibus animis repudianda est) quàm be-
ne de ciuibus nostris promereri studemus. Quòd si
in eis actionibus, quas huius optimi ac maximi
principis beneficio cum aliqua autoritate tractau-
mus, innocentiam & fidem probauimus nostram, nos-
traq; foris acta consiliaq; omnia non ad priuatos
quæstus, sed ad beneuolentiam hominum nobis o-
mnibus officijs conciliandam, & ad communem bo-
norum utilitatem spectauerunt : erit hæc iam intra
domesticos parietes cum cura præstantior, tum la-
bor etiam multis utilior, si qui nostris hortationi-
bus uel excitati, uel firmati, nihil sibi magis expeten-
dum in uita, quàm uirtutem & abstinentiam, & stu-
dium ueræ sapientiæ duxerint. Sed quoniam ante-
quàm è Philosophia quicquā, de ipsa Philosophia
aliquid est dicendum : eiq; iusta & debita laus tri-
buenda, sine qua nihil quicquam uerè esse laudatū
potest

potest: cùm præsertim non desint qui petulanter in eam quacunq; de causa, etiam hoc studiosius inuehantur, quòd se putent ea re gratiam à uulgo & ab imperitis hominibus inituros: uisum fuit faciundū, ut eam ederemus eius defensionem, quam habuimus Mari, nos quidem aliquot ab hinc annis in Iacobi Galli suburbano, cùm à T. Phædro affine tuo, homine (ut meminisse faciliè possumus) cùm docto & copioso, tum parato ad lacessendum, respondendumq;, esset uituperata. Nam cùm Floralibus manè ad Gallum in hortos, quos ille uir, ut tute scis, in omni uita politissimus, in campo sceniculario secūdum Adriani molem sibi ferè communes, & doctis omnibus parauerat, conuenissemus ego & F. Citrarius, homo cùm studiorū similitudine mecum, tum multis amicitiae officijs coniunctus; offendimus ibidem, qui paulò nos anteuenerat, cum ipso Gallo fermocinantē T. Phædrum. Igitur congressi amicè & comiter, salute data acceptaq;, in hyppodromo (id erat decumano limitis nomen) manus complexi inter nos, ut mos amicorum est, inambulare cœpimus. Tum GALLVS: Quid nam hoc esse dicam, inquit, nobis à natura datum, ut tantum boni in eorum, quos familiariter diligimus, congressu & colloquijs experiamur esse, ut sine ijs nullam integram uoluptatem ad animum nobis accedere sentiamus? uelut mihi nunc accidit, qui etsi hoc loco uehementer delector, quòd & amœnus satis est, & solent uni

b cuique

cuique sua, in quibus quis elaborauit, ualde iucunda existere: tum autem hac hodierni diei tranquillitate aëris & nitore coeli exhilarari animos necesse est: nec solum nostros, sed cæterarum etiam animantium. Siquidem, ut à Vergilio scriptum est, Vertuntur species animorū, & pectora motus. Nunc alios, alios dum nubila uentus agebat, Concipiunt: unde etiam uolucrum cantus, & lætitiā pecudum, & insolitam quandam in animis dulcedinem ait exoriri. Requirebam animo tamen nescio quid: neque tam animaduvertebā primò quid illud esset, quod mihi abesse quasi uideretur, quàm posteaquàm uos aduenistis: sentio nunc demum meam expletam, cumulatamque esse lætitiā: ita ad societatem illam ad quam à natura facti sumus, qua homini ad hominem naturalis est applicatio, accedit ista ex delectu amicitiae incredibilis quædam iucunditas: quam qui non norunt, ij mihi uidentur ex alieno quodam genere homines esse, non tam mente præditi, quàm forma humana. TVM PHAEDRVS: Recte sanè loqueris Galle: repugnat enim hoc naturæ, ut qui sint, quos tantum in rebus humanis bonū non afficiat: & tamen experimur interdum nonnullos, qui ita aut animo sunt agrestes, aut moribus ad omnem inhumanitatem alluefacti, ut non modò neminē eximiè charum habeāt, sed æquè oderint omnes, tanquam communes cunctorum inimici: Sicut de Timone illo Græcæ loquuntur historiæ: quem etiam ferunt,

cūm

cùm haberet secum in ccena similem sui prorsus, & inhospitalitate (non enim mihi nunc succurrit, quo alio nomine appellem *μυσανθρονία*) & moribus Ape-
mantum: atq; ille ea solitudine delectatus, dixisset, Pulchrum hercule nostrum hoc conuiuium, ò Ti-
mon: respondisse, Atqui pulchrius multo futurum erat, si tu non adesses. Tales ergo nonnulli, sed con-
tra naturā tamen: atq; ut hoc fortasse rarius, sic uti-
nam non multa quotidie in nobis ab eadem natura optimè inchoata, consuetudinis uitio deprauaren-
tur. Sed de se, ut uolet quisq;: nos, qui liberaliter su-
mus eruditi, de nobis ipsis ita sentiamus, ut uitam sine conuictu & consuetudinibus amicorū nullam ducamus esse. Atqui Galle, inquit C I T R A R I V S, quantum tu bonorum amicitia, omniq; humanitas tribuendum statuas, res ipsa palàm facit, neq; indi-
get id nostra ullius oratione: nemo est enim qui non oculis cernat, quanti sint ad te hominum, aliqua in-
genij laude splendentium, concursus fieri soliti: atq; ut ornatissimorum hospitem & amicorum quoti-
dianis conuentibus floreat domus tua. Quod pro-
fectò haud ita foret, nisi tu, si quisquā alius unquā, honestissimorum, optimorumq; amicitia, ac fami-
liaritatibus delectarere. Verùm quod est modò à Phædro nostro dictum, rarius usu hoc uenire, ut quis amicitia dulcedine non tangatur: utinam id quidem ita esset, atq; ea una esset in causa, quæ ab eo exemplo etiam Timonis commemorata est, naturæ

quædam quasi feritas : sed latius patet hoc malum, & quod maximum uenenum fidelis beneuolentiæ est, simul ut quis nimium sibi deseruit, ita minimè fidem in amicitia tuetur. At huiuscemodi hominum innumerabilis est multitudo. Quis enim est studiosus pecuniæ præsertim, & cui (ut Terentianis uerbis utar) nihil præter lucrum dulce sit, qui ullum uel tenuem possit habere gustum huius ex amicitia iucunditatis, quam tu modo Galle narrabas: quicquid sublata utilitate, quæ contineat necessitudinē, non continuo nuncium remittat amicitiae. Plena horum uita est, rarumque illud potius, ut cui cognita appetitaque sit simplex illa, & uera, & per se, suaque sponte amabilis ex amicitia uoluptas, quæ ab amico proficiscitur, & in eo ipso uertitur, nihil quærens extrâ, nec cupiens, cuius amor fructus maximus, uirtus optima conciliatrix est. Sed quò rarius istud, hoc præstantius. In quo genere, optimo te excellere iure, Galle, fecisti tu quidem omnibus iam fidem. Nam, ut ille, quicumque hostem feriet, is mihi fuerit ciuis: sic tu amicos ex una uirtutis commendatione continuo probas: non ex eis ad te uti referas aliquid, sed ut sibi illi nihil magis promptum esse intelligant, quàm te, domumque tuam, operam, gratiam, pecuniam, autoritatem: quæ cunctis etiam hoc gratiora ex te accidunt, quòd tua ista incredibili humanitate condiuntur: quam tibi in uerbis quidē & uultu, omniūque corporis motu insculpsit ipsa natura.

natura. Sed ea factis, & in experiundo fit illustrior. Itaq; es affectus, ut non magis unum unus, quàm te diligāt uniuersi. Quam ob rem, quod paulò antè dixisti, nullā te integram sine congressu amicorum percipere uoluptatem, & de eo tibi assentior: & (ut pro cæteris etiam loquar) experimur idem in nobis omnes erga te aliquanto etiam uberius. Sumus enim hac tua fruenda humanitate, hoc ingenio, his optimis & suauissimis moribus, in mutua nostra beneuolentia propemodū beati. T V M G A L L V S: Gaudeo sane Citrari, inquit, præclaro hoc, quod mihi tribuisti, uel iudicij tui, uel, ut ego potius interpretor, amoris testimonio. Atqui, inquit P H A E D R V S, Galle, utrūq; est, & iudicium, & amor. Sed quādo de amicitia aliquid omnes, quid Sadoletus? E T E G O: Quid inquam Phædre? nisi me uehemēter hoc uestro sermone esse delectatū: ac sentire quid dē uobiscū unā, nihil esse in uita præstabilius amicitia: quæq; in Gallo nostro laudibus extulit Citrarius, uerissima confiteri. Sed quod unum uel præcipuum ab eo uideo prætermisum, id à me referri, & cōmemorari debere puto: non enim natura solūm, & propensione animi quadam, aut fortuito euentu lapsus in hanc rationem Gallus, ad liberalitatem, & beneficentiam, ueritatemq; amicitiae totum se contulit: sed aliquāto magis accepit à Philosophia, ut ista eadem recto iudicio & cōstanter ageret, in quo quidē uno est posita uirtus. Nouit enim quēadmodū

citur: indignum illud quoque quod uirtutem in una statuunt Philosophia: Quo quid dici impudentius potest? quando enim Philosophiæ quicquam omnino fuit cum uirtute, cum amplitudine, cum dignitate commercij? aut quos ex eius ipsius sinu prodire conspiciamus ad ullam rem gerendam aptos, quæ quidem digna sit uiro? Immo uerò tu, inquit, esto nobis Galle & naturali uirtute, & tuo ipsius consilio institutoque talis, qualē te esse cernimus omnibus eis animi dotibus instructum, quæ magno homini conueniunt: Sitque tua ista propria, & peculiaris laus, non Philosophiæ, quā summus ille uir tuus nouus hospes & amicus P. Bēbus, cuius tanta fertur apud omnes uirtutis & literarum gloria, iure sanē in te contulisse mihi uisus est, cum ita diceret, urbem hanc tot antiquorum monumentis, tanta etiam nunc horum temporum magnificentia ornatam: sibi tamen maiorem atque ornatiorem fuisse uisam, quod te in ea ciuem esse cōtigisset. Hoc de te ille ita ut sentiret, non tu, opinor, promissa barba es affecutus, nec tunica pulla, nec trito pallio, nec inepta, & intempestiua loquacitate, sermonibus per omnes circulos cōferendis: longē enim hæc aliena graui uiro, Philosophis uerò quotidiana sunt: sed liberalitate, & prudentia, & quod cum te multi fortuna & copiis in hac urbe antecedant, nemo est tamē, qui ad bene de probis & doctis hominibus merendum te uno sit propensior: Nam quod ad Sadoletum attinet, quem ego
& amo

& amo mediusfidius, & florentem esse cupio, non possum non molestia affici, cum illum uideo subducentem se amicorum & familiarium coctibus, in hac squalente & sordida Philosophia tabernaculum penè uitæ suæ collocasse, doleoq; meā tam parui apud eum fuisse auctoritatem, ut ipsum ab hoc errore nequiuerim adhuc ad cōsilia grauiora retrahere. Atq; ad me conuersus, In mentem uenit mihi, inquit, ea proferre aduersus te, quæ in Euripide Zethus ad Amphionem fratrem protulit, quorum equidem sententiam, nō numerum recordor: Negligis ò frater, inquit, ea quæ te oportet diligere, naturāq; animi tui suapte sponte nobilem, puerili quadam concinnas forma: & neq; in iudicijs commodè loqui studium tibi est, inq; ijs cernere quod æquum idoneumq; sit: neq; alios iuuare consilio potes tuo. Ac de tuo quidem, inquit, ingenio quid sentiam, mihi ipse conscius sum: quantū autem te diligam, tu optimus es testis. Sed quod tibi soli seorsum sæpe dixi, in quo frustra à me consumpta opera est, idem nūc his audientibus ut dicam, moneamq; te aliquot annis minorem natu audacter, idem amor me cogit. Vereor enim, uel potius formido certò, ne istā tuā ingenij animiq; indolē, qua te ad grauiiores res tractādas idoneum semper iudicaui, hoc Philosophiæ studio penitus corrūpas: in quo si esset ipso aliqua fortasse liberalis oblectatio: quæ tamen in tanta uacuitate illius scientiæ esse quī potest: tibi tamen uidendum

dum arbitrarer in ciuitate tam occupata, in qua honores & præmia non otiosis, sed industrijs hominibus proponuntur, quî factum tuum probari illis posset, qui scirent de uita cuiusq; & institutis iudicare. Inquiritur enim in uitam tuam, mihi crede, curiosius quàm tu fortasse existimes: Nam cum à primo commosces animos multor; expectatione quadam, nunc te uelut inertia defedis, non possunt nō mirari homines, idq; non reprehendere: cum in popularibus studijs, & his quæ frequentia ac celebratis sunt, siue in foro malis, siue ad principes uiros, uindicare te in aliquam laudem possis: illa tamen, quæ silentij, & solitudinis sunt, malle persequi. Quorum profectò opinioni & iudicijs inferuias oportet, si aliquo numero esse optas, aut si eam uerè assequi uis, quam tibi falso promittit Philosophia, sapientiam: ne'ue te in tenebris abdas, cum facili in hominum oculis queas, & in luce consistere. Quæ cum ille dixisset aliquanto commotius, quod eum ad hanc rationem concitationemq; dicendi & uoce, & motu corporis, & animo flagrante ac subito natura formauerat, summumq; illi præterea ingenium, summum in pronūciando lepōrem addiderat. C I T R A R I V S, O' amcenum diem hunc, inquit, & mihi diu, ac Gallo desideratam opportunitatē, aliquando te Phædre in uniuersam inuehentem Philosophiam audiendi: Equidem interfui sæpe, idq; locis pluribus, cum carperes Philosophiam; in quo

ego potissimum attendere solitus sum acumen ingenij tui, & facetissimis dictis delectari. Sed de ea tota quid haberes dicere, percontandi ex te, cum id maxime auerem, ante hunc diem facultas non est data: quam nunc oblatam libentissimis nobis, nostra fuerit culpa, si amiserimus: aut si non ex te omnia, quæ uolumus de tuo in Philosophiam animo ac iudicio, audiendo fuerimus consecuti. Imò, inquit GALLVS, & hic locus maxime aptus est, & tempus idoneum: nec est quicquam, in quo iucundius hunc consumamus diem: quam ob rem da hoc nobis Phædre, ut te de uniuerſa Philosophia quid sentias audiamus. AVDIETIS, inquit: sed hac conditione, si omnibus sum facturus gratum. HIC EGO ar ridens, Mihi ne, inquam, esse gratum potest, in tantum discrimen uenire Philosophiam? Quid ita, inquit CITRARIVS, non tu eam dicere es solitus ueritatis patrocinio sat tutam esse? SI QUIDEM, inquam, ueritate, non eloquentia causa pendetur. Pendetur, inquit GALLVS, & bono es animo: non enim hic imperitæ multitudinis concio, ad quam in inuidiam facile, & in suspicionem Philosophia adducitur: Sed auium concentus, & florum tanta hæc uarietas ac copia, huius orationi coronam factura est. AT QVI, inquam, Galle, huius orationi (siquidem ea in uituperanda Philosophia futura est) auium iste concentus obstrepat sanè uelim. An non tu hosce flores, qui tantam nunc odorum

rum amoenitatem naribus nostris aspirant, & mox auritos, & postea etiam uocaliores fore putas, quàm esse posset ipsa illa, de qua nunc dicebas imperitæ multitudinis concio? S A N E, inquit, hoc est quod ego gaudeo: intelligo enim præter uoluptatem, quam audiendo percepturus sum, huius mei præterea suburbanæ pretio permultum accessurum esse, quod quidem disputatione uestra hac celebratius multo futurum est, quàm aut peregrinis arboribus, quæ in hunc ipsum locum undique accersitæ sunt: aut nobilitate eius picturæ, qua est superior porticus exornata. Q V I N tu, inquit Phædrus me inueniens, ueritatem finito uenire in certamen, tumet silentium teneto. A G E A G E, inquam, Phædre (uideo enim te in procinctu esse, pugnae auidum) illud moneo, parcius: ne si uno hoc prælio penitus Philosophiam obtriueris, non habeas deinde quicquā, in quod ita studiosè, & libenter inuehare. N V L L V M est periculū de fore, inquit ridens, dum quidem tu extiteris, qui ab ea auelli nulla ratione posses. Quod cum dixisset, omnes ad audiendum animos ereximus. T V M I L L E, Videntur mihi, inquit, Prisci illi ueteres, qui primi semetipsos sapientes, & artem eam, quam profitebantur, sapientiam appellauerunt, aut callido consilio quæsisse in uulgus celebritatem: aut errore quodam puerili decepti fuisse. Etenim si cum scirent, & intelligerent ipsi, inanem eam esse, quam habebant in manibus, sciens

tiam;

tiam : appellatione tamen præclara illam adducere in honorem studuerunt , cæterisq; persuadere id, quod ipsis neutiquam de ea erat persuasum. Astuta illorum ratio , & callidum in primis consilium fuit: sed ita, ut seculi illius ingenijs nihil iudicarent esse rudius. Sin autem & eandem ipsi fidem habuerunt de sapientiæ disciplina, & cæteris facere conati sunt, puerorum mihi morem videntur fuisse imitati : ut enim pueri imagunculas sæpe nacti ligneolas, aut è cera : easq; charius amplexi, ueste atque auro exornant, Deorumq; quorum libitum fuerit, imponunt eis nomina : demumq; longius prouecti credulitate puerili, quasi rem seriam agentes, rei ludicræ diuino nos honores tribuunt: Sic Philosophi isti uestri (me autem intuebatur loquens) quos solos penes est sapientia, quicq; eam ipsam ab sese unis peti atque ad disci uolunt, tantò pueris leuiore, quantò illis ætas ludum suum concedit, his alienum stultitia : inane disciplinæ simulachrum splendidissimi nominis appellatione honestauerunt: Quo non possunt quidem non allici aliquando & inuitari nonnulli, ut insistant aliquantum, cupiantq; interiora cognoscere. Quòd enim sapientia nec in cælo, nec in terra quicquā est præstantius, iccirco ipso nomine commoti, accenduntur ad cupiditatem aliquam cognoscendi. Sed si qui lautiore paulò ingenio ingressi fuerint, maturè ut abalienentur. Ex quo illud Neoptolemi apud Ennium, Philosophandum sibi esse, sed paucis: nam omnino,

omnino, haud placere. Credo homini militari ex bellica uirtute ueriores meditati gloriā, conueniēs fuisse uisum, quid isti profiterentur, agnoscere: quæ uerò minutius superstitiosiusq; tractarent, & in quibus frustra contererēt ætatem, ea ceu uerę sapientiæ repugnantia penitus despiciere atq; contemnere. Et nimirum magna, eximiaq; professi, in minimis ferè uersantur. Quòd si splendore nominis remoto, rem ipsam introrsum magis aspexeris: totamq; istā artē, quæ se magistram tradendæ sapientiæ profitetur, in manus sumptam diligenter expenderis: nō tu in ea quidem sapientiam ullam, quæ sit uerè & solidè sapientia, sed imaginem potius inanem quandam deprehenderis sapiētiæ, sine corpore, sine mēte, ipsius illius sapientiæ operibus atq; muneribus sola uoce resonantem. Nam cum rerum gerendarum sit sapiētia, imperij gubernandi, dignitatis ac potentiæ sibi comparandæ, Philosophia pro his maximis, maximeq; expetendis rebus, tanquam immunitatem laborum in beneficij loco illi tribuens, eam in uerbis pensitandis, & argumentorum conclusiunculis arte astringendis, rebusq; ijs, quæ nihil pertineant ad nos, accuratius indagandis, festiuo opere occupat: ut suarum uirium & grauitatis oblita, à coetu hominum, atq; ab regendis ciuitatibus, ad solitudinem, inertiamq; traducatur. Atq; huic arti tamen sapientiæ nomen est datum: in quo primū istorum est arrogancia reprehendenda. Quis enim illis hoc cō-

c 3 cessit?



celsit: aut quo nam iure fuit ab ipsis usurpatum, ut
 artem suam, cuiusmodi ea cunq; sit (nondum enim
 de hoc disputo, post uidero) in ipso statim ortu atq;
 initio, inscriberent Sapientiam: cumq; necdum pla-
 ne perspectum, cognitumq; esset, hominum ne ui-
 tæ utilis futura esset illa, nec ne esset, tamē tanquam
 ratio absq; ea rectè, ordinèq; uiuendi cunctorū iam
 confessione constare non posset, ita summū rerū hu-
 manarū titulū illi præscriberent: Verum fuerit hoc
 uitium superiorū illorum, & qui septem dicti sunt,
 quos tradunt cunctos in Græcia Delphis primū
 cōuenisse, Athenis prætore Damaso: iterum deīns
 de Corinthi, cum eos Periander Corinthiorum ty-
 rannus hospitio accepisset, circiter quadragessimā
 quintam olympiadem, quo tempore Romæ L. Tar-
 quinius Priscus regnū obtinebat. Atqui hi isti ipsi,
 si sua sententia se appellauerunt sapientes, indulse-
 runt sibi profectò, quàm par erat, uehementius. Sin
 autem populorum suffragio uocati sunt, habent es-
 gregiam sui cognominis, & quo iure gloriētur, au-
 toritatem. Siquidem ad imperitos & stultos dela-
 tum fuit de sapientibus iudiciū, etsi uideo non istos
 solum, sed alios cōplureis, si fama & opinione uulgi
 sapientia censeatur, nulla illustri de causa passim ha-
 bitos sapienteis: simul ut quis enim in illa rude indo-
 ctiaq; uetustate uel dixerat aliquid, uel egerat con-
 cinnius, ita ascribebatur ad numerum & nomen sa-
 pientis. Quo ex genere maternus auus Thesei Pit-
 theus,

thêus, cùm uersibus pangendis sententiolas quasdā complecteretur, in primis iudicatus est sapiens. Lycurgus uerò eundem nominis honorem iustius est assecutus; quòd enim confusam & pertubatā, ac (ut Herodoti utamur uerbo) κακονομοίαν Lacedæmoniorū Remp. legibus latis constituerat, ferēdisq; laboribus, & periculis alacriter adeundis, ciues ad fortitudinē, & ad omnia belli munia apprimē erudierat, comparata sibi autoritate & gloria, sapiens meritò existimatus est. Sed ut ab hoc magno sanè uiro abeamus, quid cuiq; esse tunc potuit in sapientia nomine gloriosum, cùm Homerus, cuius dicta pro decretis habēda sunt, etiam fabris attribuat sapientiam? Ac ne quis illorum septē, quos & nos nimium iam sæpe in medium adducimus, & negat Di cearchus autor haud ignobilis, nec Philosophos, nec sapiētes fuisse, ullam alio ex genere putet fuisse sapientiam, quā eam, quæ dicta in Pittheo: Primum poētæ pleriq; nō adeò perfrigidi; deinde argutulis quibusdā, ut sibi uidebātur, sentētijs, multitudinis plausum captantes. Quid enim Chiloni Lacedæmonio (ut de eo potissimū loquar) tria ne dicta sapientia laudem afferre debuerunt? At ea in foribus templi Delphici sunt inscripta. Quid tum? nō enim qui inscripsit, aut qui insculpsit (opinor) faber sapientior fuit? NE QUID NIMIS: rectē hoc quidē, & sibi ille admodū cōstitit: paucissima enim locutus, multam sibi parauit sapientia famam. Sed quid

quid illis sapiētibus fiet, qui suis libris, atq; scriptis omnia referferunt? N O S S E uero S E Q V E N S Q V E, quam uim habeat, si ab hoc communi atq; usitato sensu abieris, ipso illo interprete qui edidit, cenſeo eſſe quærendum. Nam illud quidem inopinatū ac nouum, & nescio unde erutum: nemini enim unquam in mentem uenire potuiſſet: C O M I T E M E S S E A E R I S A L I E N I M I S E R I A M: Quid? hiccine ſolus uadimonium deferere coactus fuerat, eiusque bona proſcripta fuerant? Sed quoniam in ſingulis non eſt immorandum, & unius tamen exemplo cæteri noti eſſe poſſunt, ratio cōcludenda eſt, Sapientium nomen, ab iſtis uſurpatum, plenum arrogantiae eſſe: à populo delatum, inanitatis. Correxerit errorem hūc ueterum Pythagoras, imminuitq; inuidiam nominis, quod primus Philoſophiam pro ſapientia inſtituit appellari. Is in illa ſua peregrinatione, in qua, ut de Vlyſſe ſcribit Homerus, multarum gentium mores & inſtituta perſpeculatus fuerat, cū peragraret in reditu ueterem Græciam, atq; illo itinere ueniſſet Sicyonem, ibiq; cum Leonte Sicyoniorum tyranno congreſſus, interrogatus ab eo eſſet, quem nam iſtum ſe profiteretur, num ſapientem? reſpōdit ſoli Deo congruere nomen ſapientis: ſe uero Philoſophum eſſe: hoc eſt, ſtudioſum, & cupidum ſapiētiae. Graue reſponſum & dignum moderatiſſimo uiro, nihil ſibi arrogauit, nihil ſublatius de ſe locutus eſt, tantum

tantum eam cupiditatem, quæ cuncto generi humano è natura insita est, sapientiæ adipiscendæ, in se aliquanto fortassis acriorem inesse significauit. Plerumque igitur grauitatis oratio: neque ipse non idoneus, cuius auctoritatem cæteri sequerentur, si in eadem porro sententia constitisset, neque dissensisset postea à sese, cæterisque rebus non iam se inoderatum & grauem, sed flagrantem ambitione importuna præbuisset. Nam quid illa iactatio popularis, & Græciæ omnibus in locis, ubi cœtus celebrari erant soliti, sui ostentatio? Quid nudatio femoris aurei Olympiæ, cum ad ludos solenneis cuncta adesset Græcia? aliud in eo indicant, quàm speciosum illud sapientis nomen, quod ipse paulò antè ab hominibus cunctis abiudicarat, & Deo uni tribuendum censuerat, cum conaretur apparere ipse Deus, usurpare illum confessione reliquorum, & ad semetipsum uertere, tanquam præstigijs quibusdam, uoluisse? Quamquam femoris quidem aurei illa nudatio, ignarum forsitan uulgus commouere: ijs, qui hominem nouerant, meminerantque ex aurificina paulò antè ad Philosophiam egressum, miraculo esse non potuit. Quid quod ad Italiam se contulit, & Metapontidem, ac domicilium statuit fortunæ suarum? qui cōueniebat homini Samio, præsertim cum plus honoris, quàm satis opus esset, in germana Græcia paribus illius haberetur? Sed, opinor, occupatis ibidem populorum animis opinione, & fama superioris sapien-

d tium,

tium, cum eum, quantum assequi posset, celebritatis
pccniteret; nouas illum sedes, & uberiores segetes
sue propagande laudis, uacuis etiam tum à Philo-
sophia harum gentium animis, in Italia quæsiuisset.
Quibus in locis disciplinæ sectam eam cōdidit, quæ
Pythagorica est appellata, magistra illa taciturnita-
tis. Hoc confiterer commodè, si ut in addiscendo, sic
etiam ad docendum adhibitum silentium fuisset; hu-
ius enim molestiæ parte iam careremus. Porro apud
eum mos iste tenebatur, ut qui se huic dicassent disci-
plinæ, obmutescerent integrum quinquennium, do-
cerenturq; primò cōmunia quædam, uelut elemen-
ta artis: deinde secretiora & quasi mystica; neq; id à
magistro: ille enim abditus & semotus ab oculis,
nemini se communicabat: sed responsis, & tanquam
oraculis erudiebat iuuentutem, donec tandē perspe-
cto ingenio, moribusq; probatis, qui iudicati fuerāt
digni, admittebantur ad conspectum magistri, com-
merciumq; sermonis. Quod qui assequebantur, con-
festim domum ad necessarios suos literas, nuntiosq;
gratulandi causa mittebant, tanquā eximium quid-
dam & optandum adepti. Hanc uitæ, morisq; eius
insolentiam secuta illa arrogātia est, quod unus ferè
Philosophorū omnium dictum & autoritatē suam
sanctam haberi instituit pro ratione. Vnde enim ce-
lebre illud *αὐτός ἐστιν*, quod usurpare soliti erant, qui
tuebantur Pythagoream sententiam, si quando (ut
fit) in disputando premerentur, ut delitescerent in sa-
pientis

pientis magistri autoritate & nomine. At hoc ne ty-
 ranni quidem in oppressis ciuitatibus facere soliti
 sunt, cum quid de pristino statu uolūt dimouere, ut
 non aliquam proponāt causam & rationem uolun-
 tatis suæ. Sed de egregijs autoribus tanti nominis,
 artisq; huius appellatione ac titulo, dicta hæc sint.
 Quæ una si disciplinam profitetur sapientiæ, ridi-
 culè arrogans est: sin studium duntaxat, & cupidi-
 tatē, sicut ipsa uis uocabuli declarat, nihil habet exi-
 miū præ cæteris, nec quo tantopere gloriatur præ-
 ter cæteras. Quis enim est quocunq; ex studio, qua-
 cunq; ex disciplina, qui non maxime cupiat sapien-
 tem esse se: aut cui quicquam omnium rerum uidea-
 tur sapiētia esse diuinius? Illud nunc uideamus, qua
 autoritate prodierit in lucem, fueritq; iam inde ab
 initio accipientibus commendata: est enim profectò
 aliqua ex origine etiam & generis stirpe censenda
 nobilitas. Vt enim in editione in lucem, ac procrea-
 tione liberorū, nisi parentum distinguant nomina,
 & gentes, pares principio censeātur esse clari obscu-
 ris, ingenui seruis: propterea quòd nihil nunc de-
 mum oriens, habere potest ex se in populum nobi-
 litatem: Ita Philosophiæ prima commendatio à suis
 inuentoribus, & tanquam parentibus, repetēda est.
 Vtris igitur tandem tanti inuentionem boni asis-
 gnatis? Græcis, an ne Barbaris? Video magnum
 esse certamen: habetq; pars utraque fortes aduoca-
 tos; ueruntamen ipsorum etiam confelsione Græ-

corum superiores Barbari. Itaq; & Aegyptij suum Osirin iactant: Vulcanumq; Nili filium aperuisse Philosophiæ principia annis prope innumerabilibus, antequàm in Græcia de his ipsis rebus mentio ulla haberetur: & Gymnosophistas apud Indos, Druidas apud Gallos, uel ipsa teste Græcia, magnâ sapientiæ famam uideo consecutos. Druidum quidem nomen in summa ut tum habebatur diuini humaniq; iuris notitia, non solum Græcis literis celebratū, sed & ipsi Græco uocabulo *Semnothei* sunt appellati, propter scientiam colendorū Deorum uidelicet, & celebritatem religionis: atque ijdem de rebus occultissimis primi non pauca ad cognitionem hominum attulisse existimati sunt: magno sanè munere insigniq; beneficio, tanquā parum multa essent in oculis omnium posita & in conspectu, quæ ingenium, diligentiamq; requirerent. Prædicant *Zamolxin* Thraces, quem ex abdito specu responsa sapientiæ percontantibus edentem, nuncq; uelut euascentem ab hominum oculis, rursus autem sese in conspectum dedentem, inducti, deceptiq; præstigijs, diuinitatis honore donarunt populares: itaque & sacrificia illi solennia habita, & epulæ institutæ sunt. Athlantem laudibus Lybes ferunt: ob imitationem enim cœlestium circularū in sphaera lignea relata, quodam quasi sapientiæ præmio, ipsius humeris cœlum sustineri nimium simplex illa memorauit antiquitas: ut illum suæ artis, si modò sapit quicquam,

quicquam, necesse sit poenitere, siquidem ob eam tanto oneri ferundo perpetuo addictus est. Ochum habent Phœnices autorem sapientiæ suæ: at Phœnicias Græci, neque hi solum, sed gentes ferè omnes: literarum enim usum, sine quibus nimirum sapientia non constat, omnium consensu Phœnicibus acceptum latũ fuisse legimus: ijdem isti, quod quidem sapiētiæ partem aliquam attingit propius, ad maritimos cursus dirigendos, atq; ut non iam fortis esset, sed consilij nauigatio, minorem Vrsam notauerunt, eandem Cynosuram, qua fidunt duce nocturna Phœnices in alto: quæ hoc etiam certior dux est nauigantibus, quòd gyro interiore breui conuertitur orbe. Quid dicam de Chaldæis, Magisq; quorum alteri spectandis syderibus, & cœli conuersione intuenta cum statos illic, solenneisq; motus deprehendissent, solisq; & lunæ, cæterorumq; errantium ordines, concurfiones, momenta perpēdissent, quæq; quo'ue die in cœlo euenire necesse esset, aliquanto antè prædicerent, scitum quiddam in uita comperisse uisi sunt, idq; populare, atq; plausibile. Sed illud in ea arte cæteris fallax, ipsis illis fructuosum, quòd per uanissimas prædictiones fatalium euentorum, animis imperitorum superstitione implicatis, uiam sibi ad quæstum inuenerunt, & ad dignitatem. Magi porò iam inde à principe illo Zoroastre eadem penè uia ad similem honorem in Persis sunt euecti; sacris enim & ceris

d ; monijs

monijs Deorum procurandis, cum de naturalibus quoque principijs nonnulla differerent, adiungerent: præterea diuinationem ex alio certo genere, ac Chaldaei, animos & regum & gentium illarum, captos admiratione sui, tenuerunt. Atqui ab his, quos memorauimus, alijsque præterea quam multis, quos nostra nunc prudens prætermittit oratio, antiquitus proditum est, fuisse orta Philosophiæ principia: barbarique omnes ferè, qui in huius laudis contentionem uocati sunt: quorum si inuentum sapientia ista uestra est, atque ab eis, tamquam à principibus, autoritas est huic arti tribuenda: Primum quò nam abierit Græciæ infinita illa & intolerabilis gloriatio, omnia sibi uindicantis, & quæ omnium artium laudatarum initia, progressus, fines cum ab sese oratos, tunc apud se perfectos uult: Deinde faueo enim ego quoque hoc loco quidem Græcis) esto, sit tanti, quanti esse uos uultis Philosophia: Quid aut elegas ab indoctis, aut humanum à feris, aut politum à rudibus, aut denique eximium & nobile à barbaris posuit proficisci? Si uero Græciæ ascribendus est iste honos, id quod mehercule malim, si per ipsos liceat, ac nisi domesticis testibus, ijsque admodum probatis lis secundum aduersarium detur: erit aliqua fortassis in origine Philosophiæ commèdatio propter ingenium famamque Græcorum: sed tamè per exigue, atque infirmè à paucis positum est, primis harum rerum inuentoribus Lino memoratas esse Thebas

bas, Musæo Athenas, qui etiam primus Deorum generationes fertur tradidisse: quod equidem miror filio datum, cum Eumolpi patris institutū Athenis fuerint mysteria, Attamen siue his, siue illis hoc tantum humano generi munus ferēdum acceptum est, cum illud dicitur, quod tamen etiam antè dictū est, coarguēdam esse eorum temeritatem, qui artem nouam atq; incognitam in lucem modò prodeuntem rei eiusce titulo nuncupauerunt, in qua peruestiganda, atq; in constituendo ecquidnam sapientia sit, ecquid in se contineat, tot postea est seculis, tantis & ingenijs, & studijs elaboratum: tum idem hoc istis ipsis, qui huic arti tantum tribuunt, testibus confirmabitur, quòd in progressu reprehenderunt ipsi sese, tumoremq; & elationem nominis, aliquanto uerecundius usu ipso & tractatione admoniti, in Philosophiæ appellationem subsidere uoluerunt. Quòd si illi hoc fecerunt medio in cursu, cum rem eam, quam assidue tractabāt, habere iam notiores cœpissent, ut imminuerent aliquid de prioris appellationis grauitate, & nomine: nobis non licebit in ipsa penè calce consistentibus, & iam planè edoctis, quàm puerilis ars tota ista Philosophia sit, diripere illi quod reliquum est autoritatis: eamq; haudquam sibi debiti honoris insignibus, nudatam, è suggestu, sedēq; principum, in scholarum angulos, & homunculorum inerticulorum disceptationes eijcere: quæ præsertim tam sit auida, & helluatric,

ut nullis certis finibus contenta, in omnia omnium conetur inuadere. Præclarum quibusdam uidetur esse cœlestia cōtemplari: arrogat hoc sibi in primis Philosophia: Moderari politias: ne in hac quidem parte cuiquam relinquit locum: Scire agere uitam prudenter, & nauiter: hoc uerò præcipuum ait esse munus instructi ab sese sapientis: Aptè, & congruenter temporibus loqui, unumq; facundia excellere inter multos: huius quoq; siue artis, siue peritiæ, uiam à se prædicat, & rationem esse petendam. Sunt etiam subtiliores, & minime populares artes, scientiæq; mathematicorum, in quas temere irrumpat. Quæ (malum) ista tanta cupiditas, quæ impudentia est: Quoquo modo certè ea non ferenda: suiq; tandem aliquando huic procaci Philosophiæ sunt constituendi termini, ne ad libidinem euagetur, depascaturq; omnia omnium: ne uel ex alienis opibus intumescat: in quo tamen quantus (ô Dî) error est eorum, qui illi omnia in sinum student congerere: dum enim eam in omneis regiones, orasq; disciplinarum deductam esse cum imperio uolunt, stabile ei nullam relinquunt sedem, ubi tanquam in paterno regno, & auito dominetur: sed semper illi cum hospite litigandum sit: quam nos litem sic dirimamus, si placet: Si una quæq; ars suum & certum habet nomē, quo appelletur, separatimq; & seiunctè denotetur à cæteris, neq; potest unius certæ artis duplex æquè esse nuncupatio: non erit Astrologia Philo

Philosophia, non Geometria, non Musica, non Arithmetica: habent enim singulae hae scientiae appellationes suas, in quibus & sua cuiusque artis uis, facultasque comprehenditur, & à cæteris ea seiungitur. Itaque si Erasistratum suae artis & professionis nota iudicare uoluerimus, appellabimus (opinor) medicum, & Hipparchum astrologum, & Aristoxenum fortasse musicum: Philosophi autem nomen ab unoquoque horum segregabimus. Si uero ad proprias artium cunctarum appellationes commune omnibus nomen accesserit Philosophia, iam non magis fuerit in Astrologia sapiens Eudoxus, quam in statuaria arte Phidias: nec minus sapiens pictor Apelles, quam Philosophus Plato. Quod idem in reliquas etiam uulgares, & mechanicas artes, uel Homero teste, deductum, efficit id, quod antea dixeramus, ridiculam esse horum professionem, qui sibi soli doctrinam arrogant sapientiae. Quare si sententiam tueri & estimationem uolunt suam, tanquam eximium quiddam minimeque uulgare adepti: contrahant Philosophiam necesse est intra fines suos, neque eam liberè ita depopulari sinant aliena: ne si aditum ad prætorem sit, improbitatis damnetur: alienoque cum ignominia reddendo, suas ipsa etiam fortunas, si quas modò habet, multae nomine abiciat. Subijcere igitur Philosophiae, siue mauultis sapientiae, certam rem & propriam, quasi materiam quandam oportet, in qua sola ipsa dominetur, neque

in ea admittat confortium reliquarum. Quæro ergo, quam? Hic tibi aliquis uerborum credo amplitudine nos deterrere posse postulans, Philosophia est, inquit, rerum diuinarum humanarumque scientia. Agnosco sonitum, pompamque uerborum: certi in re nihil uideo. Quis hunc non irrideat tanto cum strepitu tam tumide se inferentem? Ecce alter de transuerso festiuam affert collectionem: Si ut quis in quaque arte excellit, inquit, in ea ipsa arte sapiens perhibetur: uerbi causa Phidias, si in suo opificio summus est, in eo etiam est sapiens: item in pictura Apelles, in fundendo ære Lysippus, sapientium nomen propter egregiam in arte sua cuiusque præstantiam sunt meriti: quod idem ualet in reliquis: erit ipsa per sese simplex & absoluta sapientia, rerum in mundo præstantissimarum scientia. Huic cyathus mulsi dandus fuit: ualde enim credo laborauit, ut quid denique esset sapientia, haberemus exploratum. Num non uidetis ex his quidem definitionibus nihil afferentem quod clare & dilucide de se polliceatur, falsæ modò in populum opinionis aucupatricem esse Philosophiam? Verùm his omisis, requiramus potius terminos, quos peregere ij, qui in ea auctoritatem sunt consecuti: Platonem dico, & Aristotelem: hos enim uideo à uobis in toto genere hoc constitui principes. Hi ergo partitionem Philosophiæ trimembrem esse uoluerunt, ut triplex eius munus esset, trina functio: una pars in rerum cœlestium

stium contemplatione, causis, effectibusq; naturæ indagandis uersaretur: Altera mores, leges, instituta, uirtutes, uitiaq; hominum constitueret: Tertia differendi rationem, dijudicandiq; quid uerum esset in disputando, quid falsum, quid consentaneum, quid repugnans contineret: ita in treis partes omnis diuisa Philosophia est, Naturalem, Moralem, Dialecticam, quam eandem, si Latinis malumus uti, quàm Græcis (etsi Græca quoque ipsa nomina iam in consuetudinem nostram adsciuiimus) rationalem forsitan rectè possumus appellare, quod idem est & Logicam. Hac diuisione constituta congregiamur propius, atq; ita ut ne uibrare arma tantummodo, & quosdam edere motus, sed ut manum etiam conferere, & præliū uideamur inire uoluissē: singulasq; hæc partes, quid unaquæq; earum ad sapientiam ualeat, consideremus: ut si uniuersæ artis inutilitatem & ignauiam quodammodo (sic enim dicendum est) potuerimus demonstrare; multorū animos hoc errore liberatos à superstitiosis & inanibus curis, ad illustres & serias occupationes transferamus: nisi quid ad hæc uos. QUID nam? CITRARIUS inquit, nisi nos in magna audiēdi expectatōe esse: ut experiamur, Phædre, tua ista singularis eloquentia num nam queat in maxima causa stabilem & fixam multorum de Philosophiæ uirtute labefactare opinionem. Nec tamen ego is sum, qui bellum illi habeam indictum: nec tam reprehendendā & abiectam

e 2 ciendam

ciendam Philosophiam, quàm modum in ea quær-
rendū puto: in quo sentio, Phædre, aliqua ex parte
tecum, probocq; Neoptolomij sententiā, quæ mihi
cum Sadoletio meo una est dissensio. Ille enim (ut ui-
des ipse) operam omnem in ea locari, & nihil agi
aliud in uita rectum putat. Sed tu perge quærso, &
in hanc partem potius incumbe tamen: nam qui
amplius æquo collaudent Philosophiam, nimium
sæpe multi, & mihi molesti sunt. A T Q V I, inquit
G A L L V S, mihi contrà modò mirari ueniebat in
mentem, cū Philosophiā uenerer etiam summos
pere, non solum diligam, quī possem non æquis au-
ribus modò, uerumetiam studiosè audire eam uita
perantem Phædrum. Sed profectò sic est, ut dicitur:
Nil tam iniquum, quod non dicēdo æquum uideri
queat. Cum enim tantus in hoc homine lepos sit, ut
me illius quidem semper, sed & alios omneis sæpe
mirabiliter delectet oratio: tum uis ingenij tanta,
ut inquam se cuncq; incitet partem, aliorum secum
studia pertrahat, & uim quodammodo afferat sen-
sibus audientium: itaque uereri iam ipse cœpissem,
ne quid de mea pristina uoluntate erga Philoso-
phiam dimitterem, nisi me confirmaret expecta-
tio defensionis, quam Sadoletus noster est habi-
turus: quod ipsum illi quidem non difficilior fuit
turum est, quòd tecum nunc non adest is, qui esse
semper unà solet, nec à te unquam, Phædre, di-
scedere, alterum lumen urbanæ huius facundiæ
Camil

Camillus Porcius. H I C E G O, Hoc, Galle, inquā,
quòd mea fiducia teipsum cōfirmes, uide ne in frau-
dem potius te deducat: namq; ego quis sum? aut
quid possum per me deniq;? Sed si quid fuerit,
quod utinā aliquid sit, bonitas causæ suppeditarit
mihi facultatem aliquam respondendi: & tamen
Phædrum nostrum paratiorem esse uideo, quàm
expectaremus: quam enim sibi accusandam & re-
fellendam assumpsit Philosophiam, ab ea ipse arma
uidetur mutuatus, quæ in illam ipsam demum ora-
torijs uiribus, & neruis intorqueat. Equidem uellē
Marius Volaterranus adesset, amicissimus omniū
nostrum, homo cū acerrimi ingenij, tum omni
quidem ille liberali doctrina, sed in his Philosophig
studijs in primis exercitatissimus: quē nos omnes
audiuimus sæpe quacunq; esset de quæstione pro-
positum, in utramuis partem differētem ita copio-
sè atq; amplè, ut quemadmodum de Carneade di-
ctum reliquit Cato, quòd non posset eo dicente di-
scerni quid uerum esset, & quid falsum: quòd incre-
dibili quadam ingenij & orationis copia audientiū
mentes obruebat. Sic huius sit & sublimibus senten-
tijs, & acutissimis argumentis referta disputatio: in
extenuando uerò, & amplificando, tanta uis, ut ni-
hil illo laudante humile, nihil uituperante uideatur
excelsum: haud sanè ille nunc pateretur desertam,
& oppugnatam iacēre Philosophiam: præsertim in
eam impetum faciente Phædro, quo cum ille sem-

per fuit cunctorum opinione quasi comparatus: summum in utroque ingenium, summa eruditio, salis & facetiarum ubertas par: uerum ille Philosophiæ aliquantum & studio, & amore cõiunctior: Phædrus hanc popularem orationis laudem magis est secutus, qua nunc fretus, si ipso iudice populo uti posset, nã ille causam (ut ego arbitror) parum æquam, haud difficiliter obtineret. Sed bene agitur cum Philosophia, quod à populari disceptatione remota est. Quamobrem ede nobis Phædre ea, quæ aduersus eam nunc primum tu quidem, neque leuiter, sed & diu antea, & perque accuratè es meditatus. T V M I L L E, Faciam equidem, inquit, atque hoc tibi studiosius nunc morem geram, quod sis in me tu postea aduersarius lenior: nec tamen mihi interdictum putabo, quin si ad paucos iudices me perculeris, ad populum mihi parata sit prouocatio. H I C cum arrisisssemus, V I D E T V R, inquit, ordo rerum & natura postulare, ut prius describamus sapientiæ formam: quæ, mea quidem sententia, cum aptior ex se ipsa sit, tum ad uitam splendidè & cum laude degendam accommodatior: qua posita, facillimum postea fuerit, qui ab hoc signo, tanquam nauigantes ab Arctico polo, aberrauerint, eorum errorem insipientiamque coarguere. Quoniã igitur sapientem esse uolumus, non qui in solitudine, neque cum paucis ineptis, sed qui in coetu, concilijsque hominum uitam agat: communesque cæterorum uoluntates & studia

studia secutus, referat ad sese omnia, quæ quidem sint expetenda, siue adeo quæ expetantur: expetitur enim idem, & expetendum est, quod opinione plurimorum iudicatur dignum, ut in eo adipiscendo omnis cura industriaque ponatur: erit sapientia, earum rerum comparandarum scientia, quæ ab eo genere hominum, quo cum uerferis, & æstimentur plurimi, & maximè expetantur: hoc definitione breuius comprehensum, oratione est dilatandum. Tria sunt (ut mihi quidem uidetur) in quibus omnis humani consilij desyderijque, & ratio uertitur, & appetitio: eaque ueteri etiam prouerbio notata, quo sic distinguitur: Optimū esse bene ualere, honorari pulcherrimum, iucundissimum frui eo, quod quis maximè cupiat: ita salutis, gloriæ, iucunditatis præclara esse uidetur & expetenda adeptio: nec uerò quenquam esse omnino omnium mortalium reor, qui non hæc sibi cuncta adesse maximè uelit. Sed uoluntas nullam habet laudem: libera enim est omnibus, & tardis iuxta, solertibusque communis. Scire autē inuenire sibi ad potiunda hæc aditum: & cum uniuersa in hoc certamen tanquam in cursum, aut luctum descendat multitudo, præripere unum cæteris palmam adipiscendi, aut certè inter paucos suū locum & partem obtinere: hoc iam proprium illius sapientiæ est, cuius nos iudicationem non unī, aut alteri, sed frequentissimo consilio permittendam statuimus. Nam si quis singulari quadam opinione
præditus,

præditus, diuersus longè à populi iudicio, aliam sibi nescio quam nocturnis lucubrationibus in silentio & cubiculo effingit sapientiã (ut nunc taceamus alienam etiam quandam & deuiam, longèq; aberrantem à communi prudentia, ac plenam uanitatis sequi rationẽ) quid, quæso, aliquid is ut efficiat, quàm erit amplum illud atq; magnum, in quo neminem ille omnino æmulum, nullum riualem est habiturus? An ignoramus contentione certantium, ac ueluti licitatione quadam, augeri rerum precia, atq; æstimationes? certoq; indicio esse iacere eas res, & penitus abiectas esse, in quæ nulla inter se contrà licentium studia confluantur? At hoc minime uult sapiens: uerum quod maximi & est, & habetur, in eo maxime conatur excellere. Ad multitudinis igitur iudicium acta sua præcipue consiliaq; accommodat. Vt enim habitum corporis, atq; uestitum: ut ædificationis formam, domiciliorumq; ut lauandi, cœnandi, loquendi morem: sic actiones, & consilia totius uitæ ad populi iudicia flectere, dirigereq; debemus: porro illa temporibus reguntur. Est ergo primum sapientis munus seruire tempori, & semper in eo, quodcūq; plurimi fuerit, præcipuas suas partes, & principem auctoritatem esse, postulare. Iam ne cernitis totius sapientiæ intelligẽtiam, quam Philosophi suam esse uolunt, populum sibi potiore iure uendicare? Et sanè æquius multo est, unum cõcedere sententijs plurimorum, quàm unius plurimos.

mos. Desciscere autem ab opinione & decreto multitudinis, aut arrogantiae est non ferendae, aut leuitatis irridendae. At populus nunquam diu in eadem sententia permanet. Quid tum? Turpe est sapientiae uariare decreta. Quid tu postulas sempiterna esse haec, quae generata sunt mortalia? ut enim Valetudo non ex eisdem semper, sed ex alijs, & alijs retinetur cibis: sic sapientiae consilia non perpetuo una sunt, sed ad tempus se accommodant, & ad fortunam, cuius praecipuum est, in humanis rebus posse dominari. Nec tamen etiam si non semper sibi multitudo in eadem opinione constans est, sed alio aliàs, & tanquam fluctu quodam fertur ad iudicandum, ideo de honore detrahitur sapientiae. Sed haud scio, an uegetior hac re quidem, & semetipsa solertior quodammodo sapientia ipsa fiat: ac uti faciem motus, sic illam mutatio, & uariatio accendat. Vt enim si idem mos perpetuo tenendus esset, & consuetudo eadem, facile esset unicuique inueteratam usu, & per manus traditam, uitae sapienter degendae retinere disciplinam: Sic quonia mutandae saepe opiniones, ferendae uicissitudines, studia in diuersam partem conuertenda, prioris uitae ratio omnis atque descriptio saepe etiam repetenda uel fingenda est, habet munus sapientia non minus difficile, quam praclarum, in uarias sese formas crebro commutandi: ut ad omnes euentus rerum, uarietatesque temporum promptam solertiam afferat. Floruit in gubernatione Reip. P. Scipio Nasica Pont.

ca Pont. Maximus: neque in ea solùm sapientis uiri laudem, sed optimi etiam cognomen senatus iudicio, matre Idæa Pessinunte hospitio accipienda, meruit. Atque is ipse cum subitis seditionibus turbata esset Respub. lenitatem illam suam pristinam, odio inimicorum incrudescere passus est; nec minus dissidentibus factionibus uictores suos esse uoluit, quàm antea tranquillo Reip. statu, ornatos florentesq; uoluerat. Lælius uero eodem illo tempore etiã proprio cognomine dictus est Sapiens: quia cùm agrarijs prius legibus fautorem se præbuisset, simul ac præsensit multorum se odia in caput suum concitaturum, destitit ab incepto, transijtq; ad eam partem, ut locupletes censeret in agrorum possessione esse retinendos. Flëxit horum uterque consilia & actiones suas ad id, quod expediebat, quodq; tempus ferebat: egere sapienter. Quòd si lenitatem Scipio, constantiam Lælius tenuissent, præceptis forsitan huius uestræ paruissent Philosophiæ: sapientium quidem nomine, & laude caruissent. Vnus est ex omni antiquitate, quem maxime admirer, C. Iulius Cæsar: cuius tanta animi uirtus, tantum ingenium fuit, ut angustius theatrum gloriæ suæ orbem hunc terræ, quem incolimus, quàm ipse meritis sit, habuisse uideatur. Hic non ad unam, alteram uel laudem, sed ad omnia summa natus: cùm etiam tum adolescens probari in foro eloquentiam uideret, adhibuit studium, in ea nemini ut esset secundus: ex bellica

bellica porro uirtute gloriam sibi meditatus, & potentiam: magnitudine animi perfecit, & industria, ut non solum gentium omnium uictor, sed naturæ etiam esset, Oceano domito, atq; eo toto summotis nationibus, non solum inuestigatis, uerum etiam bello armisq; subactis: fluminibus, quæ neutiquam permeabilia uiderentur, iugo pontium deuinctis: infinitis spatijs terrarum celerius cursu, quàm fama peragrat. Atq; hic idem, domi & in patria, ubi intellexit priuatim quæri opes, Remp. in medio prædæ omnibus esse: operam dedit, ut cunctorum existeret princeps, imperiumq; sibi acquireret; ad salutem illud quidem, non ad perniciem ciuitatis, si per homines impios ea quæ cõstituerat efficere situs esset. In hoc ego homine maximam uim sapientiæ fuisse duco: & certè talem statuo esse debere, quem iandudum effingere conor sapientē, alto animo, acutum, sagacem, industrium, longè prouidentem in posterum, suam uirtutem impartientē omnibus, sibi præcipua & maxima appetentem, opes, imperium, auctoritatem, gloriam: non enim obliuiscitur sui sapiētia, nec suorum penitus commodorum curam abiicit, sed refert ad se omnia sapiens, consultitq; sibi potissimū: nec putat digniorem esse quenquā, qui commodis uitæ honoribusq; fruatur: habetq; illud in ore, opinor, Pacuij, Sapientem qui sibi prodesse nequeat, nequicquam sapere. Hanc ego artem, & disciplinam agenda uitæ, sapientiam uoco, ciuilem quandā

popularemque Philosophiā, erigentem homines ad facta tum splendida, tum in multitudinem gloriosa: eosque magnos, potentes, nobiles, atque, ut uno uerbo complectar omnia, principes denique efficientem. Conferte nunc istam uestrā, si placet, quam in scholis quotidie declamitatis Philosophiam, ut hæc ab illa quid intersit, dijudicare possimus. Ac primum, tanquā uestibulo amplo, atque excelso ornare illam cupientes, præponitis rerum cœlestium contemplationem & occultarum rerum, causarumque indagationem: ea enim est Physice, quæ primū tota incerta est, minimèque comprehēdibilis: deinde etiam si comprehendatur, prorsus hominum uitæ inutilis & superuacanea. Quid enim poterit gloriari se adeptum esse, qui illa cognouerit, cum non sua, sed aliena cognouerit? uerū cognosci non possunt. An ille mundi effector, & fabricator tanti operis Deus, tantis locorum interuallis à semetipso nos disiunxisset, si suas sedes, arcanaque consilia nobis nota esse uoluisset? Quid est aliud bellum indicere Dijs, more gygantum, quàm illuc niti ascendere, quò nobis aditus omnis penitus est interclusus? Atqui mihi uidentur ueteres illi haud illepidè de gygantibus fabulati, quò horum insolentiam, temeritatemque arguerent: quod ea re firmitus adducor, ut credam, quòd ut illi montibus tribus, tanquam gradibus, sic Philosophi trinis, antea à nobis memoratis Philosophiæ partibus, in altissima loca moliuntur ascen

ascensum: Ter sunt conati imponere Pelio Ossan,
 Scilicet atq; Ossæ frōdosum inuoluere Olympū:
 Ter pater extructos disiecit fulmine mōtes. Scripsit
 diuinè, ut omnia, poëta omnium maximus: nec tam
 ille ut gygātum, qui certè nulli id egerunt, quàm ut
 hominum suis ingenijs nimium confidentiū arro-
 gantiam refelleret. Quanquam non ingenij est, sed
 dementiae, quæ nullo intelligi pacto queunt, in ea ni-
 hilominus mentis aciem ad intelligendum intende-
 re. Nam isti quidem ingenium si habuissent, primū
 quidem sciri ista non posse uel ipsi cognouissent, uel
 doctissimis hominibus, ac principibus disciplinarū
 suarū affirmātibus credidissent. Deinde ea omnino
 nihil ad se pertinere. Postremò quas ad res ingeniū
 adhiberi, & prudentiam oporteret, ad eas res adhi-
 buissent, in coetibus hominum uidelicet, & cōcilia-
 bulis ciuitatum: ubi non in umbra, & cubiculo, sed
 in sole, atq; campo: non in argutijs, & conclusi-
 siunculis, sed in agendo & regendo sapientia ipsa
 cernitur. Verum ad hoc genus uitæ præstabile atq;
 eximium, tãquam abortu naturæ quodam cum mi-
 nime idonei nati essent, confugientes in ocium & so-
 litudinem, ignauiae culpam & tarditatis, ad cœlestis
 scientiæ laudem transferre tentauerunt: cœlicq; res,
 rationes, causas, freti ocij abundantia, formam, mo-
 tum, materiam ex qua constet, opificem à quo sit fa-
 ctus, finem quo intendat, inquirere: cum terrena, &
 quæ in manibus, quæq; ante oculos erant, perciperet

re non potuissent. Quod est ante pedes nemo spectat : cœli scrutantur plagas . Antiquus uersus in hosce factus : sicut Thaletem unum è septem illis argutè lusum ab anicula legimus : qui cùm domo semel antelucanus egrediens, ut siderum quorundā annotaret cursum , in subiectam pedibus foueam, quam non animaduertat, cecidisset: Quid, inquit anus ancilla acutè procax, à te expectādum Thales est, ut nobis de remotissimis rebus perceptum tradas, cùm ante pedes quæ sunt, ea minime intuear? Acris in illum obiurgatio : sed ualet in reliquos. Omnes enim qui huic arti se, & studio dediderunt, aut desperatione ducti, posse se inter cæteros suum locum , & statum obtinere , huc sunt compulsi: aut uanitate quadam ingenij, leuitateq; naturæ friuolam oblectationem hanc , & arridentem ocio , desidiatq; disciplinam , serijs occupationibus antetulerunt. Huiusmodi homo Anaxagoras fuit , qui percontanti cuidam , Quoniam esset natus : Ad cœlestium contemplationem, inquit. Si oculis intuendā, nihil ille habebat quàm cæteri homines plus: Si mente & scientia comprehendendam , næ Anaxagoras ad rem nullam natus, si quidem ea sequebatur, quæ non poterat assequi: haud secus multò, ac mens ipsa illa, cuius idem ipse repertor fuit, quam infinito antea tempore cessantem , tandem admouisse manus tradidit, ad minutissimas particulas corporum naturalium in unum confusas secernendas : quæ infis-

nita

nita & interminabilis secretio, non tam Anaxagoram mentem arguit frustra suscepti laboris, quam Anaxagoram dementiæ: atq; hic ipse, quò liberius hisce cōmentitijs rebus uacaret, ne uel aliam in partem cura ulla abduceretur, agros quos fructuosissimos habebat, incultos dicitur reliquissè, nequaquā laboriosam mentem illam, quam tantopere adsciscibat, imitatus: cum non laborem ipse modò, sed cogitationem quoq; effugeret laboris. An hoc conuenire sapientiæ existimauit, cum laborem mentis tantis præconijs efferret, se nihil laborare? & cum mēs alieni tantam curam gereret, sua ipsum negligere? Quanto sapientior eius auditor Pericles, hac maturè dimissa disciplina, ad regendam Remp. se contulit: in qua per quadraginta fuit annos, non Athenis solum, sed in tota Græcia ferè princeps. Atq; hæc sententia, nullam sublimium rerum atq; occultarū nec sciri posse à nobis nec percipi, si autoribus nobis nūc demum prodijisset in lucē, nō dubitaremus eam sanè cum asseuerare constanter, tum etiam rebus & argumentis confirmare fortiter. Verū si qua eius tamen inuidia apud aliquos est, nil prohibet, opinor, quin eam à nobis depellamus, & ad eos ipsos, quos contra dicimus, rejiciamus. Etenim, quod sacræ testantur literæ, à Rege superbissimo extructam turrim, cuius apex, & excelsitas in cœlū finienda esset: tum Deum ad disturbandum opus uarietates linguarum, & uersiuocales sonos, discrepantiasq;

pantiasq; uerborum immisisse, ut aliud petentibus, aliud accipiētibus ijs qui fabricæ instabant, ab opere desisteretur: idem mihi optimè quadrare in Philosophos uidetur, quorū Deum cum misereret potius, quàm his iratus esset (nescit enim diuina bonitas irasci) de summis rebus acerrimis illos discessionibus inter se concitauisse, ut alius alium redarguendo, omnes ineptam curam deponerent. Enim uero quem primum testem ab istorum parte, contra istos eos ipsos excitabimus? Opinor illum quem uos principem, quem autorem, quem parentem Philosophiæ dicitis, Socratem. Quid ergo is, quid affert? Se scire hoc unū, quòd nihil sciret: atq; hanc unam sibi adesse sapientiam, quòd incerta pro certis non duceret. Nec uero sensit hoc solū, sed palàm quoq; omni tempore prædicauit: nec prædicauit modò, uerum etiam re ipsa secutus est. Cum enim Archelai in Physicis discipulus fuisset, eius, qui Anaxagoram audierat, totam eam penitus abiecit, contempsitq; scientiam: tum quòd certi in ea nihil inesset, tum quòd minimum cōduceret (ut ipse dicebat) ad beatam uitam, in qua una conquirenda potissimum homini esset elaborandum. Neq; adeò leuius ille Anaxagoram accusabat, quàm nos eundem paulò antè reprehenderimus: quòd (sic enim eum loquentem inducit Xenophon) altum quidam, & supra se sapiens, Deorum opera patefacere tentasset, quæ illi operta esse uoluissent, Empedocles

cles uerò, cuius elegans de rebus naturalibus poë-
ma, plus ingenij & uenustatis, quàm sapientiæ pro-
fectò continet, Interdum quasi furore incitatus, ni-
hil posse percipi, ne sensibus quidem exclamat: nihil
nos cernere, omnia in abstruso penitus abdita esse.
Idemq; ait, ad rem præsentem quidem, & quæ oc-
currerit, consilium homini adesse: mutatis autem his
rebus, in quas antè intuebatur, mutari & hominis
sensum ac consilium: ut uideatur Protagoream ra-
tionem, quæ post exorta, & copiosius defensa est,
his paucis uerbis innuere: cum quo sentiens Parme-
nides uetustus autor & nobilis, Quo quisque mem-
brorum temperamento præditus est, inquit, sic ha-
bet mentem temperamentum illud sequentem. Ex-
tat etiam responsum Anaxagoræ, Talia esse cuique
quæ occurrant, qualia ab eo concipiantur. Tanta
enim mobilitas, & quasi fuga rerum cunctarum à
ueteribus illis animaduvertebatur, ut negaret Hera-
clitus bis nos in eodem lauari flumine: quod idem
est ac negare, bis eadem nos uerè uti posse ratione.
In quo facetum illud Eratyli, qui cùm Heraclitum
reprehendens, ne semel quidem id fieri posse cense-
ret, iam oratione in rebus enarrandis nihil utebatur,
quòd negaret rem expectare morā dictionis posse:
sed tantummodo sublato digito, capiteq; reiecto
actum non esse agendum indicabat. Democritus
uerò naturæ ueluti succensens, obuoluta dicit esse
omnia, & in profundo penitus à nostris aspectibus

retrufa. Quanquam hîc quidem, quò melius, credo, illa cerneret, oculis se dedita opera dicitur priuauisse: cùm iam Empedoclem idem furor, ne diutius is frustra in quærendo operam sumeret, in crateras Aetnæ præcipitem iecisset. Vtor singulis testibus, ijsq; spectatis: quorum si autoritati fides adiungenda est, nihil est cur inanem hunc laborem in Physicis, illis ipsis desperantibus, nos subeamus: Neque enim aliud est ueritatem inquirere, ut ait Aristoteles, quàm uolantia sectari: hoc est, ea quæ comprehendendi non possunt, captare cupere: Sin autem deroganda, his præclaris autoribus in primis nixa in lucem prodit Philosophia. Quid secta una Philosophorum, & quidem ea nobilis Academia, siue ea uetus, siue noua sit, non ne hoc dogmate uniuersa, & tanquam fundamento nititur, nil percipi certò posse, nec rei cuiquam assentiendum esse? Cum enim uisa (ea Græci phantasmata) quibus mens pellitur, & ad iudicandum adducitur, talia prorsus à falso esse possint, qualia sunt à uero, non esse regulam, qua liquidò demonstratur, altera ab alteris quicquā interesse. Huius sententiæ princeps fuit, ut mihi quidem uidetur, Plato, atque ab ipso illo Socrate: sed hic primus rationem hanc dubitandi in scriptis prodidit, effinxitq; Socraticum morem, cuius admirabilis eloquentia mihi omni Philosophia uidetur præstantior. Sanè ergo is non tantopere Socratis ἐπὶ τοῦ ἡρώδου illam, nos sustinentiam, si placet, appellemus;

nihil

nihil pro certo affirmandi, literis persecutus esset, si non eandem ipse sententiam tenuisset. Hanc à Platone acceptam, aliquot annis post Polemonis auditor renouauit Arcefilas: Quintus deinceps ab eo Carneades etiam acrius defensitauit. Hæc me labore hoc leuat, uel inuidia potius. Quod enim est à me positum, causas rerum occultas, & scientiam celestium non posse percipi, hæc non modò suscipit defendendum, sed dilatat etiam: & quidem amplius aliquanto quàm uelim. Tollit enim præterea etiam iudicia sensuum, neque relinquit omnino quicquam, in quo possit assensio nostra consistere. Quamobrè relinquamus hanc, qua ex parte fundit se latius, & suam litem facit, eam ipsam quoque manifestò insipientē: quod enim percipi non posse sentit, id ipsum illa uehementer, ut percipiat, elaborat. Quatenus uerò nobiscum facit, cum præsidio quidem utamur illius, tum autem non minus eorum, qui perceptionem admittunt, atque scientiam: quos inter si tot iam seculis cōuenire potuisset, ut de omnibus, aut saltem de primis atque præcipuis sentirent eadem, esset aliquid fortasse, in quo nobis quoque acquiescendum putaremus. Nunc quid de occultis rebus, atque obscuris dicam, cum in clarissimis tanta sit dissensio? Sole hoc quid lucidius esse potest? unde omne lumen, omnis claritas, omnis in cœlo & in terra est radiatio: atqui hunc ipsum, cuius aspectus maxime implet oculos nostros, non modò quid sit, sed ne

g : quantus

quantus quidem sit, horum adhuc concordi sententia potuit definiri. Epicurus bipedalem eum esse, aut non multo plus, uel minus: scilicet hic omnia suis oculis indulgens, quorum ut saluum teneat, incolus meque iudicium, audet negare etiam impudenti mendacio, sibi unquam cum torisset aciem, duas è lychno flammulas uibrare uisas. Mathematici duodeuiginti partibus maiorem quam terram: Num hæc exigua differentia est? Creuit impudentia: centum enim & sexaginta partibus sunt, qui uelint terram à sole superari. Adhibeamus Architectum peritum qui horum septempeda controuersias coërceat: uerum non metiendo, opinor, sed cédendo. Nam quæ ex materia, quoque ex corpore factus sit, ausus solus est Anaxagoras dicere: ferrum esse illum igne penitus candens, ueritus credo ne si ad secernendum hunc quoque mens illa sua manus admouisset, solem in mundo non haberemus. Hoc fortassis Democritus neglexisset: Anaxagoras pertimuit: itaque munivit & duritie ferri, & ardore ignis: atque ne illum parum forsitan profecisse hac sententia existimetis, hoc nomine ab Atheniensibus impietatis est damnatus. Quid nobis omnibus magis esse potest persuasum (nam perceptum non audeo dicere) quam cælum circūcirca nos torqueri: terram in infimo mundi iacere immobilē? Extitit tamen Philosophus Syracusanus Niceas, qui stare cætera cuncta cēferet, solumque rerum omnium terram circū axem moueri, ex

eodē

eoq̃ fieri, ut eadem apparerent omnia, quæ circum
uerſo cœlo eueniunt: Huic ut defuerit ſua ratio, te
meritas certe pro ratione affuit: adeo nihil tam ab
ſurdè dicitur, quod non aliquo autore defendatur
Philopho. Iam cœleſtium orbium numerus num
adhuc ſatis perueſtigatus eſt: ſinem equidem uideo
nullum fore, ſi quod uſq̃ adhuc factum eſt, ſingulis
propè ſeculis nouus aliquis orbis præterea adijcia
tur. Nam de epicyclis aſtra ferentibus, ac de orbis
bus à medio mundi dimotis, quos eccentricos ipſi
uocant, ſint ne, nec ne ſint, digladiantur per me licet
cum Philoſophis Aſtologi: quorū alteri ſtatos fieri
motus ſine his, alteri cum his naturam ſtare poſſe
negant. Atq̃ hæc tam perſpicua in mundo & ma
niſeſta quæ palàm feriunt oculos, auerſoſq̃ etiã in
aliam partem, rerum pulcherrimarum ſpectaculo
ad contemplationem ſui trahunt, ſi ignorata ſunt,
& impercepta, quid erit de obſcuriſſimis rebus, & à
ſenſu noſtro abſconditis dicendum: Omittamus de
Dijs loqui, quo in genere nos Deum unū agnoſci
mus, tribus perſonis, eadem mente, eodem numine,
eadem natura, eadem poteſtate in abſolutam & ſim
plicem unitatem redeuntem: non enim hoc à Philo
ſophia, ſed ab ipſomet Deo, & Dei filio accepimus:
irrideamusq̃ in hac re tanta Philoſophorum ine
ptias: delitias uidelicet Epicuri monogrāmos Deos
conſtituentis, ſine corpore, ſine farto, ſola circum
circa lineata deſcriptione, humanæ figuræ ſimiles:

Stoicorum quoqꝫ anum illam fatidicam contemnamus: Illud strictim attingamus, quòd sanè non cesserit nemo: principio incognito, quæ ex eo principio gignantur nequaquam posse cognosci. Quod ergo nam est rerum naturalium principium? num aqua, quod Thales posuit: quanquam ille ueluti diuinans, quòd siti atqꝫ æstu esset moriturus, conciliare sibi tanto honore curauit aquam: An aër, ut placuit Anaximeni? uel ignis, quod Heraclyto? item finitum principium? ne, an infinitum? mobile, an? ne immotū? Video maximas dissensiones. Nam atomi Democriticæ innumerabiles quotidie mundos fortuitis concursibus efficientes, consumunt cogitationes nostras immensitate regionum, quas peruagantur, & turba corpusculorum. Materiam porro suam Aristoteles, quam sine forma ulla, & sine ratione esse uoluit, unde cognosci posset: quomodo ipse cognouit? Longū est enumerare singula: & patere tamē arbitror, ignorari Physica illis autoribus, quibus tractata sunt: quorum simul ut quis sententiam suam dixerit, non mecum illi quidem, sed cum cæteris Philosophis futurum sit negotium, clamore ac iurgio pro contraria parte tendentibus. Sapientia quidem in hac parte Philosophiæ tantum abest, ut aliquid insit, ut contrà sapiēter deliberet, qui hæc tanquā ingenijs nostris longè exuperantiora omitenda penitus ducat. Non enim profectò tantis sese à nobis spatijs Deus abiūxisset, neqꝫ tot aliud supra aliud

aliud circumduxisset, tam uasta & diffusa elementorum corpora, igne quoque postremo commutabilem mundum hunc uallasset, superinduxisset irrequietos ambitus cœlestium orbium tot, atq; tantorum, cursuq; eos immenso, ac inenarrabili in gyrū cōcitasset, solidissima & firmissima compactos materia, si à nobis homunculis humi stratis, & in infimum locum deiectis percipi hæc omnia, & cōprehendi uoluisset. Sed fac cognosci: quid tãdem quasi nostra interest? Chreme, tantum ne ab re tua est ocij tibi, aliena ut cures, ea ad te quæ nihil attinent: Iure igitur Socrates scientiam hanc reiecit, uel ut obscuram, uel tanquam nō necessariam: Philosophiamq; peregrinantem procul à nobis, & in cœlo errandam, credo hospitium quærentem, deduxit quasi manu in ciuitatem; uersariq; inter homines assuefecit: eiq; præfecit muneri, ut de bonis rebus & malis ad uitam potius pertinētibus, inquireret. At enim ingenua est, & homine libero digna hæc speculatio: cur non curiosa potius, & ei ipsi molesta, cui te nimium studeas insinuare? An ego si quæ domi ago, & in cubiculo, ea curiosius quis perscrutetur, feram moleste? neq; uerū arbitrer pati, ut meis intimis rebus speculator immineat? & Deum persuasum nobis habebimus hac inani nostra curiositate delectari? Nam de principibus quid narrem? quorum ad Deum propius accedit imitatio? Regis Persarum ferunt speciem & maiestatem eiusmodi esse, nihil ut
illa

illa augustius, nihil spectabilius nec cogitari quidē possit. Ipsum quidem Susis, aut Ecbatanis se continentem, abditum à multitudinis oculis, habitare regalem domum admirabili opere perfectam, cuius parietes ex omni parte auro, ebore, electroq; persulgeant: uestibula porro domus multa extare, amplaq; septis distincta pluribus, aliquot inter se stadiorum interuallo, muris præaltis, & æneis foribus munita, quorum custodes sint eximie dignitatis uiri: è quibus principes & summates qui sunt, duces, dynastæ, satrapes in primo proxime regiam assident uestibulo, ceteri deinceps ordine suo succedunt, omnes magnifico cultu pro honoris scilicet & dignitatis ratione. Ianitores deinde cum his, & qui oculi auresq; regis appellentur Græco uocabulo apta coagmentatione *ὡταλοσσι*, quorum usu ac ministerio & uideat rex cuncta, & audiat. Tum autem dispositi suis locis, quæstores, scribæ, familiarum & uenationum duces, quiq; adeuntium dona recipiant, quorum quidem donorum innumerabilis quotidie ad regem confluat multitudo. Deniq; operum, negociorumq; cunctorum quæ ad gubernationem regni necessaria sint, sui cuiusq; muneris curatores, atq; præfecti: ipsam autem uniuersæ Asiæ dominationem terminatam ab Occidente Hellesponto, ad Orientem Indis, per regna & nationes & satrapias tributam, præsidibus esse ornatam suis, qui se seruos magni regis cuncti confiteantur; tum infinitam

nitam multitudinem existere cursorum, tabellionū, speculatorum, nuntiorum; ac montanorū præcipuè igniū, quibus rerum nouarū signa, si quæ de impro- uiso res accidant, & procul & propere dari possint: Quorum quidem omniū tantus sit ordo, & ea celes- ritas, ac diligentia, ut quod in ultimis oris imperij nouatum sit, id eodem ipsomet die, succedentibus sibi inuicem nuncijs, ignibusq̃, Susis, aut Ecбата- nis à Rege intelligatur. Ad hunc talem tantumq̃ re- gem, inq̃ eius aulam, secretumq̃ cubiculum si quis aspirare conetur, rimando & speculando singula cu- riosius, utrum ab eo initurus gratiam, an offensio- nem contracturus esse uideatur? Quæ ergo auda- cia est, nihil uereri Deum in eadē causa, in qua per- timescimus Regem? & rimari ac indagare eius ar- cana conari, quæ ne si oculis quidem intueamur, quæ & quāta sint, capere animo possimus? An non diuino oraculo est proditum, Cœlum cœli domi- no, terram uerò homini esse datam? ut cū eos fi- nes, quibus circumscripti sumus, agnosceremus, ex- tra hos egredi, & ad sublimiora euolare uelle non contenderemus. Sed de huius scientiæ inutilitate, necnon uanitate, impudentiaq̃ eorum, qui tantum sibi ex ea arrogant, etsi plura poterant dici: tamen quoniam satis multa diximus, trāseundum ad mo- res est: in qua parte maxime Philosophorum se ias- ctat oratio: audent enim (quid est autem quod non audeant?) palàm de se prædicare, idq̃ cū sermo-
h nibus,

nibus, tum in scribēdo asserere, ciuitates ab sese constitutas, leges humano generi datas, artemq; totam recte & ordine uiuendi à Philosophia & inuentam, & perfectam fuisse. Habeo hisce gratiam, magno enim errore sum liberatus: quod enim antea ignorabam Philosophum fuisse Romulum, qui hanc urbem, quam incolimus, omnium sine controuersia maximam, & multo præstantissimam, condiderit: id nunc horum beneficio scio. Velim tamen audire, si commodum est, quam in Philosophia sectam fuerit professus Romulus. Atqui huius ætati longè dispares septem illi, quorum nomen in Græcia floruisse diximus: necdum Philosophiæ uox usquam gentiū fuerat audita, cū Romulus singulari quadam, & penè diuina sapientia præditus, ex eo uide licet sapientiæ genere, non quod isti, sed quod nos suprà descripsimus, anno, ut est literis traditum, septimæ Olympiadis primo, Charopo Archōte Athenis, non solum condidit hanc ciuitatem, sed etiam optimis exornauit & legibus, & institutis, talēq; studium uirtutis iniecit, ut ab eo primo inductu, ceu aquæ percussæ in circulos solent, usque ad ultimos orbis terrarum terminos imperium populi Romani fuerit propagatum. Et quoniam argutulè uerba isti captant, in quo uno studio illorum omnis opera consumitur: teneamus stabilem distinctionem illam, rationemq; ueræ sapientiæ, quam nos antea edidimus, disiunctam ab horum inani, futiliq; sapientia: ne

tia: ne similitudine uerbi aberremus, ne'ue cum quid sapienter factum dicimus, id intelligamus Philosophè (ut sic loquar) esse factum : sed prudenter , sed strenuè, sed nauiter, ad laudem honorificè, ipsi illi qui fecerit, commodè & utiliter. Conantur isti quidem uno sapientiæ uerbo inuoluere omnia, sed resistendum impudentiæ est, atque è duabus diuersissimis unius uocabuli sententijs, sapientia nobis ipsaprehendenda est, illis sapientiæ uox quædam relinquenda : qui primùm cum de moribus ordiuntur dissertationem, hoc ueluti fundamentum scientiæ suæ subiiciunt, uirtutem in actione esse : neque intelligunt homines stultissimi damnari ab sese primo statim inceptu artem suam. Si enim uirtus in agendo consistit, quid attinuit tot uoluminibus editis, cum de eisdem præsertim rebus plures scribant, reuocare eam ad uerba, & pro ipsa uirtute, picturam quodammodo uirtutis amplexari? Scribis de uirtute, diuidis in partes, species singulas definis : disputas in utranque partem, remq; positam in factis & in uigore quodam animi naturali, ad conclusiunculas, & syllogismos traducere uis : atq; idem dicas uirtutem non in ratiocinando cerni, sed in agendo: quî potes magis tecum ipse pugnare? Tibi itaque ergo credamus affirmanti, uirtutem abs te petendâ esse, qui non uirtutem teste ipso te, sed simulachrum quoddam in tabulis descriptum obtines uirtutis. An Vlysses cui tantopere laudi datur ab Homero,

h 2 quòd

quòd mores hominum multorum uidit & urbes, si nationes easdem, quas peragrandò obuiuit, eadem maria, in quibus toties naui fracta periclitatus est, ex descriptione orbis terræ in tabula depicta contemplatus fuisset, moresq; & ritus uariarum gentium aliquo narrante didicisset, ipsam illam haud iure esset laudem à summo poëta assecutus: & nobis persuadebimus, ex uerbosis uoluminibus istorum, tanquã ex pictura, uirtutis officium & laudem nos posse consequi? Atq; hæc ego perinde loquor, ut si isti tamen aut de uirtute recte sentiant, aut in eo quod sentiunt inter se sint concordēs: neutrum horum est, & utrunq; nobis breuiter perstringendum. Virtutes uolunt esse mediocritates: Quæro ergo, quæ sit ista mediocritas? huius enim stabilem & certam si afferre queunt rationem, afferant aliquando, figantq; terminos, ac locum ipsum signent, ut ubi sit, & in quo consistat uirtus, possimus ad punctum constituere: sin autem mediocritatem istam suam inconstantem & uagam, ceu nauem fluctuante salo, anchoris quidem alligatam ne illidi ad littus possit, medio autem in spatio huc illuc decursantem, uariari moribus, temporibus, opinionibus uolunt: nec eandem ubiq; neque unam semper esse: quid nobis dat explorati atque percepti, horum uolubilis de uirtute definitio? Sic enim, si rectè recordor, inquitur: temperantem esse, uerbi causa, qui his oblectetur, quibus oportet, & quãdo opus est, & quemadmodum

admodum decet : atq; hanc uirtutem mediocritatē esse, intemperantiæ ex una parte; ea enim est, quæ se in omnes passim ingurgitat uoluptates : stupidatis ex altera, qua sensus hominis ad omnē gustum uoluptatis penitus est obtusus. Quibus autem oporteat temperantem uti, & quando, & quomodo, nihil certi nobis præscribunt. At hoc est illud, quod maxime quærebā : quo sine (autore te) nec usus uirtutis ullus, nec ratio constare potest. Item cū liberalem in medio statuūt auari, atq; prodigi; fortem, qui ignauo, & audaci sit interiectus : quid me docēt de fortitudine, de liberalitate, de cæteris partibus, membriscq; uirtutis? me dixi? quid aliū quenquam, qui quidem sit illorum scriptis & oratione ad uirtutem paratior? Nam si rogem eos, amabō hoc mihi expedite, utrum ne sentitis uirtutem sine Philosophia obtineri posse, nec ne? Quid respondebunt? Posse annuent; confecta res est, profligatum negocium : quo enim nobis iam erit Philosophia opus? Negabunt? Quid fiet tot clarissimis ducibus, optimis fortissimisq; ciuibus, quorum egregijs testata operibus, nominis gloriam uirtus, cum ipsa penē æternitate adæquauit? Horatius Cocles cum liberati ciuium suorum, quam nuper expulso Tarquinio Rege cōparauerant, uim fieri à Porfena indignè ferret, ingruentem exercitum Hetruscorum in primo ponte sublicio sustinuit solus, tandiū, quoad pons rescissus à tergo, aditusq; hosti ad urbis mœ-

nia interclusus foret : quo facto , proiecit se in fluuium , & uulnere accepto incolumis tranauit ad suos. Quæro ergo, num ille hac definitione fortitudinis à Philosophia inductus , tam memorabile facinus effecerit: an insita magnitudine animi & constantia naturali? Paulò post eiusdem Regis Porse-næ castra ingressus est Mutius, dissimulato habitu, ut eum hostem, quem Resp. uniuersa non poterat, ipse unus ferro à ceruicibus patriæ depelleret: cuius inuictam mentem cum elusisset fortuna, scriba pro Rege obtruncato, quasi repetens ab sese erroris admisi pœnas, dextram foculo iniecit, uriq; immoto corpore est passus : hic quoq; in laude, & in uirtute nō mediocre profectò aliquid, nec ex istorum disciplina, sed omnia summa spectauit. Quid Marci Curtij illa de memorabili pietate dicam? qua compulsus in terræ hiatum ingentem, præcipitem se iecit, ut oraculo obtemperans, labentem patriæ salutem morte sua sisteret. Est ea quidem accuratè à te & grauius laudata, Sadolete, hexametris haud ita multis uersibus : quorum lectione ita delector , ut memoriæ pleraq; mandarim: nec uenio ferè ad eum locum, ubi ille cōsecrat sese, deuouetq; Dijs inferis, salutem patriæ excipiens, quin misericordia fortissimi iuuenis mihi animus deliquescat. Sic enim sacris ritè peractis , inducis ipsum ad illum terræ discessum horribilem , tanquam ad aram uictimam ultro accedentem;

Ille

Ille autem (nam fata premunt, longasq; recusant
Ferre moras) coram uacuū progressus in æquor,
Ut stetit abruptæ titubato in margine ripæ
Pallidus, inq; atram deiecit lumina noctem,
Rettulit os rursum cœlo, sublataq; tendens
Brachia, in has supplex exoluit pectora uoces.

Cernitis cōstantem & certum, ne ea quidem me-
tuentem, quæ supra captum humanæ fortitudinis
esse uideantur. Audiamus quid precetur:

Dij patrij, quorum auspicijs stat maxima Roma,
Et pater omnipotens, & nostri sanguinis autor
Bellator Mauors, Vulcane, paterq; Quirine,
Vestalesq; foci, Ianicq; biuerticis ora,

Audite hæc, sanctumq; precanti aduertite numen.

Deos testes inuocat, ad quos paulò post ab homi-
nibus est discessurus. At quid nam est, quo inuocet?
Si qua (nefas) uirtutem odit crudelis Erinny's,
Ad pœnamq; uocat, fraus hinc communis abesto,
Vnus ego haud segnis dextræ, nec frigidus armis,
Hanc animā inferno umbrarū regi, & Stygijs Dijs
Deuoueo, lucemq; uolens, aurasq; relinquo.

Quid ita Marce Curti? aut quid tibi hac capitis
deuotione experēs? num domesticum aliquem uti-
litatis fructum? Nequaquam, inquit:

Tantum dura mei fugiant discrimina ciues,
Hanc spē, quā patriæ incolumis dant fata, sepulcri
Et mortis comitem posco, ac mecū ire sub umbras.

Ergo hæc te spes una consolatur morientē, quod
patriam

patriam relinquis incolumem, Quid Dñs inferis,
 quam in te esse potestatem uis? Exequamur deinceps,
 ut uideamus nihil esse tam asperum, quod frangere
 bene à natura constitutam, & maiorum disciplina,
 non dictatis Philosophiæ, corroboratam animi for-
 titudinem potuerit:

Tum uos infensi inanes, queis Romula uirtus
 Displicet, inuidiamque mouent ingentia facta,
 In me omnes conferte iras, & quicquid acerbum est
 In caput hoc quodcunque atrox, sæuumque parastis,
 Vertite ab excidio patriæ exitioque meorum,
 Ipse luam.

Dignus cuius Iouem ipsum spectantem è Capi-
 tolio caperet misericordia: et si ei tum iter illud non
 ad exitium, sed ad immortalitatem erat: Sequitur
 enim,

— Simul hæc dixit, simul astitit olli
 Conspiciusque auro, & Mafsyli pelle leonis
 Acre fremens bellator equus, quo tendere in hostem
 Primus, & obstantes incursu rumpere turmas
 Suetus erat, subitaque acies turbare procella.
 Hunc ubi terga premens, dorsoque exceptus amico
 Impulit, & notis habilem tremefecit habenis,
 Nil mortale putans, animique interritus heros,
 Visa hominis maior facies, procul ære refulget
 Sanguineo galea, & flammæ rutila arina coruscant.

Prouchor longius illecebra carminis: itaque res
 deūdum ad institutum est, Hanc præclaram imaginem
 pietatis

pietatis & fortitudinis, num è Philosophorū scholis
 putatis esse depromptā? Deprōpsisse te dices, Sado-
 lete: quanquā ego te arbitror ex poëtica facultate pos-
 tius. Verū ille quidē iuuenis fortissimus harū rerū
 tū rudis, patrij moris peritus erat, quo omnis omniū
 erat ad uirtutem & laudem contentio. Non disputo
 hoc loco quā sapienter manifestā in mortē se obie-
 cerit: impetus fuit in illo animi ad gloriam singula-
 ris, cuius fructum nullum uiuus erat percepturus:
 piē quidem & fortiter certe. Quanquam huius si-
 miles permultos quondam tulit hæc ciuitas: quos
 si Philosophorum oratio, ac non habitus naturæ
 præclarus, atque diuinus, patrijs legibus obtempe-
 rans, ad uirtutem animasset, nā haud unquam hic
 locus orbis terræ imperio domicilium præbuisset.
 Quo ergo nos adiuuat horum ea, de qua iandudū
 loquimur, mediocritas? quæ aut inutilis est, quod
 incerta: aut irridenda, quia nulla. Quid? non ne
 uosmetipsi commemorare soletis, Stoicos nobilem
 in primis, uestra etiam existimatione, uestroq; iudi-
 cio, Philosophorum sectam, subtilius certe credi-
 tam, uelut ad examen, perpendere singula: sustulisse
 funditus omnem istam mediocritatem? magnisq;
 clamoribus à Philosophis reliquis dissentire? At
 qui hi cū stirpitus euellunt ex animis nostris omnes
 affectiones, quod ijs nulla ex parte uolunt pertur-
 bari sapientem: adimunt profectò uirtuti campum
 hunc à ueteri Academia datum, in quo metādo, ca-
 i . pere

pere medium sibi ipsa locum, & ita demum profiteri se uirtutem possit. Etenim si nullus extiterit animorum motus, nulla iracundia, nulla formido, nulla molestia: si nullus flagrauerit ardor cupiditatum, intestinalumque appetitionum: sed constanter & firmiter ab omni uel tantulo motu partis in animo ratione carentis, auersa semper erit & aliena ratio, mensque sapientis: neque ea magis appulsu perturbationum huiusmodi, quam saxum fluctu commouebitur: nihil erit omnino in uirtute, quod ex mediocritate spectari debeat: sed in alia quadam facultate & ratione existet uirtus. Si uero & hos ad animum sapientis pertinere motus, ac in eis ipsis mediocritate temperandis consistere uirtutem, & Peripateticis, & ueteribus Academicis fidem habendum: alia tamen commodior, alia hosce certior flagitanda definitio est: ut si doctrinam sibi sumunt uirtutis instituendæ, sumant usquequaque, nosque certis uestigijs quasi manu deducant ad cognitionem perfectam: titubantemque istam mediocritatem ratione aliqua, tanquam uinculo constringant: ut minime illis obscuris, sed clavis & constantibus notis ea comprehendendi à nobis possit: neque eam reiiciant ad tempora, & ad occasiones, quarum nunquam est similis neque eadem obseruatio. Sin autem quæ sit in unaquaque re tenenda mediocritas, suo cuiusque consilio statuendum permittunt: uerendum, credo, erit, ne qui naturæ bono & ingenij sui uiribus perspicere poterit

poterit quid sit in quacq; re tenendum, & quatenus: idem non intelligat fugiēda extrema esse, difficileq; statuatur ieiunitatem, uitare & crapulam, cum (in quo inest uirtus) quod medium inter utrunque est, escis & potionibus uti ad corporis ualeitudinem optimè sciat. Et tamen si tanti ista est mediocritas, eaq; ab his & ritè inducta, & optimè percepta: cur ab ea tantum ipsi uerborum & loquendi profluentia discesserunt? an cæterarum quidem rerum modum, loquendi fines nullos esse uoluerunt? At ego nil uideo neque sententijs sapientium, neque communibus prouerbijis, loquacitate notatum magis esse: quorum enim est, Multiloquio inesse stultitiam: non ne horum istorum, qui sapientia uerbosius tradenda cōmittunt in decretum ipsi suum? Secētemur Philosophos, uirtutis ab his usum & disciplinā petamus, inq; eorum libris euoluendis tempus omne conteramus: ut cū uerba pro factis, uirtutem pictam pro uera fuerimus amplexi, tum in eo ipso, quod turpissimū est (quid enim est graui & sapienti uiro garrulitate scēdius?) ne in nostris quidem definitionibus insistamus: simulq; asseramus mediocritatem, simul ipsi nimij simus: ut quod & uerba sunt, & uerborum modus nullus est, utraq; re à uirtutis præstantia, & grauitate desciscamus. Atque hac definitione labefactata, quæ tanquam arx est totius horum scientiæ, corruere quidem uirtutes cæteras extructas super mediocritate illa præclara cernimus

nimus. Sed de ipsa Iustitia seorsum aliquid est dicendum : non enim hanc fortitudini , similiter & temperantiæ uolunt esse mediocritatem : sed mediocritatis potius in alio effectricem : ut si quis inferenda iniuria in superiore loco factus sit , multa dependenda ad æquum redigatur. Hic enim uero breuiter & expedite quæro, iustum natura'ne sit, an in legibus hominum duntaxat , & in opinionibus ac disciplina : si enim à natura est, quæ fuit multorū in Philosophia principum sententia, atque opinio, quodcūq; idem in primis sensit Pindarus, Legem, iniquiens, reginam mortalium omnium, & immortalium, agere ius uiolenter præpotenti manu: ea re facere se coniecturam hanc , quòd Herculem legerit, nec emptas, nec donatas Gerionis boues abegisse. Si inquam præstantioris è natura est in inferiorem dominationis, & ad eius, qui plurimum possit, arbitrium iuris tota ratio flectenda ac moderanda est: qui primum erit, quæso, iniuriæ locus? aut quæ iniuriarū dabitur actio, quæ'ue recusatio? ui enim domināte, omnis euestigio iuris regula , iniuriæcūq; sublata est: deinde sequetur illud quoque, ut legibus scriptis parere ratio nulla sit. Quid ita? quia quod è natura est, idem semper & uniusmodi est: leges uerò cum uariæ, & commutabiles, tum plerunq; inter se contrariæ: dissidentes igitur à iusto: ita si iustitiam naturalem tenere uoluerimus , quæ quidem uerè his & propriè erit iustitia, ius Quiritium legitimum, ac
ciuile

ciuile omne negligemus. Non ergo in hac humana societate, neq; in his urbium cœtibus, quos nos legibus sæpe latis, eisdemq; & correctis, & immutatis, & antiquatis, & denuo sæpe rogatis, regi, gubernariq; perspicimus, uersabitur istiusmodi iustitia: sed alios extrà requireret homines, alias ciuitates. Nos uerò qui iure scripto æqualitatē illam ciuilem retinemus, à uera prorsus iustitia, cuius exemplum in natura quærendum est, alieni erimus: & hoc Philosophus dicere audebit: ac euertere ciuitates, quas à se potissimū uult esse constitutas: Iure ergo Athenis capitis sæpe damnati, sæpe acti in exilium, & antiquitus aliquot senatusconsultis ab Italia summoti sunt Philosophi. Si uerò, id quod usu & uita magis comprobatum est, Iustum nihil habet omnino cum natura commercij, sed opinionibus totum & consensione plurium in unum cœtum cœuentium conficitur: expeditior fuerit quidem de iusto & iniusto ratio. Sed huc nihil Philosophiam conuenit aspirare: non enim ad hanc quærendam agendamq; iustitiam definitiones aut præcepta Philosophorum, sed suæ cuiq; ciuitatis leges & patrij ritus erunt cognoscendi. In hac sententia Aristippus fuit princeps Cyrenaicæ sectæ, nihil omnino natura esse iustum, iniustum, turpe, honestum: sed hæc expendi omnia & effici opinione. Sensit hoc idem Archelaus Socratis doctor: cui in Physicis consummato, atq; perfecto fides habenda est, tanquam nullam in natura,

quam proferre posset, iustitiæ speciem intuenti. At
eiusdem Socratis discipulus Aristippus: ut eandem
de iusto, iniustoq; sententiam utriusq; interiectum
tenuisse Socratem possimus suspicari: cum quod
alteri tradidit, ab altero tulerit acceptum. Quan-
quàm si Philosophiæ cum legibus, quod quidem
communis utilitatis intersit, facienda est contentio,
quid simile? ut fortem uirum exēpli causa cōstituamus,
definire fortitudinem esse habitum animi ferē-
tem aspera, & difficilia constanter, quatenus decet,
& quando, aliaq; similia multa, & legis iussa atten-
dere. Miles qui sacramentum iustum dixerit, ad si-
gna frequens esto, imperia seruato, acie ne excedito
iniussu imperatoris: ne'ue locum ab eo assignatum
deserito, nisi teli petendi, aut hostis feriundi causa;
qui harum rerū migrasset, mors pœna esto. Non'ne
à lege hac uobis fortitudo, à Philosophia oratio for-
titudinis uidetur tradi? Eodem modo in cæteris.
Est enim grauitas legis, & autoritas in iubēdo, atq;
uetando: Philosophiæ uaniloquētia in hisce rebus
omnibus ad disceptationes & uerba reuocādis, quo
esse nil potest à uera uirtute alienius. M. Cato ille sa-
piens, qui etiam ex sapientia hoc cognomen inue-
nit, antequàm in hanc esset urbē Philosophia per-
lata, cum Carneadē, & Diogenem Philosophos le-
gatos ab Atheniensibus in causa Oropi missos ad
senatū, rem suæ ciuitatis audisset orātes, perturbas-
tus eorum oratione, quàm primum censuit dimittē-
tendos

tendos: iuuentutem enim à studijs militiæ ad eos audiendos cōuersam esse, simulq; innotuit, uelut oraculo quodam, Tunc orbis terræ imperio ciuitatem hanc spoliatū iri, cum in ea esse honos Philosophiæ cœpisset. Neq; ille opinione falsus est: omnes enim postea huius præstigiatrix, & tanquam ueneficæ introitu in urbem, industriæ nerui, & disciplinæ soluti sunt: nec antè desijt è uirtute agere quisquam, quàm de ea loqui didicisset. Sed quoniam nos quidem præclarissimum nomen hoc uirtutis à cognitione hominum & disciplina nō remouemus, quòd eo è communi uita, tanquam sole è mundo sublato, nedum agendi splendide, sed ne loquendi quidem, uia & ratio ulla patere possit, quod antè fecimus de sapientia, ut exponeremus, quidnam ea esset, sententiam nostram, idem nunc conabimur de uirtute: nec tãquam è Philosophorum schola, quorum ego nec probaui unquam, nec penitus noui artē, ab ipsoq; primo limine tum nouis atq; absurdis sententijs eorum, tum iurgantium inter se, rixantiumq; clamoribus fui repulsus: sed tanquam homo in hac urbe diu multūq; uersatus, in qua quod omnibus assensientibus uerè dixerim, tota mihi & agendi ritē, & iudicandi ratio cum inuenta fuisse uidetur, tum tractata semper atq; perfectā. Hāc igitur urbem ipsam si uerè, si iure, si meritò laudibus efferentes, præstisse eam cunctis nationibus, cum consilij & sapientiæ gloria, tum uirtute atq; factis existimamus: restet omnis

Et è omnis fuerit ab illa in nostram disputationem & sapiētiae, & uirtutis species describenda. Vt enim si quis fingendi artem, aut cælandi comparare esset meditatus, melius credo & facilius à Ioue Phidiæ Olympio mentiones, conuenientias, lineamentaq; deduceret, quàm ex ullius statuarij, si opus ab illo nullū proferretur, posset oratione: Sic nobis ad indagandam, uel intuendam potius uirtutem ac sapientiam, non Philosophorum inanis sermo, sed simulachrum nobile præstantissimæ ciuitatis debet esse propositum. Quod igitur urbs Roma, uel ciuitas potius, quæ hunc murorum cinctum, quam urbē dicimus, incolebat, de principio sibi orbis terræ imperium designauit, quarumq; rerum, atq; artiū usu, atq; exercitatione illud poterat comparari, eas res omneis artesq; adhibuit in disciplinam, legibus conseruit, honore aluit, præmijs corroborauit: iccirco nos sapientissimæ ciuitatis exemplum imitati, sapientiam eam descripsimus, quæ esset earum rerum scientia comparandarū, quæ communi æstimatione hominum maximi penderentur: eas porro res diximus opes, potentiam, imperium, gloriam: quāq; in uno fortasse imperio insunt omnia. Sed quia non semper peruenitur ad summū, in quotoquoq; uirtutis & sapientiæ gradu insistere exoptandum est. Quoniam uerò non in una sapientia opis tantū est, ut à semetipsa efficere omnia ea possit, cumulatq; explere, & consequi beatissimam uitam, nisi ad eius

eius opus, munusq; quod in prospiciendo est ac præspeculando, tum finē quo intendit, tum uias atq; itinera, qua ad eum finem peruenitur, natura acris & uegeta adiungatur effectrix consultorum, quæ fuerint deliberata ratione: iccirco ad suis omnibus & partibus eam, & numeris instruendam, quemadmodum in corpore oculis manus, sic uirtus in animo sapientiæ necessariò comes & administra data est, uis & efficientia quædam in animo cuiusq;, qui quidem sit ad res gerendas natus, uigorq; & diligentia naturalis, hanc Græci *δυνάμις*, nos Latinè, & quidem aliquanto significantius, nauitatem possumus appellare, insitam illam industriam peragentem impigre prudentiæ decreta: cuius cum ingenij, consilijq; lumine societas & cōspiratio, nimirum illa chorum illum explicat, consensumq; uirtutum, quarum Philosophi duntaxat nomina, uiri fortes rem effectusq; nouere. Nam ut sese prudentia nauitasq; coniuncte uel ad labores, periculaq; dedunt, uel ad uoluptatē, uel ad pecuniæ usum, & tractationem: ita sua in quoque genere existit, elucetq; uirtus, tum liberalitas, tum fortitudo, tum temperantia. Ac ut in eodem exemplo insistamus: non sat fuisset profectò urbi huic, nec uidere, summè omnium esse expetendum cæteris gentibus imperare, nec uerò quibus id rebus commodissimè agi & confici posset, etiam pro uidere: nisi uirtutem, hoc est, nauitatem, & industriā ad agenda quæ uiderat, adhibuisset: quam quòd

adhibuit, & quidem ciuitatibus cæteris multo magnificentius, iccirco cunctarum sibi gentium peperit dominatum: imperioq; constituto, atque opibus omnium suæ potestatis factis, finem naçta quo intendebat, effudit demum ipsa ex sese plurimas, & maximas in omne genus hominũ utilitates. Siquidem ex loco & solo hoc, ex his ipsis mœnibus, non tam substructione murorum, quàm antiquæ maiestatis gloria & religionis honore munitis, omnis humanitas, omnis prudentia, leges, iura, ritus sacrorũ, cultusq; uitæ lautior, omnes denique optimæ atq; honestissimæ artes in orbem longè & latè terrarum inundauere. Hac descriptione à nobis facta, quæ iam uera uirtus sit, quo ue ea spectet, tanquam ad finem quidem, & quid sibi porro expetat, arbitror uobis esse patefactum. Nam quem isti finem uirtuti statuunt, si modo seriò id agunt, neque illudunt expectationi nostræ, est sanè causa cur dimoueamus: aiunt enim uirtutis finem, ipsam esse uirtutẽ. Quomodo hoc narrant? non enim satis quid dicant intelligo: ut uirtus sibi ipsa finis sit: hoc est, ut quærat ea, & appetat semetipsam. Quĩ fieri potest? aut cur se iam naçta, uel agat quicquam, uel molíatur ob adeptionem sui: neq; potius iam contenta, & plena conquiescat: ut prorsus nulla à uirtute, si ita se habeat res, proficiscatur actio? Nam quid ab se egrediatur aliquid operæ laborisq; propter se suscipiẽs? aut cur è complexu diuellatur suo, quo rursus deinceps
de red

de redeat ad sese, cū iam in seipsa posita & locata sit. Nam quos nos illi fines proposuimus, non illi quidē idem sunt, quod uirtus: sed uota, effectiōes, præmiāq; uirtutis, ad quæ duce & comite uirtute, peruenitur. Imperiū, & potestas, & autoritas, & gloria, opesq; ministræ earum cupiditatū, quas insitas in natura hominis, ad eum modum gubernat ratio, ut sine damno, dedecore uel optata nobis suppediantes, uitam iucundam & beatam efficiant. In hæc acie & lumen mentis omne intendit prudentia, iustitia uerò, si subtiliter tota & penitus introspecitur, nihil aliud agit profectò, quàm ut comparata sibi inter homines autoritate atq; fide, honoribus ultro, & præmijs cumuletur. Nam temperantia uoluptatibus adhibet modum: non odio quidem, aut contemptione uoluptatū: sed ut sanitatem in corpore, tranquillitatem conseruet in animo: quorum altero assequimur ut de uoluptate ipsa liquidius iudicemus, quod ipsum ad gustum eius & iucunditatem cōducit plurimum: altero, ut diutius illa, & suauius perfruamur. Vna est uirtus fortitudo, quæ declinare aliquantum à lege sapientiæ, & laboribus quancūq; tolerandis, periculisq; alacriter subeundis, parum cōmodi sui rationem ducere uideatur: uerū tanta est lux eius illius gloriæ, quam sibi habet propositam, ut quemadmodum in solis lumine colores cæteri discerni non facile possunt, sic splendor laudis perstringat sæpe non solum fortunarum, sed salutis

etiam & capitis cogitationem. Nec uerò Philosophi non in fine ipso titubauerunt : 'ijdem enim uirtutis finem, uirtutē: ijdem beatam uitam uirtuti, ut finem, statutam uoluerunt : quod quidem probabilius dictu est : aliud enim necesse est finem, aliud eam esse rem, cui is sit finis. Sed de beata ipsa uita quid sit, aut ea in quo consistat, quid est tandem ab his communis omnium sententia quasi ueritatis lege sancitum, in quod intuentes diriger eodē rationes omneis nostras, & consilia totius uitæ conferre debeamus? O' confusam & perturbatam disciplinæ rationem, quæ ueritatis notionem professa, in maximis errorum tenebris uersatur : & artē bene ac beatè degendæ uitæ se traditurā pollicens, non modò nihil certi dat, nec explorati, uerum si quid à nobis uel cōmunibus animi conceptionibus, uel ui ipsa naturæ, quæ omnibus profectò in rebus ualet una plurimū, comprehensum est, atq; perceptū, id totū cōtortis quibusdā rationibus, & fallacibus plerūq; argumentis cōuellit ultro, & labefactat: ut neq; unde deducti simus, neq; quò p̄grediamur possimus ullā in partē cōstituere. Quid inquam est ab his in re una omniū maxima, cōstituēdis uitæ nostræ finibus, hoc est, uiuendi iure, lege, more, ordineq; tradendo, fixum, firmum, ratumq; statutum, quod sequamur, quod & actionibus nostris, & cogitationibus antepoentes, ritè rectēq; uiuendi officium omne expleamus? At quāta in finibus disceptādis tumultuātū certamina

Philo

Philosophorum sunt: quanti ipsi tumultus: quomodo uariæ & dissentientes, & controuersæ sententiæ? Voluptatem finem posuit Aristippus, & eam quidem, quæ sit corporis: quod cum dulci aliquo, & iucundo motu in sensibus perfundatur, summum tum in eo existere hominis bonum. Idem uoluptatis nomen in fini statuenda secutus est Epicurus: sed aliqua in re ipsa tamen est dissensio. E contrario grauem, & seueram honestatem opposuit Zeno, eamque uitæ beatæ dominam esse uoluit: spreuit autem penitus & abiecit uoluptatem. Neque tantum inter hosce contrariarum partium duces acris pugna est, sed promouet uterque acies suas, Cyrenaicas ille, Zeno autem Stoicas: non ut disceptantium numero causa definiatur, sed ut clamores & iurgia augeantur. At Calipho tanquam iudex blandior, litis fugitans, & se utrisque uendicare cupiens, uoluptatem coniunctam cum honestate statuit esse finem: uacuitatem cum eadem doloris Diodorus Peripateticus: nam Hieronymi Rodij sententia cauta mihi magis, quam fortis uideri solet: ille enim una indolentia summi boni nomine honestanda, non tam adipisci bonum, quam uitare studuit malum. Tribus autem tanquam finibus contineri beatam uitam, & ueteres Academici, & princeps Peripateticæ sectæ Aristoteles uoluere: trinaque ab illis genera bonorum inuenta, quæ animi essent, & quæ corporis, & quæ fortunæ. Contra Euclides Megarensis, ipse quoque à So

crate, è quo Megarici Philosophi : summum bonū esse quod esset unum, & simile, & idem semper : nec tamen illud quod nam esset, satis explicauit. Quid aut impatibilitatē Pyrrhonis (eam Græci ἀπάθεια) aut scientiam Herilli, aut indifferētiam Arylstonis : aut mentem, aciem uē mentis, qua uerum cernere tur, quā Menedemus intulit, & ab eo qui sunt Eretriaci appellati : in ponēdis finibus commemorem. Qui quidē fines innumerabiles penē Philosophis sunt : n̄demq; direpti sæpe Philosophorum inter se contentionibus, sæpe ultro citroq; statuti, rursusq; commutati, neutiquam adhuc finium regundorum stabile iudicium, nec certam mentionis notā tenuerunt : quoq; magis tantas istorum insanias mirere, possessione neq; uberi, & ea admodum litigiosa : at ita fusæ sunt eorum & discrepantes, ac ferē ad libidinem, contentionis studio, de his ipsis finibus bonorum effutitæ sententiæ, ut nemo mehercule sit, neq; ita orbatus animo, neq; oculis usq; adeo captus, atq; conniuens, qui in quancuncq; partē temere fortuitoq; se mouerit, non incurrat in aliquam earum, quas de summo bono tractant Philosophi, opinionem, atq; sententiam. Quæ igitur grauitas, qui ordo, quæ constantia : quid in Philosophia ista uestra tale atq; eiusmodi, ut in ea accuratius uersati, aut quietiores animo, aut consultiores iudicio atq; scientia, moribus ornatiores, sapientia instructiores simus. Et hæc ea est (si Dijs placet) quæ nos se erroribus

ribus omnibus erepturam, in uiam ueritatis indu-
cturam, ad bene beatęq; uiuēdum erudituram pol-
licetur. Simile uerò est eximere erroribus, & his ma-
xime inuoluere; offerre dubitantibus lucem ueritas,
& clarissimis ultro rebus omnium tenebras du-
bitationum offundere: tradere uitę beatę rationē
ac regulam, & in ipsa constituenda beata uita, sum-
ma cum miseria & pertinacia, turpissimis altercatio-
nibus, & maximis contentionibus conflictari. Quę
quoniam me bona ex parte uobis demonstrasse ar-
bitror cuiusmodi sint, & quām inania ab his, qui se
magistros uolunt, & doctores sapientię esse, non
suscepta solum, uerum etiam inconstanter, leuiter,
contentiose, nequiter & disputata & tradita: deq;
parte hac, quatenus quidem pertinet ad mores, fa-
tis est dictum: quę reliqua sunt breui iam sermone
percurramus. Restat enim pulchella & concinna,
non iam illa matrona, sed meretrix Dialectica: De
qua quid est cur iam multa dicamus? Etenim ea si
corpus suum haberet, & propriam subiectam huic
arti materiem in rebus & in natura positam, in qua
se uersaret, formamq; sibi inde alicuius certę excu-
deret disciplinę, esset fortasse aliquid, quod contra
eam seriò dicere possemus. Nunc autem quid aga-
mus? suscipit illa iudicis, disceptatricisq; personā.
cuius munere decuriat? Nullius: neq; enim in albo
prætoris ulla mentio: & suscipit tamen, uerum impu-
denter: neq; adeò huius indignitate, impudentiæ
stomachum

stomachum ut hominibus, sed ut risum moueat: ueri se & falsi ait esse disceptatricem, & de ea re laturā iudiciū. Quos inter: num Medicos, si quid incidat (ut assolet) controuersiae de genere morbi, & num mittendus sanguis, aut alius ducenda sit? hic uerū illa diiudicabit, aut falsum. Quo pacto? aut quid ad eam attinet de medecina loqui? An inter Mathematicos? quid eius ullam in partem interest, puncta, numeros, lineas, sonos, motus, interuallaq; cognoscere? nam cum duabus cæteris, quas nos paulò antè perstrinximus, Philosophiæ partibus, si quid haberet communis, aut commercij, nequaquam esset illa ab his partis suæ proprijs insignibus, & ipso nomine discreta. Quid ergo est? nudata rebus omnibus, exclusaq; doctrinis, ut est nimium ambitiosa, & in numerum procedere cupiens, format sibi ipsa atq; fingit articulam quandam uerborum scilicet, & eorū nouorum, ut aliquid saltē hoc pacto esse uideatur: terminos, propositiones, syllogismosq; fabricans, & syllogismorum figuras, tum simplicium, tum (ut uocat ipsa) connexorum: quas etiam memoriæ uidelicet, & docilitatis causa carminibus cōpræhēdit, sane quàm lepidis. Atqui uideamus quā rem agat: Omne animal est substantia, omnis homo animal. Quid ad te dialectice, homo animal sit nec ne? hoc Physices est, & eius disciplinæ, quæ rerum naturalium profiteatur notionem. Nihil, inquit: sed exempli causa infero, ut argumenti uis intelligatur.

telligatur. Ergo tu serias res exempli causa affers, ut friuolas amplectare? Agam, inquit, alia ratione. Omne, b, est, a : Pulchrè : Omne, c, est, b : Probe : ergo omne, c, est, a. Admodum. O libidinē effræ natam garriendi : tantūne est hæc perplexa uestra cognoscere? quorum perceptio difficilior est propter nouitatem nominum nimirum, & contortionem argumētorum, quàm sit cuiuslibet alterius scientiæ integra disciplina. Similia sunt illa : Si est, a, est, b : non est, b : non est ergo, a. Ne sit sanè. Quid enim quoniam quidem à ludo literarum discepsimus, nostra quasi refert? Verūm tu grauis planè iudex, ueri disceptator & falsi, quid habes dicere, cur tua ista ars aliquid ueri nos doceat, cū sit inanis tota, nec habeat quicquam in natura rerum consistens, quo tanquam fundamento niti possit? falsi uerò uitandi, quī nos efficiat cautos, cū si quid tamen agit, illud potissimum agat, ut captiosis & fallacibus conclusiunculis, si cui quid perceptum est, & comprehensum, id inuito, ingratiscū extorqueatur? Vnde enim Sorites? unde mentiēs? unde illud Corneum, præclara sophismatum, & cauillantium argumētorum nomina? nam ignauam rationem (ἀργὸν λόγον uocant Græci) optimè in hos conuenire non negarim, ueluti è qua omnis eorum uita dependeat. Sed quæro, num statutū etiam nunc naus illa, X X X. remorum in portu Athenis, qua uectum in Cretam Theseum Minotauro interempto, septem illos nos

biles pueros in patriam reduxisse incolumes fama narrabat, sit ne ea ipsa, quæ fuerat Thesei: an prorsus alia: cum quod ex ea uetustate deperierat, deinceps fuisset resectum? Quin & alia hisce consentanea: Est ne tacentem loqui: nequaquam: at cum lapidem loqueris, tacentem loqueris: acutè: quid ergo uetat lapidem esse te, etsi loquaris tamen, sed quæ lapidibus digna? Item illud: Est ne sanctè iurantem peierare: nihil minus: atqui iuratus se peieraturum, ubi peierauit, sanctè iurauit: igitur tu, qui ueri tibi arrogas iudicium, horum testium, qui ut sanctè iurent, libenter peierabunt, fidem dicto adiungendam putabis? Nam mehercule illud festiuum: Quo Coriscum uerberari uidisti, hoc Coriscus uerberabatur: Næ: at uidisti oculo Coriscum uerberari. Cernitis ut plena omnia ineptiarum sint, nihilq; ab hac disciplina solidum, nihil sit firmum: neq; aliud quid tamen, quod in usum prudentiæ aliquem, aut scientiam nos inducat, sed in ea laqueos tantummodo & tendiculas confici captandis ingenijs adolescentulorum: quibus si qua antea ordine statuta sunt, mox destituantur: ut Penelopen telam suam ferunt quantum texuisset interdiu, tantundem nocturno opere retexentem. Eadem cum essent nomina rerum causa indicandarum reperta, primum ipsa rebus omnino prætermisissis, in ipsis nominibus uersandis, ac citro ultroq; torquendis operam omnem sumit. Deinde etiam alia sibi fingit, tanquam ex argilla, & luto, quæ

to, quæ non rerum nomina sint, sed nominũ. Tum autem toto isto in genere usque eò illudit tortuose, atq; ambigue, usque eò sibi in eo uehementer placet, si quem inexpectatò, & præter concessorum sententiam captionibus includat, inopinantemq; irritat, ut casum pro casu, genus pro genere, tempus pro tempore, nomen pro nomine permutet sæpe, & apertissimè atq; impudentissimè cauilletur, puerilem q; sibi ex hac re gloriolam & laudem intempestiui acuminis quærat. Quapropter melius Zeno, quanquam & hic Philosophus, attamen ille melius, quàm aut Menedemus, aut Stilpho, ipsi quoque probati in Philosophia & clari, quorum in his sophismatis & argumentorum fallacijs omnis industria consumpta est. Etenim Zeno cùm dialectico argumento esset ab adolescente quodam laceratus, atque uti responderet efflagitaretur: Amabò noli, inquit, ad studia me puerilia reuocare. Stilpho autem tantum in his nugis posuit, ut capta per uim patria, cùm admoneretur à propinquis, si quid de bonis suis seruatum uellet, extra urbem ut efferret, responderit, omnia se bona sua secum ferre. Quanto hic arti suæ plus autoritatis contulisset, si illaqueasset argutis Demetrium Regem, ne quod ille instituerat, Megaras urbem opulentam militibus diripiendam permetteret. Nam Menedemi fertur illud in primis: Alterum ab altero alterum est: prodesse, alterum à bono: igitur prodesse non bonum. Dis

gnus cui Rex Macedonum Antigonus, qui in hunc Philosophum plurima contulit, nunquam quicquā prodesset: ut quod non erat bonum, eo illum ne afficeret. Sed hæc friuola, eaq̃ innumerabilia, quippe in queis tota ista ars & studium est situm, prætermittenda nobis sunt: finisq̃ faciendus, tum quòd satis iam de tribus partibus Philosophiæ disputatū est, omniumq̃ inutilitas & uanitas demonstrata: tum ut ne in idem ipsi uitiū garrulitatis incidamus, quod in his repræhendimus. Reliquum nunc est, idq̃ extremum, ut uideamus quid afferant, non dico isti, qui Philosophiæ palàm omnem honorem tribuunt, qui sine illa arbitrantur nullius esse momenti uiuere: nam hi quidem sua stultitia dupliciter mulctati sunt, & quòd ineptissimis in rebus tempus omne suum, & studium disposuerunt, & quòd ne hoc ipsum quidem intelligunt, se olèum (ut dicitur) & operam perdidisse: Sed qui cū tantum Philosophiæ non deferant, affirmant tamen non esse illiberale hæc ipsa cognoscere: scientiam enim omnem in partem bonorum esse: ita Philosophiæ studium, ut nihil magnopere prosit, tamen nihil obesse: Qui mihi uidetur non ea loqui, quæ sentiūt: sed quia si plena manu collaudet Philosophiam, sibi bilum metuunt, cū cupiant dissimulare, uereri ne ipsi quoq̃ ad Philosophorum numerum irrisione uulgi aggregentur, si qui præsertim prouectiore iam ætate hoc faciunt: nam pueris & adolescentulis (dicam

cam enim ingenuè quod sentio) hæc quidem concessa sit potestas Philosophos tantisper sectandi: omnis enim illam ætatem decet ludus, quod non grauitas ab ea, non consiliū postulatur: quin habet aliquam indolem ingenij, aliquod specimen ingenuitatis ista ipsa in pueris, ut balbutiendi, sic etiam Philosophandi grata intuētibus naturæ incohatio: uerum ubi grauiiores anni accedunt, diesq; ipsa aliam uitā affert, alios mores postulat, perseverare in his rebus, & ludicris exercitatiūculis serias res posthabere, summæ non solum ignauix, uerum etiam amētiæ est. Etenim nobis posita est ante oculos uita cōmunis, quæ nos incendere habeat studio, & cupiditate earum rerum assequendarum, in quibus cunctorū studia & cupiditates flagrare cernimus: Sunt honores, qui specie ipsa pulchritudinis & dignitatis alliciūt ad sese animos nostros, & aduocāt: Sunt imperia, in quibus constituti qui sunt, cū Deorū quasi similitudinem uideantur referre, fruuntur cultu multitudinis, & magnitudine potētix suæ: Sunt opes atq; diuitiæ, subsidium uitæ, ornāmētum ocij, uirtutis atq; prudētix necessaria supellex, solatiū in laboribus, auxiliū in periculis, quarum qui potiuntur, ij neque ullam ipsi frustra suscipiunt cupiditatem, & cæterorū quoq; cupiditatibus liberaliter inferuiendo, studia sibi hominum, & uoluntates ad quodcunq; libuerit perficiendum, adiungūt. Est autoritas, atq; exiliuatio, quam qui in ciuitate sua

l 3 obtinent

obtinent, fide sibi apud omnes comparata, facilius & tutius, tanquam inobseruatis uestigijs, quò intendint, possunt peruenire: est deniq; tota illa domus splendida, in foro illustris, ad populum gratiosa, in senatu grauis ratio uitæ, atq; descriptio: quæ cum sibi in omnes partes congrua & consentanea fuerit, cumq; ea se ingenij, & fortunæ munierit apparitione, ut beneuolis gratiam, inimicis metum possit afferre: neq; aut propter debilitatem animi in aduersis rebus succubuerit, aut propter insolentiam in secundis immoderatus fuerit elata: sed eum semper tenerem, eam constantiam adhibuerit, ut neq; animo unquam labefiat, nec consilio: admirabilem quandam speciem profert summi & excellentis uiri, qualem nos omni iandudum sapientiæ laude decoratum esse uolumus. Atq; hæc tot atq; tanta, quæ qui hominis prima & præcipua esse negant, homines mihi non uidentur ipsi, cum optabilia ipsa per se, & suapte ui expetenda sunt, tum hoc magis inflammant mentes nostras ad appetitionem sui, quòd omnium studijs atq; uotis uehementissimè conquiruntur: incitatur enim omnes profectò similitudine & æmulatione quadam ad id certatim agendum, in quo uideamus ab omnibus certari, ut in eo maxima prorsus uis naturæ eluceat. Quis enim in stadio currentibus subito cæteris, non continuo ipse animatur ad cursum, ut etiã si se tenere uelit, nerui nihilominus uenæq; turgescant, & tanquam signum expectantes

tes pulsu uegetiore ad profiliendum concitentur? Quis aut in lachrymis circumstantium siccos, aut in plausu & lætitia merentes tenuit oculos? cui quāuis timido & insolenti sonitus tubarum, & Martius ille clamor prælium poscentium militum, non perfundit animum alacritate quadam, ut ad eadem arma tractanda cupiditate tacita inuitaretur? Quem aut proximorum metus ad formidinem, aut fiducia ad spem nō iniecit? ac ut breui compræhendā, id quod in fidibus lyræ uidemus accidere, ut si cōtentæ duæ eisdem tonis fuerint, alterno pulsu resonent inter se: sic cū in omnibus rebus, quæ natura eadem communicant, tum autem in hominum genere, in quo præcipue, tanquam in pulcherrimo & nitidissimo speculo natura cernitur, magna uis est similitudinis, eaq; maxime naturalis: cui qui repugnare conantur, nec eodem cursu ferri, eadem cum populo opinione atq; sententia se permittunt regi: ij Philosophiam non sapientiæ, ut ueritas ipsa cōuincit, sed amentitiæ & peruersitatis amplectuntur rationem. Quod si hæc ipsa, quæ modo numerauimus, eximia atq; ampla, lusu quandoq; & temeritate fortunæ nō ad industrios & laboriosos homines, sed ad desides inertesq; deferuntur, non tantam tamen affert iucunditatem, ut si sint eadem studio & labore quæsitæ: mirabile enim est quantopere his delectemur, in quibus ipsi elaborauimus: & quā omnis magis nos afficiat uoluptas, quā aliqua molestia antecessit,

tecessit, & sollicitudo : uel quia omnis boni mali'ue,
suauis ac molesti iudicatio, in comparatione quadā
est : uel quòd bona nostra, quæ ingenio autore no-
bis ipsi effecimus, chariora multò nobis sunt, quàm
quæ à fortuna accepimns : nihil quidem natura ut
sit fructuoso labore iucundius: sed quem in hac tan-
quam acie populari, in tanta uarietate & copia rerū
amplissimarum , quibus quidem intermixtæ sint
difficultates non mediocres, odia, pericula, contem-
tiones , inuidiæ , aptè & nauiter uersari oporteat:
profectò cernitis cuiusmodi eum esse necesse sit,
acrem, firmum animi, consilio cautum , celeres mo-
tus habentem , non solùm mentis atq; ingenij , sed
corporis etiam atq; oculorum: ut tectus ipse & ab
omni parte munitus , quatenus quidem expediat,
inimicis pericula , amicis commoda creare possit.
Protrahamus nunc medium in forum consuetudi-
nemq; communem Philosophos istos uestros , ut
quam Philosophiæ debeant gratiā ab ipsa instituti
& aliti possimus coràm cōstituere. Ac primum hos
nō tanquam ex equo Troiano claros duces, sed uti
narrāt eos esse , qui sub terram aliquādiu fodiendis
metallorum uenis detenti sunt, squallenteis & hor-
ridos , sordida barba capilloq; , cadauerosa (ut
ille inquit) facie esse reperietis , qui primo sui aspe-
ctu moueant admirationem , ut percontentur ho-
mines inter se , illud'que Plauti habeant in ore ,
Vnde est ista auis ? Et hercule , quoniam quidem
auium

aiuum mentio facta est, non maiores ad noctuam mirantium auicularum, quàm ad hos barbato concursus uulgi fiunt. Expectatur itaque ab his nouum aliquid & inusitatum simile habitus & coloris, & eius quam gerunt frontis, ac supercilij. At illi tanquam modò de tenebris extracti, ne rectis quidem oculis diem & lucem intueri ualentes, perinde ac cunctos paulò antè habuerint participes inaniū curarum & commentationū suarum, effutiunt euestigio aliquid, aut de scientiarum uarietate inter indoctos, aut de prudentia inter fatuos, aut de iustitia inter eos, quorū nunquā futurum est iuris partem ullam administrare: & hætenus quidem feruntur, quod ad uultum quidem attinet, atq; uocem: nam odore corporis non sunt ferendi: uerum ubi ipsis uicissim aliquid earum rerum tractandum est, quas uita postulat communis, usque eò apparent absurdi in omni genere atque incompoliti, tantosq; risus concitant, ut conuerso quodam, & præpostero modo, quæ paulò antè Philosophi species contractionem animi & tristitiam denunciabat, ea nunc rursum pro ridiculo & delectamēto omnibus sit. Quæ propter mirari satis non queo, quid Platoni in mentem uenerit, Socratem doctorem suum sic uituperare: siquidem in Gorgia quasi gloriari uidetur Socrates, quòd cum tribus sua prærogatiuam ferret, atque ipsi sorte contigisset, ut custos esset suffragiorum, punctorumq; numerum ad consilium defer-

m ret, se

ret, se quòd aptè id facere nesciuisset, totius populi risum concitauisse. Atqui riserint sanè tunc illi haud iniuria incitiam ineptiasq; Socratis: ego quòd ipse de se hoc prædicet, & uelut gloriâdo commemoret, non solùm risu, sed maxima irrisione dignum puto. Quanquã quid in uno insistimus Socrate, cùm turbam legamus Philosophorum tantum sibi assumpsisse licentiæ, usque adeò à pudore, à modestia, à communi usu hominum, ab ipsa lege præscriptioneq; naturæ abfuisse, ut sine ullo rubore, uelut animo abalienati, ea palàm in foro ipso, in cœtibus hominum facere & perpetrare auderent, quæ nos in conclusis, & semotilissimis cubiculis uix audeamus: quæ ne aperte commemorem (equidem pudore impeditor) cum illi homines planè lauti atque mundi ita porrectis digitis ratiocinando concluderent, nihil esse re uera turpe, nec cum rubore agendũ, quod necessitatem uel etiã causam haberet naturalem: ita quorum nos propè parietum ipsorum ac noctis conscientiam formidamus, in ijs illi & populum, & lucem uolebant habere testem. Verùm sit hoc genus quoddam ineptum & rude Philosophorum, qui sine mente, sine ingenio, lingua tantum uolubili & concitata, nec quando, nec quatenus, tanquam qui in tenebris uixerint, nec uerò quid, aut etiam apud quos pensiquicquam ducentes, ludos se maximos reddunt hominibus: ijdem omnium prædæ & contumeliæ expositi: quod quidem non iam liber

beri hominis, sed abiectissimi mancipij est existimandum. Sunt alij odiosiores, qui dum uolunt concin-
ni esse, atque urbani, primum isti ipsi Philosophiæ
(cuiusmodi eacunq; est) non uerè, neque ex animo,
sed ostentationis causa dant operam; domi otiosi
& desides, in compitis lectioni dediti, semper ali-
quid librorum in manibus habentes, commurmu-
rantes ipsi secum, & tanquam ad ea quæ legunt
acrius animum attendant, nunc collum subrigen-
tes, frontemq; & supercilia conduplicantes rugis,
tanquam scopulo in legendo, sic ambiguitate aliqua
offensi, mox continuo exhilarati, nutu significantes
quod obstructum aliqua difficultate fuerat, ingenio
esse patefactum: interdum constrictis & compressis
buccis admirationem in uultu deformantes, quasi
præclarum aliquid inuenerint tum maxime atq; di-
uinum: sæpe cogitatione tacita in obtutum oculo-
rum defixi, suffurantes interim oculis, si qui fortè
prætereuntium obseruet se, & diligētius intueatur;
ijdem in circulis & corona, ubi ad disceptandum
aliqua de re est uentum, contentione pertinaci tan-
tis rem agentes clamoribus, ut facilè appareat, nihil
esse tam diuersum, neque tam discrepans, quàm à
uita Philosophorum orationem: Hi ipsi cum se ad
familiaritates hominum, præsertimq; locupletum,
& ad conuiuia sodalitiolorum dediderint, tanta in
utroque intemperantia feruntur, ut nec poscendi
unquam modum, nec liguriendi finem statuunt; sæpe

etiam madidi uino & semisomnes è conuiuio aufe-
rantur : atque dum se urbanos uolunt ostendere,
quòd nulla falis neq; facetiarum norunt condimen-
ta, aut apertè & asperè maledicunt absentibus, aut
in præsentis turpiter & conuitiosè inuehuntur: nec
uerò lucello aliquo oblato non omnia perpeti ani-
mum inducunt, quæ fœdis assentatoribus, & leui-
bus parasitis sæpe sunt proposita : ut non oblitos
uultus solùm, colaphorumq; messem perferāt ube-
rem : sed aulas quoque interdum, quemadmodum
poëta ait quidam, in caput suum commeare patian-
tur. Horum nimirum turba fores Dionysij tyran-
ni refertæ fuerunt, cùm ille nescio quibus proposi-
tis pecuniolis, Philosophorū undique greges atque
examina, & in his tanquam Regem Apium Plato-
nē ad sese illexisset: ubi tum, quæso, erat uirtus, ubi
continentia, ubi illa tantopere laudata & expetita
libertas? quam prodebant ultro ipsi profectò, cum
se ex Sophocleo carmine in domum potestatemq;
tyranni, hoc est, in seruitutem dabant : nempe tota
in libellis relicta domi, in queis omnis semper Phi-
losophorum sapientia fuit : nullam eius partem in
animo, nullam in uita gerebant: itaque per abusum
contemptumq; tyranni, adigebantur subire ea, &
perpeti, quæ ne liberis quidem mulierculis ducere-
tur tolerabilia: ut & procumbere in faciem adoran-
tium gestu, & in cōuiuijs nudī, uel muliebribus sto-
lis induti saltare cogerentur : quanquam erant ex
eo numi

eo numero, qui iocis & cauillis eleuare conarentur tantam illam impositam Philosophiæ contumeliã. Tertium genus est eorum qui ingenio acutiore, animo aliquantum sublatiore à natura instructi, cum se de principio uel parentum culpa atq; incitiam, uel fortuito casu aliquo ad Philosophiam contulerint, multumq; in ea tēporis, optimamq; partem ætatis consumpserint, nec sapientia sibi ex ea comparata, quod uerbis & syllogismis sapientia non traditur: nec usu, more, studijsq; hominum satis perspectis, propterea quod in illo inani studio occupati, serijs rebus operam dare nequiuerunt: ubi tanquam è somno expergefacti referre instituunt sese ad ciuiles occupationes, cōsuetudinesq; communes, profundunt ex se subito agmen ueluti omnium cupiditatum, furentesq; ambitione importuna, ac summum in locum quoquomodo ascendere instituentes, non callide neq; dissimulanter (non enim astute apteq; consilia exequendi, aut artem ullam nouerunt, aut modum) sed uastè, atq; perfractè percurrunt, omnia cædibus, incendijs, rapinis: nihilq; sibi faciunt reliqui, dum ad eum perueniant, quem cupiditatum duntaxat exatiandarum causa appetierint principatum: ut quidem nulla usquam maior, quàm ab hoc genere hominum perniciēs atq; calamitas liberis ciuitatibus & Rebus pub. inuecta noscatur. Declarant hoc ueteres Græcorum historiæ, quæ ex eorum numero multos, quos sapientium nomine insignes fuisse

diximus, ciuitatibus suis cladem & seruitutē prædicant intulisse: Quorum in primis unus ē septem Perriander Cypseli nobilissimam ferē totius Græciæ altam urbem Corinthum tam sæua tyrānide tenuit oppressam, ut posteaq; cædes ciuiū maximas fecisset, matronas palàm die festo atq; solenni omni mūdo muliebri perornatas dispoliaffet, sacra profanaq; omnia ad suum commodum libidinemq; conuertisset, miserit ad extremum nauim onustam puerorum nobilium, qui execandi donabantur, nescio ad quem barbarum Regem: quæ postrema nimirū ciuitati illi calamitas incidisset, nisi eos ipsos pueros in nauigando Iunonis Samiæ numen, & religionis illius cerimonia liberaffet. Quid illas deplorem omnium artium ingenuarum inuentrices Athenas: quæ cū ē satis amplo potentiae & dignitatis gradu in humilem locum essent deiectæ, cū multas domi seditiones, multos exterorum hostium incursus, plurimas inimicissimorum Regum & finitimorum Philosophorum iniurias pertulissent, nunquā tamen adeo grauer affectæ, neq; tantis sunt exitijs & calamitatibus afflictæ, & perditæ, quàm cū ab Aristone Philosopho in acerbissimam seruitutem fuerunt redactæ: qui homo sceleratus & impius, omniq; bellua longè immanior, cū stupris, & uinefaria omneis ferē familias nobiles dehonestauisset: ciues qui uirtute atq; ingenio præstare uidebantur, exilio partim, partim cædibus sustulisset, omnium bona

bona atq; fortunas prædam suam duxisset, permisisset seruis Thracibus & barbaris possidendam urbem, ad extremum obsessus ab exercitu Romano, L. Sylla Duce, maluit ciuitatem omnium clarissimam interire secum direptione atq; incendio, quam unus ipse cedendo liberam incolumemq; relinquere. Hæc sunt præclara, atq; eximia Philosophiæ istius uestræ documenta: sic ab ea uirtus hominibus & sapientia traditur: tales ab ipsius cura atq; lacte prodeunt alumni, qui nec rectam ipsi uiuendi rationem ullam tenent, nec si ad potestates & ad imperia efferantur, cæteros sinunt tenere. In hac deniq; ars est, & ratio, & consilium, & autoritas bene, beateq; uiuendi: è qua qui progrediuntur, & se dant in conspectum, aut tarditate ignauiaq; perridiculi sunt, aut scelere atq; malitia nobilitantur. Quanquam quid ego de uiuendi ratione Philosophiam insector: cum ipsa se mortis commutationem esse dicat: utinam quidem esset, sicut in Cleombroto Ambraciota fuit, quem ferunt lecto Platonis libro de immortalitate animi, uale soli dicentem (ut in Græco epigrammate est) in mare sese ex altis rupibus præcipitauisse: eandem uiam tenerent cæteri, ne' ue commutatione tam diu turna indigerent, discederent aliquando è medio nugaces isti, suaq; nos obtundere loquacitate desinerent. Sed fortè expectant illud eis dum obijciam, in quo maximè gloriari sunt soliti, infestam in primis & inimicam religioni esse istorum artem. Quod
mediusfis

mediusfidius non faciam; neqꝫ ullam in hos ex aris atqꝫ templis, sed suis ipſorum, & proprijs ex criminibus inuidiam colligam: ſimul locum haud præbebo oſtendi ingenij, inqꝫ eo gloriandi, quaſi longè & multò plus uideant ipſi, quàm nos faciamus, qui maiorum inſtitutis & legibus facilè acquieſcimus: iccircoqꝫ ob eam rem imperiti ab his, & idiotæ appellitamur. Sed per Deos immortales, erit ne aliquis ad ſpes magnas inſtitutus, qui in hac uaniſſima, inertiffimâqꝫ ſcientia ætatem rectè conteri putet: qui ueras arteis, ſtudia grauia, occupationes illuſtres, quibus ad cōmoda uitæ & ad dignitates aditus ſit, poſtferendas eſſe ducat fictis & commētitijs iam non illis rerū, ſed uolitantium quarundam opinionum ſimulachris: fora relinquat, ut domi ſit deſes: conſuetudinibus uiuentiū careat, ut cū mortuis fabuletur: ea quæ ſunt, & quæ extant in promptu, ingenio indiſtriæqꝫ parata, cōtemnat omnia, dum quæ uel nuſquam ſunt, uel ſi ſint, utilitatem tamen aliquam hominibus aſſerre non poſſunt, inani ſtudio conſectetur. Quæ ego omnia tibi in primis, Sadolete, prouidenda eſſe cenſeo: illudqꝫ maxime uidendum, ne in tua iſta Philoſophia, quam ceu ſororem oſculari unanimem uideris, longius progrediare, quàm ut pedem poſtea referre facilè queas. Non ornat ea homines, ſed cōtaminat: nec inſtituit ad uirtutes bonum ingenium, ſed corrūpīt. Quòd ſi tu neqꝫ amicorum monitis, neqꝫ eis, quas ſuprà aduerſus

aduersus eam attulimus, rationibus facile cedis: etiam ne spem tuorū, quæ in te uno posita, & opinione principum uirorum, quæ de teipso suscepta est, falli omnino sines? Habes optimum & clarissimum uirum patrem tuum Ioannem, qui cum ingenij memoriaque gloria, tum iuris ciuilis singulari quadam scientia cum præstet omnibus, haud profecto tantum in te erudiendo studij & laboris impendisset, neque te à se diuelli fuisset passus, nisi huius urbis, & curiæ cōmercio, honores domum te, & fortunæ præmia referre uoluisset. Habes patronū, ad quem te applicuisti, summa grauitate, summa sapientia, genere, honore, existimatione, copijs, sacri senatus principem Oliuerium Carrapham Pontificem Neapolitanū, qui admirabili qua est præditus prudētia, docere te possit, quæ sit uia ad nomen & ad decus in ciuitate obtinendū maximè accōmodata: ut tibi exemplum degendæ uitæ idoneum quærenti, grauior non sit autor requirēdus: quæ si ualere cuncta apud animū tuum sines, neque sanis eorum, qui te diligūt, & fidelibus consilijs obstrues aureis tuas, & auguror mecum certus, & tibi spondere non dubito, magnū in te ornamentū domui & familiæ tuæ, magnum amicis commodū, ciuibus tuis præsidium paratum fore. HIC ILLE finem cum fecisset, nosque aliquandiu admiratione defixi silentium teneremus: GALVS, Quid est, inquit, Sadolete, ecquid tibi Phædrus uidetur, non subita neque improuisa, sed & accu-

n

rata

rata & præmeditata oratione ad evertendam Philosophiam accessisse? Quantum in illo copiae, quantum neruorum fuit? Equidem intelligo magnum tibi onus respondendi esse impositum, neque adeo, quod tam difficile sit pro Philosophia, quam contra Phædrum dicere: sed tollendum id tamen, ne & nostra summa, quæ nunc pendet cum maxime, per te destituatur expectatio, & tu cam, cui te totum dicasti, quamque ego etiam te autore complexus sum, hoc maxime necessario tempore prodas Philosophiam ac deferas. T V M E G O, Id, inquam, Galle, tacitus mecum nunc meditabar: nam si aliàs unquam in dicendo fuit aliquid Phædrus, hodie mihi uisus est se ipso longè fuisse superior: nec uerborum solum ubertate, & sententiarum, quibus omnis eius referta & locuples redundauit oratio: sed quod earum Philosophiæ partiū, in quas inuectus est, omniū mihi uisus est esse peritissimus. Itaque aut desistamus aliquid contra, aut longius nobis spatium ad cogitandum sumamus. M I N I M E, inquit Citrarius, neque ego à te patiar deteriorem locum, quam nunc sit, Philosophiam tuam deduci: quæ si tua hac subita dictione defensa, & aduersus torrentem orationis, qui modo ab ore Phædri profluxit, stabilis & firma retenta fuerit, erit causa, cur de illius grauitate & præstantia amplè existimemus: sin aliud offenderit, ascribetur tempori & inapparationi culpa, non Philosophiæ. Quamobrem aggredere quæso, & da te in certamen, in quo tibi, ut ego quidem

dem sentio, nec turpe est uinci, & perhonestum uincere. **CONANDVM** nobis est, inquam, quando quidem uos ita uultis. **VOLVMVS**, inquit Gallus, nec est aliud quicquam, quod uelimus potius. Sed quoniam æstus increbrescit, nec satis iam nobis aduersus solis uim in harum arborum umbra præsidij est, ad uillam censeo reuertendum: ibi inferiorem ad partem spatium est, locusque opacior, & exedra, huic diei temporis, & nostro ualde opportuna sermoni. **HOC** sic omnibus cum placuisset, paucis sanè passibus ad uillam nos recepimus.

IACOBI SADO.

LETI AD MARIVM MAF

feum Volaterranum de laudibus

Philosophiæ, liber

secundus.



NON me præterit, Mari Volaterrane, fore non paucos, qui, cum ego tantum laboris, tantumque operæ in optimis artibus & studiis ponendum putem: plusque statuam multo in his, quam in ambitione honorum, & in conquirendis opibus esse elaborandum: grauius hoc meum consilium institutumque repræhendant: ad eamque me curamatque cogitationem potius opinione sua uocent,

ut cū in foro atque curia uersari cum aliqua auctoritate coeperim, iamq̃ à summo principe consilijs fuerim interioribus adhibitus: eam uitæ sectam studiosius persequar, per quam ad spem honoris, ac fortunarum munitur uia, aditusq̃ facilis ad amplissimam dignitatem comparatur. Quæ quidem horum repræhensio uehementius me moueret, si non aut ab leuissimo autore proficisceretur populo: aut si uiderem, id quod minime intueor, eos qui ita egerunt, ac popularibus hisce opinionibus obsecuti, per summos labores, maximasq̃ contentiones ad concupitos sibi honores tandem euecti sunt, cum eodem populo in gratia & in existimatione bona esse. Nunc autem cū intelligam id quod omnibus est apertum, quid de istis sentiant homines, qui dum splendorē honoris duntaxat sibi ante oculos proponunt, ad eumq̃ unum studio omni inflammati feruntur, illud nequaquam attendunt, quod erat hominibus ueri honoris cupidis maximè animaduertendum, quanta indignitas sit, quanta abiectio animi, ac leuitas in affectando, & ambiendo: non est causa, opinor, cur magnopere conturber uulgi sermonibus, aut cur de ea animi constantia firmitateq̃ decedam, per quam neq̃ pecuniæ augendæ, neque honoribus consecrandis uolo esse addictus. Non dico hoc loco quod mihi & cæteris, qui accuratè uoluerunt attendere, perceptum planè, obseruatumq̃ est: eos esse plerumq̃ horum ambitiosorum exitus,

ut nemi

ut neminem uel paulò temperatiorem, mediocris status sui, minusque inuidiosæ fortunæ pecciteat. Quanquàm fortibus quidem, & bonis, & sapientibus uiris, qui in quòq; honoris gradu collocati sunt, & positi, nullam maculam uult afferre oratio mea: sed tamen illud euenire ferme cernimus, ut nullo sit quàm istorum, qui domesticæ inanes & uacui dignitatis, externam aliàm quandam & aduentitiā dignitatem tantopere expetunt, cum angoribus animorum, tum uolubilitate, incōstantiaq; opinionum ac uolūtatum, uita perturbatior. Mihi uerò aliò rationes meas dirigenti, semper id uerissimum esse uisum est, quod est à sapientissimis proditum: re scilicet familiari antea commodè constituta, eisq; paratis fortunæ subsidjs, quæ & ad subueniendum necessitatibus uitæ idonea sint, & ab inuidia omni infamiaq; remota, maiorem quandam nobis tum demum & longè diuiniorē sequendam esse uitæ rationem, per quam adniteremur, non ut honorum insignibus è turba emineremus, sed ut ad Deum proximè adiungere nos possemus: quod tamen nobis natura est ita insitum, ut qui in aliam partem ac rationem sua studia contulerunt, optimum hi sibi hominis statum inuidisse uideantur. Etenim quis est (modò idem sit qui ingenio uegetiore à natura præditus, animum quoq; habeat ab his terrenis sordibus liberum) cui cum cœlum in conspectu sit, & hæc cœlestia, quæ tanta mente ordinèq; gerun-

tur, ut eorum solennem, æquabilemque in summa uarietate constantiam, nulla hominis ratio arte imitari queat: non præclara ipse cupiditate accedatur ad cognoscendum, & considerandum: cumque rursus aciem animi in hæc humana deflexerit, tumultumque aspexerit uagæ huius, ac fluctuantis, & cum tempestatibus omnium perturbationum ceu conflictantis uitæ, non alium sibi potiore uiuendi ordinem, alia consilia rerum gerendarum esse ineunda putet: quod quidem iam est proprium sapientiæ munus, cuius adipiscendæ Philosophia sola magistra est, aut nullo alio pacto ad eam potest perueniri. Quanquã de his quidem quæ ad Philosophiæ officium pertineant, decem eius artis diuinæ ac præcellentis utilitate, atque præstantia, satis à me explicatum esse arbitror in hoc secundo libro, in quo illa à me defensa est, cum esset oppugnata, & reprehensa à T. Phædro. Quem quidem ego hominem, Mari, ualde dilexi semper, idoneumque existimaui, cui hanc potissimum personam imponerem, atque eas tribuerem in sermonibus nostris partes, ut esset ille disciplinæ nobilissimæ accusator. Erat enim (ut tute nosti ac optime omnium quidem: quippe qui illi & municipio, & propinquitate, nonnunquam etiam contubernio solebas esse coniunctus) ad obtrectandum discretis, & lacerandum aliquantum inclinatio: nec tam maleuolentia ille quidem, mihi ut uidebatur, quàm ardore quodam animi, & celeritate ingenij: quibus
rebus

rebus fiebat, ut nullum paulò facetiùs, idemq̃ asperius & mordacius dictum facillè posset continere: cæteris quidem partibus officij, suauitatis, diligentia, cum optimo quodq̃ erat comparandus. Quas propter nos, quando ipse agnosci ex suis scriptis haud ita iam potest: quæ etsi multa, egregiaq̃ contulit, orationibus maximè pangendis, quas antea pronunciaffet: illa tamen nescio quo pacto effusa post mortem eius, distractaq̃ euauerunt: iucundū etiam nunc nobis amici nomen, ab obliuione hominum uindicare sumus conati. Quod idē, si uita superpetet, de eis omnibus studiose faciemus, quorū nobis in amicitia ipsorū, ac familiaritate & uirtus animi cognita, & spectata erga nos uoluntas fuit. Genus quidem orationis, Phædrīq̃ cōsuetudinem dicendi, quantum assequi potuimus, in his libris expressimus: Quos ad te, Mari, potissimum ut mitteremus, cum ingenium tuum, ac uirtus, excellensq̃ scientia artium optimarum, tum suauissimi mores tui, dulcisq̃ illa coniunctio & studiorum, & animorum, quæ summa inter nos beneuolentia nos astrictos reddit, suauis mihi uehementer atq̃ hortata est: amo enim te in germanum modum, tuoq̃ in nomine libentissimè acquiesco: teq̃ in primis habere cupio meorum studiorum & cognitorem, & participem. Quare attende, quæso, num tibi in his libris Philosophiæ uis ac potestas satis diligenter à nobis uideatur esse exposita. Vt enim ad porticū sub uilla
peruenimus,

peruenimus, atq; in Xysto, loco sanè amceno id tēporis & salubri, aduersi confedimus omnes, cæteris in me unum intuentibus, sic ego exorsus sum:

QV A E fuerit Phædri nōstri in accusanda Philosophia dicendi uis, qui orationis cursus, quæ copia, nil me referre nec cōmemorare attinet: ipsi uos paulò antè iudicium fecistis: quippe qui eius orationem non uoce laudeq; uerborum, quod ipsum admodum iam uulgare & usitatum, sæpe etiam temporis causa suscipitur & simulatur: sed admiratione potius tacita fuistis profecuti. Nam, ut laus illorum sit quæ quamuis rectè atq; concinnè, ex communi tamen, & penè quotidiano more fiunt: sic admiratio eorum, quæ hominum usu, ac facultatibus uidentur superiora. Sed quò huius uel oratio plenior, uel ingenij uis acrior, & uehemētior uobis uisæ est, hòc mihi grauius onus respondendi est impositum. Ad eas enim partes repentè defendēdas accedere me sentio, quas hic ut oppugnare atq; euertere facilius posset, assidua iandudum commentatione se instruxit: in quo neq; ingenium illius apparationi defuit, nec tempus ingenio: cū ego utroq; horū nunc quidem deficiar. Nam & tardior sum ad excogitandum, quæ sint accommodata causæ, & propter subitam, improuisamq; dictionem imparatior. Accedit illud prætereà incommodum, quòd ei succedo statim orationi, quæ nō præteruolauit aureis uestras, sed in uestris animis & mentibus penitus insedit.

dit. Vt enim Corybantas ferunt numine illo percussos, etiam posteaquàm tibiam canere desierint, gerere usque tamen illarum in auribus concentum, & ad earum modos incitari; Sic non dubito, quin quāvis tacente iam Phædro, tamen eius ipsius in intimis mentibus uestris & uigeat adhuc, & loquatur oratio. Hanc uim dicendi fuisse in Pericle, qui princeps Græciæ habitus est, æquales temporum illorū poetæ deprædicant: ut cū concionaretur, non solum tonare, fulgere, cedere fulmina: sed post dictionem etiam aculeos relinquare in animis auditorum putaretur. Quid ergo est? prodamne causam, & deseram? Minimè isthuc quidem: non enim uiri foret boni, & eius qui se iam diu Philosophiæ addixerit, idcū certo iudicio atque explorato fecerit: subito ab illa discedere, atque eam summo illius tempore destituere. Sed sequar officium, opinor, uestraeque unæ autoritati, qui hoc me deposcitis, obtemperabo: cū præsertim sperem atque confidam, uos onus hoc mihi quod imponitis, eosdem etiam esse subleuatuos. Nam si in aliqua populi concione, aut corona cuiusquemodi, dicendū mihi cōtra Phædrum esset, nā ego uerbo hīscere non auderem: non quòd diffiderem causæ: quid enim uerius, quàm & laudare & defendere Philosophiam, cuius usus atque tractatio Deorum uitæ est similima? sed quia concitatos iudices extimescerem. Nunc uobis duobus doctissimis, prudentissimisq; iudicibus, in pace &

o silentio

silentio suum obtinebit locum ueritas. Itaque Phædro nostro eloquentiæ palmam dabimus, ut suum ueritati honorem non negemus: Est enim ueritatis tum noscendæ, tum agendæ etiam atque nauandæ studium profectò sapientia. Vtemur enim hoc in Philosophia uerbo, tametsi in eo Phædrus faceret nos admodum, & crebrò eluserit. Sed qui duas hæc res arcta naturæ cognatione inter se coniunctas, eloquentiã dico & sapientiam, quando utraq; res perfectio quædam, & altera mentis uirtus est, altera orationis, diuellere primus & separare est ausus, siue Leontinus ille fuit Gorgias, siue alius quis: maximã is profectò sementem malorum omnium in humano genere iecit. primus enim docuit, id quod omnium rerum est deterrimum, mentiri uirtutem: aut si omnino uirtus mentiri non potest, nec falsam eiusmodi personam sustinere, instrumentum certè primarium uirtutis, ipsam interpretem animi & mentis orationem, falsos suscipere uultus coëgit: ut cum à uera sapientia non esset profecta, assimulatione tamen, imaginẽq; sapientiæ, quàm plurimos in fraudem & in errorem induceret. Ex quo linguæ cordisq; dissidio, ingens hæc, quam cernimus, in omni uita secuta est perturbatio. Fraudes enim & malitiæ, omnesq; fallendi & ementiendi artes hinc exortæ, hinc sese in hominum studia, moresq; profuderunt: omnis inquam hinc falsitas, omnis circumscriptio, & insidiæ omnes, ab hoc primo erroris fonte

fonte manauere. Nam cum ex duobus inter se quasi de regno decertantibus, alterutrum in nobis dominum constituere nos oporteat: siue rationem uelimus tanquam aliquem Deum, siue cupiditatem ueluti belluam quandam: non tantum in eo mali est (quanquam nec mediocre illud est malum) uerum tamen non usque eò id pollet ad pestem, perniciemque communem, oppressam plerumque & perditam meliorem iacere partem, insolentem autem cupiditatem in animo dominari: quam illud est & horribile, & exitiosum, linguam saepe instructam cupiditatum fallacijs, perferre foras mandata legationesque, perinde ut à sancto & legitimo intus rege, ac non ab improbiissimo tyranno, ipsa uidelicet cupiditate, missa sit: quæ æquitatis & ueritatis fucatis coloribus, calidas suas machinationes depingat: quo labefactatis bonorum consilijs, eorumque fracta & imminuta auctoritate, aditum sibi ipsa ad omnium fortunas patefacere possit. In quo mirari satis non queo, non intelligere eiusmodi homines, cum tantum uirtutis simulatione proficere se putent, quanto se plus arbitrarentur uera uirtute esse profecturos. Sed ut ad naturam redeamus: nil potest esse tam copulatum inter se omni necessitudine, uinculoque naturæ, neque tam consentiens, quam aut cum affectionibus animi uultus, aut cum uoluntatibus sermo: ut enim lætitiæ moeroreque intestinos frons atque oculi, sic uoluntates & consilia lingua continuo refert: quæ si

officio fungi ritè atque legitimè, suumq; planè illud munus tueri uelit, non solùm uerè & incorruptè consilia mentis, atque decreta reddat necesse est, sed qualia etiam illa intus sunt, talia ea foris proferat, atque exponat: quod in utro defecerit, dedecus ibi statim existit, & claudicatio: hoc est, non integrum illa, sed mancum sui officij munus assequitur. Itaque & ampla magnificè differere illa debet, & copiosa largè, & alta sublimiter, tenuia subtiliter, misera dolenter: deniq; ut quo habitu intus ornatus animus, & quibus copijs instructus fuerit, talem eum extrà efferat, & repræsentet oratio. Hanc speciem eximiam perfectæ, absolutæq; sapientiæ, quæ in potissimis uitæ nostræ ducibus, mente, orationeq; uides licet, & in eorum inter se concordia conspirationeq; consistit, si quis facilem esse & in promptu omnibus putet, nempe ille fallatur: Omne enim præclarum rarum: & quæ communia cunctis esse possunt, nunquam in magno honore sunt habita. Sed est tamen in ea consecranda, & adipiscenda ordo quidam, ac modus: ut si ad summum perueniri non possit, in eo quod quisque adeptus fuerit, cum quadam prudentia, moderationeq; uersetur: neque se amplius ostendet, quàm quoad idoneus est præstare. Hoc enim qui sic egerit, ut totam sapientiam non possideat, non minimam is tamen illius partem fuerit cōsecutus: intelliget enim quid sit illud, quod in quacq; re est decere: quod unum est præcipuè sapientiæ

sapientiae omni propositum: nosse enim, & tenere quid in quaque re deceat, maxime proprium putatur esse sapientis. Qui ergo ad summam sapientiam omni studio contendens, aliquo in inferiore gradu restiterit, & mediocritatem in ea fuerit assecutus; uel cum in alterutra illius parte se exercuerit, alterius factus sit expers: ut si quis in cogitando quidem eruditus ac prudens, idem in eloquendo infans atque imperitus sit: aut contra, cum abundet orationis copia, magnarum tamen rerum cognitionem non teneat: is si finibus se suis continuerit, nec in ea parte studuerit se iactare, cuius sit imperitior: sapientis ille laude & exultatione non carebit. Non enim exiguas in sapientiae laude possidet partes illa uirtus, quae à temperatione, & modo, praclaro quidem uocabulo, est appellata modestia. Ac ut in aedibus atque templis, etiam si magnificentia absit, saepe tamen opere in paruo decor nihilominus elegantiaeque artis apparet: Sic angustioribus interdum hominum ingenijs, exiguisque facultatibus, sapientiae aliquis radius potest illucescere. Si qui non maximis fuerit ingenij opibus praeditus, is cohibuerit semetipse, nec ultra id quod potuerit, progredi erit conatus. Verum ut horum numerus existat aliquis, qui mediocriter effecti sunt sapientes: ad illam quidem summam & absolutam laudem accedere sapientiae, paucis adhuc est datum: quorum nimirum nomen colimus tamquam consecratum immortali

litati. Ac ut omittamus de eis loqui, quos non ex ipsorum scriptis, sed aliorum testimonio cognitos, & Græcæ, & Latinae nobis indicant literæ: ut de parente totius Philosophiæ Socrate, de Anaxagora, de Empedocle, Democrito, Pythagora, Varro-
ne, Nigidio, alijsq; compluribus: isti ipsi quos no- uimus, quos mirantes legimus, quos in manibus semper habemus, Platonem dico, Aristotelem, Theophrastum, Ciceronem, & reliquos, qui ad ho- rum principum emulationem studia sua contule-
runt: quales tandem nobis hi, & cuiusmodi uiden- tur? non ne eximij, non ne admirabiles, non ne un-
dique atque in omni parte summi, atque perfecti? An aliquid est in illis præterea quod requiramus? quorum ut tabulae egregiè pictæ luce atque die, sic istorum incredibilis rerum prudentia, orationis lu-
mine longè sit illustrior: qui ita implent sensus, ani- mosq; legentium docendo, & disputando, ut neq; ad intelligentiam rerum quicq; mens nostra, neque ad iucunditatem animi amplius auris requirat. Sed; ut coeperam dicere, qui ad hoc fastigium ascendere nequiuerunt, si iidem, in suo genere quisque, mode- sti prudentesq; extitere, non caruerunt parte meri-
tæ laudis. Qui uerò cum totam sapientiam perse- qui neglexissent, & ad captandas magis opiniones uulgi, quàm ad ueritatem doctrinae se exercuissent, maiores tamen quàm erant, uideri studuerunt: hos uideo ferme in duo genera esse distractos. Alij enim
rerum

rerum omiffa & pofthabita cognitione, in uerbis tantum ipsis, & in quodam loquendi artificio elaborauerunt: Alij præ studio percipiendæ doctri-
næ, excolēda oratione minus sunt exercitati. Quo-
rum utrorumque non mediocris error, & ad inſpi-
ciundam ſapientiæ uim, obtuſa atque hebes mens
eorum extitit: quanquàm priores quidem illi ma-
litiæ, inſcitia poſteriores magis ſunt arguendi: hi
enim non tam aſtuti mediufidius, neque tam uafri,
qui diuinarum rerum atque humanarum notitiam
profefſi, à cultu & elegantia ſermonis longiſſimè
abſunt, quàm incomptè & ridiculè in liberaliores
cœtus ſeſe dent, ipſi uidentis: in eo quidem admo-
dum nobis odioſi, quòd libris quotidie edendis, &
conſcribendis, ſemetipſos nobis, & opinionibus no-
ſtris intrudere conantur, uimq; quodammodo ſen-
ſibus ſtudent afferre, quò de illorum bene ingenijs
exiſtimemus: in quo imprudentia labuntur: non
enim unquam mihi, neque cuiquam præterea (ut
ego quidem arbitror) ingenuè inſtituto perſuadere
poterunt, ut cùm barbara & lutulenta utantur lin-
gua, genusq; ſcribendi adhibeant inconditum, &
illiberale, iudicari debeant Græca aut Latina eru-
ditiōe eſſe præditi: cùm neque id, quod ſapientiæ
proprium eſſe diximus, uidere in re quaque quid
deceat, in ipſo primo aditu ſui conatus intelligant.
Nam quæ horum iſta eſſe ſapientia poteſt, quæ pri-
ma egreſſione è penetralibus ſuis, ut primum in

conspectum hominum proditura est, turpiter sese in oratione ipsa dare, progrediq; indecore ne animaduertit quidem? Atque hi tamen, cuiuscemodii ipsi sunt, minus multo sunt nocentes, atque malefici, quàm illi, qui ex ornatu solo, copiaq; uerborum, doctores se sapientiæ populis sunt professi: maiore enim ij perfidiæ instrumento ad euertendas hominum fortunas parati accessere. Rursusq; hi dupliciter: aut enim cum se ad Rempublicam gerendam contulissent, propter ubertatem, elegantiamq; sermonis, fide sibi prudentiæ atque uirtutis in populo falso comparata, ciuitatibus suis pleriq; exitio fuerunt. Quo in primis malo, & rhetorum orba ueris sapientiæ dotibus eloquentia, nō illæ modo tot præstantium ingeniorum eductrices Athenæ, sed cuncta olim Græcia planè concidit. Aut qui non tantum habuerunt roboris, ut se regēdis & moderandis hominum cœtibus iudicarent idoneos, ij sordidiorem etiam fallendi & decipiendi artem secuti sunt: ut cum per omnem uagarentur Græciam, adulescentes ad se uanis pollicitationibus allicerent, quòd his se notitiam gubernandarum ciuitatum, & illam præcipuè artem dicerent tradituros, per quam scirent illi & tenerent, quemadmodum causa inferior (sic enim loquebantur) dicendo fieri superior posset: hoc est, quemadmodum falsitas ueritatem, æquitatem autem atque iustitiam iniuria ipsa superaret. Sophistæ hi nominabantur: quorum quon

quondā multitudine & coetibus uetus Græcia abundauit, nomenq; eorum aliquandiu in magno honore est habitum. Sed cū illi ciuiliū rerum peritiā, uirtutisq; & uitij profiterentur notionem: ipsi uerò moribus atq; uita à contemptissimo quodque nil differrent, spreti postremò ab omnibus, atq; illusi, dederunt locum Philosophiā uituperare uolentibus, ut id maximè secundo populo facere possent: in quos extrema in oratione, me quidem perlubente, inuectus est Phædrus: qui si has huiusce modi Philosophias falsa appellatione in nomen sapientiæ temere inuādentes, sumpsit sibi uituperandas, adscribat licet ad iudicium suum opinionē etiā meam: sin autem id molitur, & agit, ut omnino abiicienda sit, & repudianda Philosophia, non est nobis committendum, ut desertam illam & indefensam relinquamus. NANQVE hercule, inquit ille, hoc etiam restat, ut plureis iam pro una Philosophias habeamus. NON ITA res sese habet, inquam: nec tu istam multitudinem artibus ipsis attribueris, sed facultatibus potius eorum, qui dissimiliter illas tractant, atque suscipiunt: omnis enim ars una in sese, simplexq; semper & eiusdem modi, non eodem tamen modo adhibetur ab omnibus: quod ne longè abeas, in tua ipsius arte potes, Phædre, perspicere: cū enim te oratorem nobis præbeas grauem, atque magnum, quod idem facere nituntur in hac ciuitate

permulti, quid causæ est, quòd te dicente concurrimus omnes undiq; attendimus, admiramur, tuæq; eloquentiæ fulmina quasi extimescimus: quod sentimus idem usu uenire nobis in Camillo Porcio: est enim ille ex tua & disciplina, & amicitia tibi in hac laude geminus, ac propè par. Laurentium autem Colaianum, & hunc stultissimum omnium hominum Pionem, qui obsoletis, & horridis confectandis uocabulis, laudem in his dicendi se affecuturum putat, etiam eludimus, atque aspernamur. Num tu hanc uarietatem & discrepantiam arti, ac non hominibus ipsis attribuis? Omnis ars, Phædre, quæ quidem digna hoc nomine sit, una ipsa in sese, & sui undique similis, dissimilitudine illorum qui eam tractant, dispares aliquando suscipere uidetur formas: cum ita, ut sit, uariè ex ea ingenia afficiantur, ab alijsq; rectè exerceatur illa ars, ab alijs perperam: & in his munus ipsa egregiè tueatur suum, in illis minus id possit. Quod cum similiter in principe artium Philosophia eueniat, quid obstat, quin tollatur omnis controuersia: & cum ego Philosophiam ueris laudibus extulero, tu malos Philosophos iure redarguendos ducas? NEQVA QVAM hoc sic abierit, inquit: ego enim illā ipsam accuso, quam tu necessum est confiteare, tot huiuscemodi nebulosum & nugatorum esse ueluti matrem. HOSTIS, inquam, Philosophiæ es, Phædre, asperèq; nimium exerces inimicitias. Sed quoniam uideo te nullam

omnino

omnino uocem æquis auribus admittere, quæ nos
 modo Philosophiæ cum honore aliquo pro-
 nunciet: aggrediar ad defendendum, si pauca antè
 de meo officio fuero præfatus. Etenim ego cum plu-
 rimum te amo, idc̃q; merito tuo: multa enim signa
 uicissim tu mihi, neque ea obscura, amoris tui erga
 me tribuisti: & in ijs hoc recens, quod Curtianum
 meum carmen humanissimis uerbis profecutus es:
 Tum mihi illud in te usu uenire experior, quod ul-
 lius unquam uix familiaritate æquè sum delecta-
 tus, ac tua: nihil enim fieri te uno aut amabilius pos-
 test, aut falsius: quod si ita non esset, tuum tamen
 excellens ingenium, tua egregia uirtus, humani-
 tas, literæ, non solum meam, sed omnium tibi be-
 neuolentiam facile conciliarent. Quod autem me
 sæpe & multum monuisti, ut dimisso Philosophiæ
 studio, ad grauiores res tractandas me conuerter-
 rem: probasti mihi in eo tu quidem studium & uol-
 untatem tuam: consilium uerò & iudicium non ita:
 non enim si tibi omnia amicitiae officia præstare de-
 beo, quod faciam equidem semper, & faciam sedulo,
 iccirco tuis etiam opinionibus annuere sum ob-
 strictus: assentatoris esset, non amici, sic agere: ti-
 biq; ita obsecundare, ut cum meam rectè ac commo-
 de tutari possem, tuam potius sententiam sequerer,
 atq; amplexarer. Illud cū dolore aliquo fero, quod
 uideo esse in hac causa necessarium, ut mihi tu oppo-
 situs sis, quem refellere coner: in quo tu meliore

multo conditione usus es, qui tibi Philosophiā quā oppugnares, non me ipsum proposuisti. Quamobrem si redarguendi causa acrius agere interdum fuero coactus, quæso ut bona tua cum uenīa facere id mihi liceat : non enim tui refellendi, sed eius confundendæ rationis gratia, quæ ex ore tuo modò Philosophiam ut euerteret, equis uirisq; connixa est : uehementius mihi nonnunquam erit agendum: quod tu in bonā partem accipies, mihiq; pro ueritate, tanq; pro patria propugnāti, hanc curam, & hoc studium etiam ascribes laudi. Illud item peto, si contigerit aliquo loco, ut mihi de re quapiam interrogandus sis, id quod uides in tam graui causa fore faciendū, facilem te mihi in respondendo, & clementem præbeas. **I N T E R R O G E S** licebit, inquit, sed parcius : nam ego audire continentem orationem malo. **G E R A M** tibi morem, quoad potero, inquā. Sed ut nonnunquā opus est in ea disputatione, quæ ex contrarijs partibus defendatur, inueniendi ueri causa interrogare, & interrogari, refellere, & refelli, quòd aliter sæpe nihil expediri, nec ad exitum commodè deduci potest: Sic illud non solum Philosophia, uerum hominis etiam mediocriter eruditi prudentia indignum, utrumuis istorum cum iracundia, aut cum pertinacia efficere. Enimuero unde ego nam potissimum ordiar? aut quod initium meæ orationi sumam? an ab eo sapientiæ uerbo, in quo tu omni cum sale, cum Priscos illos septem, tum Philo

Philosophiam omnem eludendo exagitasti; in quo etsi nos mirabiliter delectasti, uel uarietate rerum earum, quæ à te ipso proferebantur, uel lepore sententiarum: tamen, quod pace dixerim tua, fluctuare interdum: cur suscipis magis & copiam, quam aut distinctionis aut ordinis cupida, ferri tua mihi torrens uidebatur oratio. QUID ITA, inquit: aut quæ nam fuit ista fluctuatio? QVIA, inquam, cum temeritatem illorum, & arrogantiam reprehendebas, qui primi sapientium sibi nomen, & professionem usurpassent sapientiæ: nimiumque sibi eos, & quod ferri non posset, appetiisse dicebas: ea re quidem, quod (ut aiebas ipse) nihil sit omnium rerum neque in cælo, neque in terra sapientia diuinius: mirabilem quandam rem profecto, & cæterarum omnium longè maximam, huic sapientiæ uerbo constituebas subiectam. Rursus ubi eorundem leuitatem & inscitiam irridebas, qui professionis suæ titulo inflati, & tumidi, præstare cæteris se arbitrantur, propter illud unum sapientiæ nomen, quod in reliquas omnes etiam abiectas & ignobiles conueniret artes, fabrorumque sapientiam in eo & Homerum testem adducebas, nihil huic uoci relinquebas subiectum, quod æstimatione ulla uideretur dignum. Ita cum duabus disiunctissimis in rebus, una eximia atque primaria, altera porro abiecta atque ignobili, eodem sapientiæ nomine uterere: quid mirum si fluctuare mihi oratio tua, nihilque

stabile & firmum in animis nostris constituere uis debatur? Atqui ignosco equidem: sunt enim ista rhetorum: pompam quærunt & gloriam: nectam exactam in audientium animis earum rerum scientiam, quas tractant, quàm exigui temporis postulant opinionem: non enim docere propositum illis est, sed mouere. Itaque nullis certis in dicendo finibus continentur: quocumque fusiores, & abundantiores semper sint, ut litigiosi uicini terminos, sic isti uocabula, rerum notas confundunt: cumque unius uerbi inuolucro plura complectentis, in quam commodum est, usi fuerint partem: tum ubertate & copia, numeroque bene compositæ & iucundæ orationis in auditorum animos influentes, uim sæpenumero afferunt ueritati. Contra hæc omnia Philosophia, rem ipsam aperit, ambigua distinguere uult, inuoluta euoluere: hoc ipso tamen imbecillior, quod ut ferè acerrimæ inter sanguine coniunctos eueniunt dissentiones, sic ista ab ea, cui germanitatis uinculo coniuncta fuerat eloquentia, deserta, non modò minus habet splendoris ad illustrandam, uirium ad confirmandam uirtutem: sed eius ipsius eloquentiæ inimicissimos impetus uix ab sese potest propulsare. Quo utique dissidio (ut antè dixi) magna hæc, quam cernimus, in omni uita exorta est perturbatio. Quod si mea uox unquam quicquam habuerit autoritatis: omni ope adnitar, ut omnibus suis partibus & numeris perfecta, integracumque sapientia

tia, ingenuis mentibus restituatur. Ergo in nomine sapientiæ ambiguus Phædrus: Quid in ipsa re? Descripsit enim ipse sapientiæ quoque formam ueræ illius atque eximiæ. Audio: Sed tamen eam totam è uulgi iudicijs esse aptam uoluit. Vnde tantum repente in uulgo autoritatis? Nam & hoc loco quaero, Dixeras illos septem, si populorum suffragio dicti essent sapientes, non habere eos causam iure gloriandi, propterea quòd stultorum de sapientibus iudicium nullum existeret. Quo pacto igitur qui de sapiente nec iudicare quidem possunt, horum iudicijs niti & opinionibus, ea sola iudicabitur ritè sapientia? Sic enim (si memini) positum abs te est: Quicquid in bonis numerarit populus, & quæ studia cunque magni fecerit, in his necesse esse apud prime uersari sapientem, si uelit esse sapiens: nec eum à populi studijs, & uoluntatibus uel tantulum discrepare. Quid habet igitur præclari ista sapientia, si nil aliud ipsa sit, quàm uulgi opinio? Nam nos quidem cum notionem sapientis, quam in animis nostris natura inseruit, ipsa nominis uoce excitati, cogitando pertractamus: proponimus nobis longe præstantius quiddam, quàm quod assequi, quo uel aspirare uulgus ipsum facile queat: speciemque eam in animo informamus, in qua nihil temeritatis insit, nihil festinationis, nihil inconstantiae: quæ quidem uulgi & populorum uitia sunt notissima. Neque est quisquam uersatus inter homines, & qui ipse

ipse modo sibi notus sit, qui aliam formam sapientis mente concipiat, quàm hominis grauis, atque firmi, nequaquam pro temeritatibus uulgi sua studia regentis, sed ipsius ultro moderantis, ultro cohibentis populum, si populus autore eo uti ad capeffenda rerum gerendarum consilia uelit, sin minus, sententiam tamen suam præstantis, non populi. Quod de Phocione claro Athenis uiro memoriæ proditum est: qui cùm reclamante populo Atheniensi, dissuasor fuisset eius belli, quod post Alexandri mortem aduersus Antipatrũ, & Bæotios, duce Leosthene, gestum est: resq; initio prosperè Athenas renuntiarentur, essetq; ob eam rem in lætitia, & gratulatione ciuitas: interrogatus, ecquid illa sic cecidisse molestè ferret, quæ contra eius sententiam suscepta essent: Nequaquam, inquit: uerũ tamen ego in sententia mea nihilominus permaneo. Satis declarauit eo responso uir prudens, non ex fortuitis euentibus sapientiam, neque ex leuitate, iactationeq; populari, sed ex grauibus, certisq; consilijs pendendam esse. Et sanè quidem illius exitus belli Atheniensibus extitit calamitosus. Atqui talis nobis ob animum uersatur sapiens, qui frænis sæpe quibusdam quasi contineat populum temere ruentem in ea, quæ concupiuerit: non qui conuellatur ultro ipse, & auferatur à populo: qua specie quidem in sapiente, nihil nec cogitari potest indignius. Tu contrà, nouo de sapiente iudicio uteris, nihilq;
neque

neq; rectum, neq; graue existimas, quod non à populo prius probatum, adscitumq; sit : ut tibi in hoc paulisper assentiar (nam quid uerius sit , mox uidero) Agè sanè, Sit munus primum sapientiæ studia uulgi persequi: Rationem atq; tempus huius fungendi muneris quæro : non enim semper (ut tu ipse inquebas) modo eodem conuenit. Quid ergo? cum uulgus semper uarium incertumq; sit, atque ut in euripis , & fretis undarum assidua est cōflictatio, fluctusq; fluctum identidem & impellens , & reuocans: sic temeritas populorum incitata & uolubilis, contrarijs ueluti æstibus frangat sæpenumero , impeditq; semetipsam : quod erit populo tempus iudicij faciendi , ferūdæq; de sapiente uiro sapientiæq; sententiæ? Tum ne, cum repentino aliquo studioꝝ motu incitatus, ad appetendum aliquid feretur effusus? An post, cum repræhensio errore, uel etiam sola mobilitate pœnitens, repudiabit illud quod paulò antè intenderat? In hac inquam uarietate , & in his errantibus populi opinionibus & studijs, utrum tandem quasi æstum sequens sapientia, ius suum & nomen ritè obtinebit? ut de Q. Fabio Maximo legimus, eo qui bellum cum Annibale gessit. De quo Ennius:

Vnus qui nobis cunctando restituit rem:

Non ponebat enim rumores ante salutem:

Ergo magis magis atq; uiri nunc gloria fulget.

Atqui gloriam ille istam fuerat adeptus, quod à

q populi

populi uoluntate dissentiens, fortunam Reipub. in discrimen prælij non adduxerat, ob eamque rem ab eodem postea populo sapiens est iudicatus. Quæro igitur, quando sapiens? cum populi & militum incitatis ad pugnandum studiis obsequebatur; & quia minus illorum cupiditati obsequebatur, suæ famæ & dignitatis detrimentum accipiebat? At non hoc modo pendeat è uulgi opinionibus sapientia: An post, cum cunctorum uoce & concursu maximè laudatus est, quòd leuia uulgi iudicia contempsisset, suumque ipse iudicium fortiter retinuisset? At hoc posteriori populi iudicio, id quoque est ab eodem populo iudicatum, nequaquam esse sapientis imperitæ multitudinis studiis obsequi, nec consilia sua ex populi opinionibus moderari. Ita inanis in omnem partem sapientiæ iudex est populus: minimeque idoneus, cui hoc tantum munus committatur: atque id decretis non solum grauium atque prudentum, uerum etiam suis. Verum hoc fortasse haud ita uult Phædrus, neque omnibus ipse populi scitis sapientiam adiungit: sed ea sola in hanc laudem recipit, quæ non mobilia & uaga, sed firma constantiaque sunt, nec ullam unquam uicissitudine permutantur: ac ne multis, ad ea bona nos reuocat stabilia atque rata, quæ semper populus maxima iudicat bona, diuitias, honores, imperia, uoluptates: huc enim conuersam omnem uult esse sapientiam, ac in his potissimum appetendis, cum populo eam ait consentire oportere: munusque

nusq; sapientis præcipuum esse; ut referat is ad sese omnia quæ concupiscat populus; partesq; suas in ijs longè principes esse studeat, neq; alium esse arbitretur, qui illis potiatur; se ipso digniorem. Quod si ita sit primum, quî conuenit, eundem populum, quem temeritatis & inconstantia plurimarum rerum arguas, atq; condempnes, repente una certa in re, & ea quidem maximâ, idoneum statuere sapientia autorem? Quis hoc sic dijudicauit? Quis distinxit? Quis has ueluti prouincias sic partitus est? ut ex eodem autore quæ prodeunt, horum partim sapienter decreta existimari debeant, partim stultè. Deinde, si hæc semper fixa de diuitijs & uoluptatibus populi est opinio: quomodo tu non frustra illam nobis imaginè ante oculos effinxisti, qua paratum ad subitos excursus sapientem constituebas: cum quidam eum ueluti Scytham aliquem, aut Nomadam, cui nullum usquam certum domicilium esset, tanquam in rheda collocasti; ad profiliendū attentum: ut simul atq; populus nouo æstu aliquo cupiditatis efferuescens, delabi quopiam, confluereq; cœpisset, eodem ipse præcurrere & aduolare niteretur? Quid inquam opus fuit hac mobilitate, & hoc tanto excubandi, uigilandiq; negotio? & cur non protinus sapientem in ipso opum & uoluptatum regno constituissti, fruentem pacato animo eis rebus, in quibus fructus sapientia præcipuè cernitur, nulla eiusmodi ancipiti cura distractum, tanquam rescissurus alia

quando populus decretum suum, & de huiuscemodi bonis sententiam mutaturus sit? Iam illud quidem, quod maxime ad rem pertinere arbitror, querendum in primis mihi statuo, Vnde tanta sit æstimationis hisce bonis: Ex ipsisne? hoc est, ab ipsorum conditione atq; natura, ut sint ipsa per se & sua vi æstimationanda? An à populo? eò quòd populus illis hoc tantum autoritatis attribuat? Si ab ipsis, quonam sapienti opinione populi multitudinisq; iudicio fuerit opus? An dubium id est, quin ipse melius & consideratius multò, quàm imperitum vulgus soleat, de eo quod bonum est, constituturus sit, & iudicaturus? quippe cùm sapientiæ in primis sit, non aliena eam subsequi, sed sua ipsam iudicia proferre, quæ alij potius sequantur: aut ne nomen quidem suum ipsa retineat, si in iudicando alijs concesserit. Si uerò bona illa magni iccirco facienda sunt, quòd eadem plurimi sunt à populo, nullum erit illorum ueritate neque natura, sed tantum uulgi opinionibus bonum: ita in bonis existimatis & opinatis, non in ijs quæ uerè bona sunt, egregia ista popularis sapientia enitebit. Quid ergo illa, quæ uera bona sectatur, & in illis appetendis utitur iudicio non uulgi, neque imperitorum, sed suo: quo tandem nomine fuerit appellanda? Num ea quæso indignior habebitur, quæ sapientiæ nomen obtineat? & iccirco eam popularis sapiëntia anteibit, quòd hæc ueritatem bonorū amplectitur, illa ipsa

ipsa duntaxat opinionem? nisi fortè nullum omnino re & ueritate est bonum, omnisq; boni ratio ex sola opinione existit. Quod si ita esse suscipiatur, rursus Protagorea ratio inducatur necesse est, nihil re ipsa uidelicet, neque natura uerum, neq; bonum esse: sed quale cuique quid uideatur, id illi tale existere. Quæ positio Sophistæ in primis (ut tum habebatur) nobilis, diu & multum in Græcia iactata, ad extremum doctissimorum disputationibus fracta, atque conuicta est. Etenim tum perspicue est demonstratum, si ita se res haberet, primum, contraria in eodem & repugnantia simul conuentura esse, quod nullo modo fieri potest: quippe cùm contrariè diuersis de quacq; re uideatur: deinde artem omnino nullam neq; scientiam habere locum posse: nihilq; interfuturum esse inter doctissimos & imperitissimos, neque inter eos qui omni rerum prudētia usuq; se excoluissent, & eos qui nunquam animum omnino ad agendum quippiam, aut considerandum appulissent: Ita omni omnium rerum penitus sublato delectu, omnibus cōsilijs iudicijq; peremptis, fore planè nihil quo res rei ulli momento aliquo antecelleret. Sed nos illis disceptationibus omisissis, quæ latiores sunt, quàm ut angusta & breui oratione concludi possint: ad ea quæ nobis sunt propiora redeamus: idq; dicamus, quod reticentibus etiam nobis necesse est intelligi: si boni uerique ratio opinionibus duntaxat pendenda sit, pos-

pulum ipsum iure unum appellari convenire sapien-
 tem: Quippe cum plurium concors consentiensque
 opinio, singulorum sententis sit anteponenda: Po-
 pulus itaque solus sapiens. Qui ergo nobis consta-
 mus ipsi, dum hoc communi loquendi more erro-
 rem, inconstantiam, uanitatem populis ascribimus:
 uerbaque stultitiam & temeritatem significantia, in
 genere sapientissimo usurpamus? Num aut maio-
 res forte nostri aberrauerunt hi, qui rebus impos-
 suere nomina? aut nos illa ipsa nomina perperam
 præposterèque accipimus, alienaque prorsus loqui-
 mur, cum ordinem, grauitatem, constantiam, cæte-
 rasque huiusmodi uirtutes ab errore leuitateque dis-
 iunctissimas, unanimes comites sapientiæ attribui-
 mus? At enim æquius multo est unum concedere
 sententis plurimorum, quam unius plurimos: sic
 enim dicebas: Quid cum plurimi ex contrariis par-
 tibus dissentiunt, multitudinesque ipsæ inter se sunt
 discordes; numero ne semper, nunquam autem pon-
 dere grauitateque disceptantium lis dñdicabitur?
 Quid cum non hominibus solùm, sed populis uni-
 uersis diuersæ sunt sententiæ? Lacedæmone furari
 ingenuis adolescentibus est permissum: Athenis
 nihil minus. Contrà, Atheniensibus lege ocij erat
 mulcta: at liberale uel maximè id apud Lacedæmo-
 nios. Ex quo illud legati Spartani dictum, qui Athe-
 nis quendam damnatum ocij duci cum uideret,
 quæsisse fertur perstudiosè, quis esset ille, qui tam
 multum e p libe

liberalem subiisset multam. In dissimilibus ergo duorum principum populorū opinionibūs & sententijs, utram tandem ueriores & sapientiæ congruentiores dicemus esse; aut si non facile id est iudicatu, tuam scilicet, Phædre, sapientiam adsciscens tibus: constituemus quidem hoc certè, quod est necesse, hominem unum atque eundem Lacedæmone sapientem, Athenis stultum fore: ut cum secum foras extollere domesticam sapientiam nequiuert, in alienam ciuitatem, quemadmodum hospes, sic etiā insipiens introiisse dicatur. Verum ut congregiamur propius, ac de eo ipso genere bonorum, quod Phædri ista in primis aspirat sapientia, de diuitijs, inquam, ac uoluptatibus uerba faciamus, quando horum bonorum iudicium omne ipse attribuit populo: si uaria existant hæc quoq; de re populorum decreta, quid erit tandem statuendum? Lacedæmonie durissimis Lycurgi legibus, quoad illæ uiguerunt, neque ad pecuniam, neque ad delitias aspirauit quisquam. Nemo igitur illis tot seculis in ea ciuitate sapiens: ne Romæ quidem, qua tu è ciuitate exemplū omnis sapientiæ & uirtutis in nostros annos transcribebas, primis illis CCCC. LXXXIII. annis diuitiæ admodum in usu, aut in honore uillore: neque publicè id adeo; neque priuatim. Ac publicè quidem, Q. Fabio Pictore, L. Quintio Cons. nummus in hac urbe primum argenteus signatus est; annis quinque ante primum Punicum bellum

bellum: cum antea graui ære, inepto ad coaceruandum, ac seponendum, omnes uterentur: priuatim uerò qui argētum possidere comperti essent, hi neque legum poenas, neque censorias notationes effugerent. Ita in hanc urbem aditus omni illo tempore sapientiæ interclusus fuit: nisi forte tum populi Romani opinione & iudicio, ex alieno quodam genere sapientia extitit, non uoluptatis & copiarum, ut nunc est, sed abstinentiæ, frugalitatisq; magistra: cuius tamen moris ac disciplinæ temporibus optimis Pop. Rom. non poenitebat, tum cum ab aratris accersebantur homines, quibus magistratus, curationes, imperiaq; mandarentur, totaq; Respublica committeretur regenda: quorum quidem consilijs, fortitudine, iustitia potissimum effectum est, ut hæc ciuitas ex minima, ad summum rerum humanarum fastigium perueniret: nam ab hac quidam populari sapientia quotus quisque est, qui ad gubernacula Reipublicæ trāslatus, officium suum, atque operam ualde probet populo? Quòd si populum quoque uelim in hac ratione defendere, non ne id dicam, quod ab omnibus concedi necesse sit? non hosce cupidos & ad omnia progredientes, quibus omne in pecunia, & in ambitione honoris positum bonum est: qui que quò plurimum in sua ciuitate possint, anxij semper, atque solliciti, omnes intendunt machinas, omni uia moliuntur: sed abstinentes, sed moderatos, sed graues, eos esse,

qui

qui à populis præcipuè & probentur, & diligantur, quorum se fidei libens multitudo ipsa committat. Videtis campum, in quo exultare possit oratio mea. Sed mittamus: sitq; sanè & Phædro, & populo teste, opum & iucunditatum confectatrix sapientia: Illud quæro: in quo uim & facultatē istius sapientiæ ponitis? Vtrum si adipiscatur commoda fortunæ hæc, quæ uos tantopere extollitis: an si uiam, rationemq; commonstret adipiscendorum? Hoc est, Vtrum in euentu adipiscendi, an in consilio duntaxat insit sapientia? Si in euentu, atq; ut adipiscatur, quî iam distinguemus fortunatū à sapiente? aut cur non idem atque unum fortuna ac sapientia fuerit? Et quidem hunc honorem in scena & à Comœdia cernimus Fortunæ datum, Centum dōctūm hominum consilia hæc una deuincit Dea Fortuna: atque hoc uerum est, perinde ut quisque ea utitur, ita præcellet, atq; exinde sapere eum omnes dicimus. Bene ubi cui discimus consilium accidisse, hominem cautum eum esse declaramus: stultum autem illum, cui uertit malè. Nostis carmen profectò, quo, scenæ uulgiq; iudicio, in sede sapiētiae fortuna constituitur. Et ridiculus Pacuuius, quî de Fortuna secus sentit: Fortunam insanam, & cæcam, & brutam perhibent Philosophi, saxiq; instar globosi prædicant uolubilem. quî enim ea poterit uolubilis atque insana esse, si cum sapientia semper coniuncta sit? Quanquàm Pacuuius (quod ita Phædro

r uideatur

uideatur necesse est) nequaquam satis idoneis testibus Philosophis, fortunam in crimen & in uituperationem uidetur accersere. Sed persequamur, ut ceepimus, hocq; urgeamus: si in adipiscendo & potiundo uitæ commoda sapientia tantummodo sit, nihil inter eam, interq; fortunam interfuturum esse, casuq; & fortuito quencq; effici posse sapientem: ut enim ad honores quis & ad diuitias euectus fuerit, ita sapientiam eueligio fuerit consecutus. Vbi circumspectio igitur, ubi consilium, ubi illa accurata & diligens consideratio, quæ habita est semper propria sapientis: qui se nunquā in præcipitem locum committit, certāque ratione dirigens appetitiones suas, diuitias & potestates sæpenumero prætermittit, quò se bona existimatione in populo communicans, ueras uitæ uoluptates, quæ ab honestate & innocentia seiunctæ esse non possunt, tranquillo animo consequatur: nihilq; unquam molitur, in quo subductis calculis non plus consilij & rationis insit, quàm fortunæ. Quòd si non tam in adipiscendo, quàm in acutè acriterq; peruestigando quibus ad fortunæ præmia itineribus ueniatur, sapientia magis elucescit: equidem non negarim hoc sapientiæ munus magis congruere. Adest enim, iam consilium & cogitatio, quæ sunt cognata & familiaria sapientis. Sed quid, si, omnia ipsa cum egerit, uehementerq; elaborauerit (quandoquidem euentum atq; fortunam præstare nemo potest) spe & conatibus

bus suis fuerit decepta: retinebitne sic elusa atque irrita, sapientiæ nomen, necne retinebit? Si non retinebit, falsum erit in explorando, & indagando spectari sapientiã: rursusq; omnis sapientis approbatio à casu, & à fortuna erit repetenda. Si retinebit, poterit iam certè esse aliquis sine fructu ullo & sine emolumento sapiens. Quod neque tu Phædre ita uis, & ego maximè alienum à sapiëntia statuo. Quid enim, remne unam omnium pulcherrimã & maximã, ad quam nostra uota & desideria præcipuè cõtendunt, possideri sine fructu, atq; adeo sine maximo fructu, in animũ inducere poterit quispiam? non cadit hoc in cogitationẽ hominis, nostraq; id mentes penitus respuunt: potius quicquid uitam exornat atq; excolit, facitq; ut pacatè & splendidè, & cum uoluptate uiuamus, totum consilio & sapientiæ refertur acceptũ: ut cui sapientia ipsa adsit, ea illi inutiliter & sine maximo fructu nequeat adesse. Relinquitur igitur, ut iunctũ utrunq; & cõpulatum, sapientiã cõstituat: hoc est, ut uera, germanaq; sapientia sit, cum potiri fortunæ bonis, tum studio ijs nostro, industriaq; potiri. Quod sic recordor abs te fuisse positum, iucundiora esse munerã fortunæ, quæ aliquis labor antecesserit & molestia, q̃ ea quæ sua sponit nec opinati adueniunt: propterea quod uoluptas omnis ex cõtentione ipsa molestiæ percipiatur uberior. Si inquã ita sit, suauioraq; sentimus, quæ cum labore quodã & solitudine animi, nobis ipsi expugnauius, q̃

1407

r 2 quæ

quæ ultro accepimus oblata : optanda est mala uas
 letudo, ut eius prosperæ atq; bonæ lætitia amplior
 nobis adueniat. Falsò igitur est in cōmunibus uotis
 usurpatū, rem esse optandam nobis, non partam la-
 bore, sed relictam. Quantū ista quidē leuiora sunt:
 illud porrò graue, grauiterq; animaduertendum:
 Quòd si ab industria coniunctè & à fortuna efficias-
 tur sapientia, neq; alia conditio quæpsam moduscq;
 alius apponatur: hoc est, quo cuiq; ordine, qua tem-
 perantia, qua etiam à malis facinoribus abstinentia, ad
 opes & imperia peruenire sit licitū : nil causæ fuerit,
 quin quæ ad quæstū maximè, & ad pecuniā apposi-
 tæ fuerint artes, eæ potissimū nomine sapientiæ or-
 nentur. Erunt igitur sceneratores in hanc laudē uo-
 candi, erunt circūscriptores, erunt testamētarij. De-
 niq; quotquot sibi periurio, & fraude, & malis artis
 bus rem aut potentiā quærūt, modò assequantur id,
 quod cōcupierint, prouidi hi, & solertes, & sapiētes
 esse iudicabuntur. Quid ergo? hancine placet consti-
 tui sapientiā, & talem eam in hominum conuictus,
 commerciaq; produci, quæ populatoribus huma-
 næ societatis non solum impunitatem, sed gloriam
 etiam nominis sui proponat: non ne plurimū inter-
 erit, quo pacto quisq; ad opes, honoresq; perueniat,
 & qua ad fortunæ bona nitatur uia? Nam qui iuste
 & castè id egerit, idemq; ea fuerit constantia prædis-
 tus, ut maius sibi bonum in uirtute atque honesta-
 te, quàm in uoluptatum, opumq; affluentia consti-
 tuat,

tuat, cum sanè nos uirum bonum appellabimus, maximàmque illi fidem rerum omnium habebimus: sapientem uerò etiam, si cum integritate unà & cum iustitia, mentis præterea ingenijque acumen habuerit coniunctum: quod omnino sapientiam in actione mentis, & quasi ingenij uigilia quadam constitui- mus: quæ si à uirtute & innocentia disiuncta sit, suisque propriè consilijs absque iustitia ueritateque nitatur, non iam sapientia, sed malitia sit nominanda: ut quæ celeres quidem animi motus, & ad uidendum quid expediat acutos: sed eosdem prauos & inconstantes & perfidiosos habeat. Quapropter decuit abs te, Phædre, sapientem tuum ex hoc genere constitui, qui polleret quidem mentis intelligentiæque consilijs, uerùm idem omnia tamen ad uirtutem, æquitatemque referret. Quem tu nunc cuiusmodi, quæso, & quo ex genere nobis effinxisti? oculum quendam & cautum designasti artificem simumlandi, dissimulandique, qui cum specie quadam splendida & liberali oculos nostros quasi perstrinxisset: intus autem copi pectore (ut ille inquit) arcana continuisset studia malitiæ suæ: tum ut sese ulla aperiret occasio, reiectis inuolucris dissimulationis, ad illa fortunæ bona prorumperet, quorum adipiscendorum gratia, nec uiolare ius fasque, nec cæteros superplantare indignum arbitraretur: qui si non uastè ac præruptè, ut de Philosophis ipse dicebas: at elegantiore quadam improbitate magisque concinna, præ-

riperet cæteris adipiscendi palmam. Vaftrum inquā nobis hominem, & astutum, plenumq; doli ac perfidiae descripsisti: atq; eum qui cū nullam ueram speciem sapientiae nollet, uirtutemq; ac dignitatem utilitate sola metiretur, præstare semper arbitraretur pudere magis, quàm pigere; multoq; plus doletet non adeptus, quod concupiuiſſet, quàm in impuritate aliqua facinoreq; deprehensus uerecundaretur. Detorquebas interdum tu quidem, & splendidis ac sonantibus uerbis umbram illi appingere uirtutis contendebas. Sed facile patebat, totamq; se indicabat oratio tua: Dum enim inobſeruatis uestigijs aiebas curaturum esse sapientem, ut quò intentius expeditius perueniret: non mediūſidius lucem neque diem, sed noctem & tenebras quærebas sapientiae. Quòd si huiusmodi sapientiam esse placet, quæ eos, quibus æmulatur, tyrannos imitetur: ut quemadmodum illi segregatos ab ſeſe habent omneis bonos, ſeruorum autem & facinoroſorum & barbarorum circum ſe comparant manum: ſic ipſa ueris uirtutibus eiectis, fraudum inſidiarumq; comitatu, ad opes ſibi acquirendas ſtupata incedat: nimirum nobis prætereà nihil eſt dicendum: quandoquidem non parte aliqua, ſed tota ſapientiae ratione diſſentimus: nam ego illam ex alieno longè genere, prorſusq; contrario eſſe ſtatuo. H I C GALLVS, Nequaquam hoc uereare, Sadolete, inquit, ut quiſq; noſtrum (nam pro Citrario tibi etiam

etiam spondeo) sapientiam cum scelere, & cum perfidia putet iungi: neque uerò Phædrus hoc perspicuè posuit: uidebatur quidem interdum oratio eius abundans & concitata, labi huc, atque effluere. Sed nosti Rhetorum morem: mihi quidem ratio illa uehementer probatur, nec sine ueris germanisq; uirtutibus sapientiam, nec sine sapientia uirtutes ipsas existere: sapientiamq; ingenij & mentis actionem, non fortunæ euentum esse ducendum: Sed quid si iccirco plurimi sapientia sit, quòd ea nobis bonæ fortunæ effectrix, atq; administra est: non malis insidiosisq; artibus, ut tu modò improbabas, in quo tibi planè assentior: sed uirtutum choro nixa comite, fidemq; & ueritatem ad omnia adhibens: ut sapientis sit honestis rationibus uitæ copias confesqui: sapientiæq; effectus fortunata uita sit: num hoc quoque fuerit eiusmodi, ut alienum grauitate sapientiæ esse uideatur? Mihi quidem notio illa, quam in animo insculptam de sapientia gero, hac ratione etiam pulchrior, magnificentiorq; occurrit, si sapientem omnibus subsidijs fortunæ florentem atq; ornatum esse uideamus: addet enim hic externus copiarum apparatus, illius profectò decori dignitatique permultum. DICUNTUR ista, Galle, speciose, inquā, & aliqua ex parte etiam probabiliter: sed uidendum tamen est, ne conturbemus. Etenim si hoc ita intelligatur, ut sapientiæ fructus omnis in fortuna sit, & cum fortunam adepta erit sapientia,

tum

tum demum nomine illo digna censeatur: aut nihil ipsa omnino per sese fuerit: aut, quoniam fortuna præstare nemo ne sapiens quidem potest, sine ullo commodò & emolumento adesse nobis sapientia poterit: hoc cene igitur tu ita uis? MINIME, inquit: Sed ego cum maximas per se utilitates in ipsa sapientia inesse statuo, tum arbitror uberius illam fore ornatam, si fortunæ quoque benignitas accesserit. FACILE hoc tibi concesserim, inquit: dum ne illud ita sentias, omnem uim sapientiæ huc intentam esse, ut fortunæ ea nobis conciliatrix sit. Sequitur quidem ferme fortuna sapientiam: rarumque admodum, & difficile factum est, ut sapiens idem & infortunatus sit. Ex quo dictum ab antiquis, Suæ quæque fortunæ sibi fabrum esse. Sed tamen fortunarum consecutio appendix quædam bonorum consiliorum est: modicaque semper est, ritè æstimantibus, ad sapientiâ fortunæ accessio. Namque ipsa sapientia maiores sibi multò opes, & præstantiore ex genere in se paratas habet: neque ex alienis generibus bonorum, sed ex se, & sua ui commendat nobilitatem suam: quæ si domesticis fructibus non contenta, alienis opibus perficere se cogatur, non iam neque libera ipsa iuris ue sui, nec ullius compos dignitatis fuerit: seruiet enim necessario fortunæ, totamque sese ad illius nutum finget, atque conuertet, ut suum bonum, quod habet in illa repositum, illius ipsius beneficio possit consequi. Quare
 si huius

si huiusmodi sapientia sit, quibus ea, quæso, ornamentis dignitatis, aut quo honore libertatis poterit esse prædita? Nam ut seruire hominem homini dicimus, non eum solum qui emptus pecunia & mancipio acceptus sit; uerumetiam illum, qui cuius ipse rei egens est, eam rem cogitur ab alio ambire, & mendicare. Sic cum propter fortunam sapientia expetenda sit, iam non ipsa domina rerum, sed pedisequa fortunæ existimanda est. Etenim quicquid amatur aut appetitur propter aliud, id non ipsum appetitur per sese, sed omnis illi dignatio prouenit ex eo, ad quod hoc tanquam intermedio itur atque contentum: ut postea finem, atque extremum quod optabamus consecuti, horum quæ adhibuimus tanquam adminiculorum ad potiundum & consequendum, iam ne reminiscamur quidem; eorum enim consumpta opportunitate, nulla reliqua in ipsis remanet dignitas, quæ nostros animos teneat. Sed nostrum omne bonum in illo summo agnoscimus, ad quod de principio iam tum tendebamus: sic ut portu adepti, nauigio non amplius opus est: & uictoria constituta, arma deponuntur bellica: Sic fortunæ opibus comparatis, inanis de cætero sapientia est. Igitur in hoc ordine, & tanquam curriculo quodam interuenientium rerum ad aliosque fines properantium, sapientia si constituatur: non ea spoliata solum suo decore, seruiat & ancilletur fortunæ necesse est; uerum cum fuerit ad fortunam peruentum,

s nullam

nullam iam ulterius partem commodi, neque æstimationis obtineat. Quod est rursus illa sapientiæ notitia indignum, quam in animis nostris natura ipsa descripsit. AGE AGE, Gallus inquit, cogor enim tibi hac ratione assentiri, fortunam non esse sapientiæ dominam: quæ uideretur fore, si ad eam unam sapientia tota pertenderet: Sed quin sit sapientia ex comitatu bonæ fortunæ splendidior, hoc ne inficiari quisquam, & deterere dicendo ex animis nostris poterit? QUID possit, inquam, alio loco uidero: Nunc hoc sic habeto: Si acri acie mentis naturam rerum intueri uolueris, te non difficiliter animaduersurum, in tanta uarietate & artium & operum, quanta hominum labor atque industria quotidie efficit: nihil in eis rebus inesse dignitatis, quæ ad propulsandū incommodum duntaxat, & ad necessarios uitæ usus repertæ sint: quòd huiuscemodi quæ sunt, seruiunt omnia necessitati: neque habent in se quicquam soluti, & liberi: sed alienis astricta legibus tenentur. Quòd enim fugere incommodum atque malum à natura ipsa cogimur, idcirco sunt ista ui & necessitate expressa, ut naturæ præstò sint, uitamque ac salutem hominis custodiant. Nihil autem coactum suapte natura est laudabile. Vbi ergo existit dignitas? ubi laus? Nempe in his, quæ necessitatis soluta uinculis, ipsi nostræ uoluntati sunt libera: Nam quoad laboramus & tendimus, ut subsidijs fortunæ conquirendis fulciamus,

& tuca

& tueamur uitam noſtram, quoniam id non ſponſte, ſed naturæ lege atque imperio facimus, hæcenus ſumus & laudis, & criminis expertes. Quod enim alieno gerimus coaſtu, neutram id in partem attri buendum nobis eſt, quandoquidē nulla in hoc ani mi noſtri neq; ex uirtute, neque ex uitio declaratur affectio. At cum ſuperellē incipit neceſſitatibus no ſtris diuitiarum copia, & fortunæ quali quædam ubertas, materiæq; habemus ampliorem, in qua li berè uerſari uoluntas noſtra, & ſuo ſe arbitratu ge rere in ea poſſit: tunc ſi rectam rationē, conſiliumq; bonum adminiſtrandis fortunæ facultatibus adhi bebimus, ornabit quidem fortuna ſapientiam: ſed propter eam cauſam ornabit, quia ipſa antè à ſapien tia fuerit ornata; omnis enim illa directio, & prudēs aptaq; diſpoſitio, tractatioq; opum & fortunarum, ſapientiæ tota eſt: atque eadem ſapientia ea eſt, quæ in poteſtatibus & opibus, omnibusq; bonis, mune ribusq; fortunæ, lumen illud accendit pulchri atq; decori: cuius non ſolūm oculi hominum ad aſpe ctum, ſed mentes etiam ad admirationem conuer tuntur. Nam ipſa quidem fortunæ bona, ſi per ſe illa ſpectes, quid habent in ſe præclari atq; magni: quæ iacerent penitus inanimaduërſa & mortua, niſi actum tanquam animam à ratione utentis acci perent: perinde autem ut quis utitur, ita efficiuntur & laudis participia, & uituperationis: ſi enim ordi ne & ratione diſponuntur, nihil ſpectabilius: ſi per

inconsultam , cæcamq; cupiditatem effunduntur , nihil fieri potest turpius : ut cum ad homines indignos delata sunt , augeant potius & cumulent illorum indignitatem , quàm quicquam illis splendoris aut ornamenti afferant. Igitur quicquid ex fortuna est , quod superfluat , ultraq; usus uitæ necessarios sit , totum supellex est , & instrumentum liberæ uoluntatis : particepsq; hætenus & uirtutis & uitij : ex alio genere utile , quàm quomodo ea sunt , per quæ necessitatibus uitæ subuenitur : illa enim ad incolumitatem duntaxat utilia sunt : hæc ad amplitudinem , ad gloriam , ad dignitatem : cuius quidem pulchrioris , præstantiorisq; utilitatis amore & studio , liberæ in primis mentes & ingenuæ excitantur : plusque multò sibi statuunt in honestatis decore , quàm in salutis incolumitate esse repositum . An uos aliam esse causam , & rationem putatis , quam obrem non solùm erectioribus animis qui sunt , uerùm ignauiores etiam alij & demissiores , nisi illi similia brutis mancipia omnino sint , flagrent nimis acriter interdum studio rerum gerendarum : seseq; adhibendi in aliquod opus illustrius , sui que ingenij periclitandi cupiditatem habeant insitam : nisi quod amplitudinis splendore illo ad amandum arrepti , cupiunt sese in illa luce constituere , & nobilioris fieri naturæ participes : uegetiore uerò qui sunt animo , ut quietem nullam inueniant , ut tanquam cæstro quodam exagitati & perciti , The-
mistoceo

mistocleo exemplo, nihil aliud noctu interdici quæ cogitent, quàm quemadmodum queant maiores atque honoratiores cæteris existere: atque ardorem animi sui, quem compressum, atque retrusum ferre non possunt, in illustribus actionibus exponere, ac patefacere: hinc honorum ambitus, hinc magistratum, hinc omnis opum pecuniæque cupido, suscepta quidem illa primò honesti decorique causa, ut in oculis hominum splendidi incedamus, ut aliquid ipsi esse uideamur: uerum post ob inscitiam ueri boni, erroremque ignaræ mentis, ad inanem oculorum ostentationem, improbioresque exaturandas cupiditates, quæ sita atque translata: quam nunc quidem sectandæ sapientiæ rationem, frequentiore nimirum magisque in populo usitatam, Phædrus omni sua oratione communiuit. Sed nos qui ex eo genere hominum uolumus esse, quod rarius quidem est, uerum multò præstantius: quodque amore diuinæ pulchritudinis incensum, dignitatem sibi præcipuè proponit: ferturque omni studio ad illud potiundum bonum, quò naturæ ipsius instinctu ferè omnes, certo iudicio sanè quàm pauci nouerunt niti. Si Philosophiā nobis ducem adhibemus, quæ se effecturā ampliter pollicetur, ut sine errore ullo, sine offensione, optatum animi nostri ualeamus consequi: quis hoc nobis iure ascribet uitio, ac non laudi potius ducet, quòd in cupiditate tanta, nos tamen ita contineamus, ut non impetum animi, nec quicquid statim

nobis expetendum occurrerit, sed certam consilij & rationis regulam, cuius quidē sola Philosophia magistra est, in dirigendis nostris opinionibus persequamur? HIC CITRARIUS, Probē loqueris, inquit, & contineamus sanē nos, si modò quod pollicetur, præstare idonea Philosophia est: cuius tantam hanc uim iandudum expecto nobis ut patefacias. TEMPVS admonet, inquam, & res ipsa eò iam me uocat: nam adhuc quidem uelut tati magis inter nos sumus ego atq; Phædrus, quàm iusto prælio cōgressi. Nunc quoniam legibus iam, & ritu Philosophorum differendum mihi est, qui captiones uerborum excutiunt, nihilq; obscurum neque ambiguum in oratione esse patiuntur: nomē mihi primò sapientiæ non definiendum nunc quidē (alius enim erit magis aptus ad id faciendum locus) sed in qua ponatur re, peculiariter est indicandum. Etenim cū duo sint à ueteribus illis uerborum & linguæ repertoribus facta uocabula, quæ ad duas res in tota hominis natura multò præstantissimas, significandas ualeant, prudentia uidelicet, & sapientia: equidem non abnuerim horum duorum uocabulorum usum ab optimis interdum auctoribus promiscuè fuisse sumptum: quod (ut mihi uidetur) & sæpius, & liberius facere solet Plato: Aristoteles quidem, & prorsus cæteri omnes, ubi ad germanas & proprias rerum declarationes fuit ueniendum, sic distinxerunt; ut prudentiam eis rebus

humanis

humanis præficerent ratione consilioꝝ gubernandis, quæ in motu & in uarietate semper essent, nullo tamꝑ certam haberent in se, quapropter hoc magis, quàm illo modo euenturum quicquam esset, causam aut necessitatem: quam illi partem rerum opinabilem omnem uocant, habitumꝑ animi illis imperantem & moderantem, prudẽtiam: Alteram uerò partem diuinarum rerum & immutabilem, quarum perpetuus semper & uniusmodi esset status, sapientiæ uoluerunt esse subiectam: ut in ijs cernendis contemplandisꝑ duntaxat, nullo alio munere, districta sapientia teneretur. Hac diuisionis & nominum ratione, Græci eos nominauerunt prudentes, qui autoritate in publicis rebus & consilijs florere: quæ in illis magis locis ualuit nominatio, ubi minus roboris in legibus, & in communibus moribus minus firmitatis, maior autem uis in subiectis populorum scitis, quæ philosophismata appellant Græci, extitit. Qua de causa plures Athenis prudentes fuisse memorantur, quàm fuerint Lacedæmone: quod ualidæ illic leges Lycurgi, atꝑ firmæ, minus ingenio loci & callidis consilijs dabant. In rebus autem incertis, & uariè se habentibus, maxime existere uideatur prudentia. Quod etiam Phædrum nostrum similitudine induxit, ut consiliorum hanc uarietatem, mutationemꝑ actionum sapientiæ ascriberet. Sapientia porro est, ut ex communi hominum sententia cõstituamus hoc nomen: si quis
dem

dem uerborum usus & significatio à populo, rerū autem intelligentia à sapientibus est petenda: Sapiētia inquam est, ex qua eos etiam, qui huius, quam diximus, prudentiæ expertes & essent, & haberentur, in astrorum cœliq; & rerum illarum sublimiū ac mirabilium aspectu, contemplationeq; uersatos, sapientes nominandos Græcia censuit: cuiusmodi septem illos consensu populorum uocatos fuisse, literis proditum est: prudentem autem Periclem, & eum, qui fluctum Barbariæ è Græcia expulit, Atheniensem Themistoclem: Quam nos eandem sermone nostro patrio rerum nominumq; distributionem, acceptam à Græcis, secuti sumus. Quòd si ratio quoque reddenda huius distinctionis sit, nimirum ea esse intelligatur, quæ etiam est in communibus hominum sensibus posita: decreui enim, quoad quidem potero, non difficiles aliquas uobis, neque contortas, sed è medio sumptas, proponere rationes: ad quas percipiendas, non exquisita quadam doctrina, sed parua tantummodo admonitione opus sit. Est hoc igitur in omnium ferè hominum opinionibus insitum, ut unus sese quisque ad res gerendas autorem esse idoneum arbitretur: sibiq; persuadeat, si ad rectionem Reipubl. ipse adhibeatur, facile se & magnitudini rerum, & expectationi hominum satisfacere posse. Itaque nemo est ferme tam imbecillo animo tam'que abiecto, qui non aliquam partem prudentiæ, sua sibi ipse opinione arroget

roget : usque eò quidem, ut in genere illo non facile alteri cedat : & si alium uiderit honore atque auctoritate in administratione rerum publicarum sibi antecellentem : felicitate quadam, non ingenio, se ab eo putet uinci & superari : qua rursus populari confusacp existimatione, in idem uidetur fortuna & prudentia conuenire. Ac de prudentia quidem, ut uidetis, sic sentiunt omnes : animicp habitum hunc communem & uulgarem esse putant : hoc est, in communibus quasi principijs naturæ, omnibus hominibus insinuaturn & traditum. Sapientiam uerò, cuius est nomen positum in altissimis rebus, quarum rerum cognitio à uulgo est longè semota, cuiusmodi cœli illa, & cœlestium rerum indagatio est : illis attribuerunt, qui in sola mentis atq; animi exercitatione uersati, res in natura abditas, ad quas populus ne aspirat quidem, inuestigare sunt conati. Itaq; sapienti unusquisq; de populo, in facultate illa & cognitione rerum sublimium facile cedit : prudenti, & perito rerum gerendarum haud ita cedit. Quoniam autem ars ista indagandæ, speculandaq; naturæ in suo munere occupata, curam rerum gerendarum non sæpe admodum appetit : suisq; oblectationibus contenta, quas & plurimas semper, & maximas habere solet, in hos populares æstus ambitionum & cupiditatum se ne committit quidem : iccirco & totum sapientiæ studium tanquam inane, atq; iners à Phædro conuictus agitatum est : & priscis item temporibus

poribus, sapientes in societate hominum, & rebus publicis inutiles, infructuosique sunt existimati. Ex quo & Thales ab anicula, & Socrates ab Atheniensium populo, Crates quoque, Anaxagoras, Democritus à suis ciuibus iure lusi uidentur. His sic demonstratis, accedamus propius ad declarandam Philosophiæ uim; quæ cum harum duarum rerum præstantium & singularium, sapientiæ, prudentiæque uidelicet, siue eas facultates quasdam, siue scientias, siue habitus animi præclaros atque diuinos, uelimus intelligere, notitiam & adeptionem, si se sequi uelimus, daturam nobis polliceatur: diligenter inspiciunda ipsa à nobis est, & undique excutienda, an quod profiteretur, præstare parata sit. In quo sensim tamen nobis & considerate est progrediendum: ut quoniam excelsum fastigium constituere uolumus, habeant fundamenta soliditatem stabilem. Ac ut, quemadmodum coepimus, ab insitis in animis nostris notionibus ducamus exordium, quas in nobis penitus hærentes, sed longa forsitan desuetudine obscuratas, aliquantum opus est extergere, & illustrare, quò facilius mentibus nostris illucescant: agnoscimus sic natura comparatum esse, ut omnium rerum, quæ gignuntur, & fiunt, præstantior semper sit usus, quam cuiusque rei effectio. Exempli causa: Fabrica æraria, quæ lebetes, & cacabos, & labra, uasaque eiusmodi plurima efficit, cuidam alteri arti deseruiat, & famuletur, opus est, quæ uasis illis utatur: siue ea

ars coquinaria, siue balneatoria sit: atque usque eò quidem deseruiat, ut suum in excudendis illis iudicium ipsa adhibeat nullum: sed tantummodo eius quæ his usura est artis lege ac præscripto moueatur: formam enim ab altera arte & modum efficiendi accipit: neq; hoc solùm, uerùm id quoq; euenit, ut si æneis uasis, ars quæ utatur nulla existat, ne ærariæ quidem fabricæ in natura rerum sit locus: tanta est uis & potentia ipsius usus, non solùm ut præcipiat, & imperet efficienti arti: sed in numero etiam rerum ut illa sit, tribuat: quod una in arte demonstratum, ualet idem in cæteras: Etenim si non sit qui maritimis cursibus utatur, quæ sese ars pangendis nauigijs addicet? Et si equitandi peritia nulla sit, quis frænorum & ephippiorum fuerit artifex? Denique ut in unum omnia comprehendamus, perspicuè intelligi arbitror: artes efficientes, earum quæ utantur nō solùm ancillas existere, sed hoc ipsum omnino, quod sunt, & in natura locum & partē ipsæ habent, ab illis totum obtinere. Hoc similiter & eodem modo in natura tota est, in qua nihil est non ad aliquem actum usumq; creatum: sed est fortasse consilium naturæ in plerisque obscurius: reuelemus igitur illud quoad potest & proferamus: atque ita, uti planè queat conspici. Etenim si esset aliquid in natura rerum quod nihil ageret, neq; ullum sui exhiberet usum: cū causa fuisset nulla cur gigneretur, ne genitum quidem fuisset: Siquidem nil absq; causa

t z aliqua

aliqua gignitur: quocirca esset id omnino nihil. Cur
 quicq; autem gignatur, causa ea est, quæ in fini ex-
 tremoq; generationis, uel gignentis arti, uel naturæ
 ipsi est proposita: Vt si dicamus, baccas arborum
 propter eam causam genitas à natura, uel ut ex illis
 pastus animantibus sit, uel ut arboribus plantisq; ad
 perpetuandam speciem suæ cuiusq; naturæ sit pro-
 gressus: uerè quidem dicamus alterutrum, & utrūq;
 etiam simul: nam & ad propagandū genus cuiusq;
 suum, & ad animantium uitam sustentandā, fruges
 & poma à natura creata sunt: sed hic tamen est finis
 naturæ aliquantò remotior: quod sic intelligi uolu-
 mus, ut naturæ quidem consilium & procreandi ra-
 tio, ad hæc ulteriora extremaq; perueniat: labor au-
 tem & operatio eiusdem non perueniat: ut enim pri-
 mum ad speciē suam quæq; res à natura perducta,
 & naturalem facultatem agendi ex sese, & operandi
 nata est: tunc conquiescente ibidem naturæ opere,
 sua ui ipsa, & sua spōte deinde cætera molitur: quod
 in feris manifestissimè cernimus: hæ enim catulos
 cum genuerunt, eosq; nutritu, & multa assiduitate
 confouerunt, usque ad eum terminum, quoad
 illi per sese niti, & sibi conquirere uitæ subsidia pos-
 sint: tum deserunt ac derelinquunt illos, atq; ad alia
 ipsæ sibi naturalia munera conuertuntur. Ex quo
 patet, naturam, cum in quacq; re speciem illius rei
 propriam finxerit atque insignierit, ad peculiarem
 aliquam agendi facultatem finxisse rem illam &
 genuisse:

genuisse: quæ si nullum sui usum præstaret res aut haberet proprium, uel nulla ipsa specie insignita, nusquam etiam locorum existeret, uel illud frustra retineret insigne. Quid ergo referret, esset ne insignita, nec ne esset: uolo enim per hoc insigne accipi, illud suum cuiusque & singulare, quo differt à cæteris, uimque & naturam habet sibi uni congruentem: quòd si nullam ad peculiarem actionem natum sit, quid, aut quale sit, ne cogitari quidem potest: Quæ admodum de materia intelligimus, illa ultima loquor, in quam & intereunt omnia, quæ dilapsa occidunt, & ex eadem cuncta rursus efficiuntur: hæc enim quòd nulla specie propria insignita est, ne sentitur quidem uspiam esse, nullamque suam habet actionem propriam: sed tantummodo efficientibus causis parata est, ut ex ea concreascit aliquid, atque gignatur: ubi uero aliqua iam impressa forma, suum & certum genus in numero rerum accepit, statim ad actiones cōuertitur suæ naturæ proprias: quòd omnis est uis, omnis actio, omnis nitendi aliquid, operandique facultas, ex specie cuique rei sua peculiariter insita. Quamobrem, hoc quoque constituto, quicquid creatum & genitum in natura rerum sit, ad aliquem usum esse genitum, usumque rei semper effectione potiolem existere, ipsumque in causa esse, cur quæque res & gignatur, & fiat: uideamus dehinc, inter ipsos usus num discrimen aliquod sit, & differentia eiusmodi, ut alius alio debeat duci præ-

stantior: quod quidem dupliciter necesse est ita esse: nam & rebus uti nobilitate imparibus, ad eandem actionem possumus: ut ad procurationem rei & priuatæ & publicæ, uel liberis hominibus, uel seruis: ad militiam ijs, qui aut stipendia multa meruerunt, aut tyronibus: in quo, non usus, sed res adhibita ad usum, discrimen habet dignitatis & indignitatis: Et sæpe in ipso usu per sese, cum res illa, qua utimur, eadem unaquæ sit: ea differentia inest, quod & bene uti & malè eadem re possumus: sed quoniam nihil est neque ab arte, neque à natura ad eos fineis effectum, ut peruersè & præposterè in usum adhibeatur, sed ut aptè & conuenienter: sit, quod paulò antè dicebamus usum rei effectiōne semper præstantiorem esse, nunc sic nobis interpretatum, ut de laudabili & recto usu dictū intelligamus: hoc est enim id ipsum, quod contendit natura, & in eo uim suam omnem positam agnoscit: ut quodcunque gignitur ab ea, atque fit, id ad exequendum munus sibi congruens sit procreatum, atque factum: Quod si & rei, qua utimur, nobilitas, & usus illius rectus id efficit, ut quæ illo modo aguntur & geruntur, bene, præclarè, sapienter, utiliter dicantur geri: nulla nobis potest esse præstantior actio, neque ad naturam uitamquæ accommodatior, quàm nobismetipsis, qui in ordine rerum, summum propè & nobilissimum genus sumus, rectè & commodè & cōuenienter uti: in quo & naturæ nostræ perfectio maximè inest, &

uera

uera uitæ felicitas. Ac nos quidem uocabulis abuti-
 mur, si quid fortè pronuntiamus in rerum natura
 se ipso posse uti, nisi quod ratione præditū sit : nam
 quæ inanimata sunt, nullo modo ipsa se ipsis, sed
 illis alia utūtur : quæ autem uitæ & sensus sunt par-
 ticipia, ut uideantur utentium imaginem quandam
 habere utuntur enim & baccis, & frugibus, & lati-
 bulis, & semetipsis ad conseruationem sui uolucres,
 atque feræ : itemq; in aquis quæ demersa animantia
 sunt, suos rerum sibi congruentium usus habent :
 non tamen usus illiusmodi laudem recipiunt, aut
 uituperationem, propterea quòd non à soluto, &
 libero animi iudicio, sed tantum ex instinctu natu-
 ræ proficiscuntur. Qua etiam de causa, eodem sem-
 per propemodum fiunt modo : non enim uisis &
 imaginibus rerum, quæ occurrunt, atque offerun-
 tur, resistere bruta possunt : sed permouentur & ce-
 dunt, eoq; necessario feruntur, quòd appetitus ea
 traxerit. At nos, qui rationis dono diuino atque
 mirabili, à natura ipsa locupletati sumus, non in ap-
 petitu potissimum insistimus, quærentes quid uel
 delectet duntaxat, uel prosit, quæ duo nobis cum
 brutis communia sunt : sed sequentes nostræ natu-
 ræ diuinum ducem, ad illa expetenda in primis fe-
 rimur, quæ sunt ipsorum uel præcipua bona Deo-
 rum : ut decus, ut laudem, ut dignitatem, ut amplifi-
 cationem quandam nostrimet, & quasi ex homini-
 bus in Deos conuersionem, potissimum persequa-
 mur

mur: quorum quidem bonorum, neque participes nobiscum ullo pacto belluæ sunt, & nos in his uersando ac proficiendo, id certè assequimur, ut perficienda ac perpolianda natura nostra, cognitionem nostram cum Dijs arctiorem faciamus. Proprium igitur naturæ nostræ munus tum maximè obimus ac fungimur, cum ad ea quæ sunt laudabilia & honesta, usum nostrimet adhibemus. Et est hic quidem rectus nostri usus, ad quem sumus facti à natura atque geniti. Sed quoniam ea ipsa ratio, quæ, ut tanti boni consequendi facultatem habeamus, uim nobis præbet: eadem etiam dat menti nostræ libertatem, & confectandi huius boni, & aspernandi: neque ulla ad alterutrum necessitate nos astringit: iccirco ad utram partem nos dederimus, iure nos insequitur laus, aut uituperatio: Quorum neutrum, si ad aliænum præscriptum agere omnia nobis esset necesse, ad nos ipsos pertineret: sed eò potius referretur, unde illa nobis inuecta esset necessitas. Quamobrè, ut concludamus: cum in solis nobis iure possit pronuntiari & asseri, nos esse unos, quibus conueniat nobis uti, quòd soli ex libera uoluntate id agamus: sit autem una quæque res nata ad id agendum, quod ipsi est rectissimum: uel in primis confitendum est, nos ad usum nostri rectum & laudabilem esse natos. Verum ista laus non simplex, neque uniformis, sed in duas partes principes distincta: suos deinde unius cuiusque partis & uarios habet gradus: non enim

enim in ijs quæ ratione rectageruntur, pulchrum & conueniens in omnibus idem est: sed plurimum interest, ut semper consilio mouearis & ratione, quos fincis tamen tibi proponas & intueare: finium enim diuersitas, differentiam quoq; actionum facit: in quo illud accuratè est animaduertendū, omnium rerum quæ sint, fiant, atq; gerantur, bonum in fini atque in extremo esse positum: quò cum peruenierit, res quæq; conquiescit. Porro bonum cum dicimus, id uolumus intelligi, quod cuique naturæ potest esse optimum: siue illud splendidis & magnificis uerbis exponendum sit, ut quod pulchrum, decens, honestum: siue commodis & uoluptabilibus, ut salutare, iucundum, utile: sunt enim omnia hæc uocabula cum bono ipso tanta cognatione constricta, ut diuelli non possint. Sed ad nos ut reuertamur: Pulchrum & bonum eorum, quæ recta à nobis ratione geruntur, in fini semper inest. Interest igitur, cuiusmodi sit ipse finis: qui prima, ut dicebamus, diuisione est duplex: quòd aut extra nos, aut in nobis ipsis est situs. Etenim cum quid suscipimus & molimur, si alterius cuiusdam rei extra nos efficiendæ causa id agimus, non in nobis, sed illa ipsa in re quam effecerimus, bonum omne hærebit: si uerò nostra actio nihil spectabit externum, sed in se ipsa conuersa, finem suum & ultimum intus continebit: tunc erimus nos ipsidem qui agimus, totius boni ac decori compotes. Superioris generis artes ferè sunt

omnes, quæ in subiecta aliqua materia, corpore & manu operando uersantur : cuiusmodi statuaria est, & ædificatoria : quarum quidem artium & similiarum cæterarum, facultas omnis & apparatus, non se ipsa finita est, sed ad aliud extra se tendit, & elaborat extremum, in quo suum bonum positum sibi sentit. Quæ uerò ex uirtute geruntur, & ex animi quadam moderatione, quoniam se ipsis terminata sunt, suo ipsa, & eo insito fruuntur bono : neque id in alio, quid sit à se diuersum, exponere coguntur. Approbatur hoc tacito suo, parum quidem in uulgus notato animaduersorū iudicio, natura ipsa : quæ in templis & ædificijs magnifice structis, simulachrisque affabre factis, facit nos nec opinanteis, oculos mentisque defigere, opusque ipsum intueri : ab eo uerò, qui fuerit operis artifex, auertere, atque amouere : quod ratione ea fit, quia bonum artis in opere ipso, tanquam in extremo & fini, non in artifice inest : incredibile autem est, quantopere nos & amore boni natura ardeamus, & aspectu delectemur. Itaque nemo unquam fuit, qui non Iouem Phidiæ multo magis, quam Phidiam ipsum sit admiratus : at ubi actum aliquid est magnanimitate, temperate, prudenter, fortiter, cuiusque hominis talibus actionibus referta uita sit, in quibus præsertim adhibita fuerit constantia : quod non subiti animorum impetus, sed liberum, consideratum, perpetuumque iudicium factis tribuit dignitatem : tunc, quoniam bonum omne in eo ipso

ipso inhæret, qui sese in his sæpenumero probavit, concursus in eo fiunt, & spectationes, & admiratio eiusmodi, illa ut dicantur, Hiccinne est Telamon ille, quem spectabant, cuius ob os Graij ora obuertebant sua? Themistocles quidem post explicatam maximis è periculis, & suo unius consilio liberatam Græciã, cum ad Olympia accessisset: ac multitudo, quæ ad ludos frequentissima conuenerat, dimisso certaminum spectaculo, ad eum unum intuendum cõuersa omnis esset, maximum tum se laborum suorum præmium percipere dixit. Et re uera, auersis etiã nobis, & aliud cogitantibus, tacitè insinuat ipsa natura, ut eas potissimum actiones appetamus, quarum splendor & dignitas in autore ipso permanet: non in alio extrà opere quopiam est spectanda. Sed quorsum hæc tot & tanta? Nempe huc ut ueniremus, quod iam breuiter compræhendendum est: summam esse hominis præstantiã ac nobilitatem, rectè semetipso uti, ad eos quidẽ usus, ex quibus decus, & dignitas, & pulchritudo: non in externa aliqua re, sed in eo ipso, qui utitur, hæreat & constituta sit. Hoc si aliena lege, præscriptoq; gereretur, & ad tenendũ uitæ ordinem hunc atq; cursum, sine errore ullo natura sola sufficeret: non esset, opinor, causa, cur disciplinam aliquam agendæ uitæ quæreremus: principijs enim naturalibus abũde suppeditati, superuacaneis laboribus & curis non implicaremur. Si uerò hoc lumine obscuro atque occulto, naturæ quidem ipsius in-

stinctū, ad magnas quasdam res appetendas agi, & stimulari nos sentimus: quæ uerò illæ res, & cuiusmodi, quo uel in loco positæ, & constitutæ sint, propter ignorantiam minime sæpe animaduertimus; nobisq; tanq̃ in tenebris errabundis, aliud pro alio frequenter accipitur: ex quo offensiones, & peccata, & præcipites lapsus, scopuli deniq; uitæ penè innumera-
rabiles existunt. Amabò si qua est ars, aut scientia, quæ se nobis caliginem hanc ab oculis erepturam, iterq; rectā demonstraturā polliceatur, & ad eos fines nos deducturā, qui maximè è natura sunt, & in queis summa & absolutio uitæ nostræ contineatur: erit ne quisq; tam abhorrens ab æquo, & bono, qui ad hanc uocē occludere aureis suas, tantiq; promissi magistratui ducere, & præterea exagitare cōtumelijs audeat? Atqui hoc promissum, hoc munus, hoc officiū Philosophiæ est: illaq; nobis hanc doctrinam pollicetur, ut nobis q; optimè uti, & dirigere actiones nostras sine errore ullo possimus. Quid ergo est? Nihil ne hoc uobis uidetur; an ceterorū omniū longè maximū? nam reliquis quidē rebus cum utimur, agro, ueste, edibus, equo, mācipio, neq; omni tempore illis, & cum eis unā nobis quoq; ipsis utimur: nostri autē usus, cum plurimus ubiq; est, tum nullo unquā uel minimo temporis momento intermittit: siue enim laboramus, siue requiescimus, siue rusticamur, siue sumus urbani, siue publicam agimus rem, siue priuatam, siue cum alijs, siue soli

soli nobiscum, siue in serijs, siue in ludicris sumus;
 nulla unquam est intercapedo temporis, quin assidue,
 perpetuò, sine intermissione ulla, nobis ipsis
 utamur; quod, cum in omnem prorsus uitam per-
 manet, atque pertineat, si prauè perperamq; agas-
 tur, miseram mehercule & infelicem necesse est à no-
 bis degi uitam; contràq; si bene, ac prudenter, bea-
 tam atque felicem. Hoc totum igitur est, quod Phi-
 losophia proficitur: daturam se nobis uiam & ra-
 tionem, qua nobis ipsis quàm rectissimè utamur;
 quod cum promittit, eadem nobis opera beatam
 uitam se daturam promittit. Atque hæc est illa una
 omnis sapientia, quæ nos similes Deorum immor-
 talium, & eorum uitæ æmulatores esse facit; quæ so-
 la constituit beatam uitam atque confirmat, si no-
 bismet ipsi aptè, decorè, commodè semper uta-
 mur. Quam quidem ad excellentiâ cognitionemq;
 diuinam, nisi lumen nobis Philosophia præferret,
 non modò aditum nō inuenire, sed ne uestigio qui-
 dem ullo duci ad indagandum possemus: ut sine
 sensu, sine gustu, sine sapore ullo præstantissimæ
 uitæ, futuri semper fuerimus, nisi ducem nobis ad
 uiuendum adhibuissimus Philosophiam. Declarat
 hoc, & magis quidem quàm uellem, communis ho-
 minū uita: quæ uulgò ignara fuimet, seseq; in usum
 quemadmodum adhibere debeat, parum attendēs:
 in tantis uersatur errorum, & ignorantia tenebris,
 ut non incredibile modò sit, tantam uim mentis at-

que ingenij, quātam in hominibus natura inferuit, cæcamq̃, & propè amentem aberrare rationem: uerū etiam miserandum. Quotus enim quisque est, ex eo genere etiam hominum, Phædre, qui sapientia illius tuæ præceptis instituti, diuitias & potestates sibi potissimum asciscūt: qui cū sibi optimè consulere credat, dum bonum illud occulto naturæ instinctu appetit, cuius formā & faciem propter ignorantiam nesciat, non ruat præceptis in aliud quod dedecus: eosq̃ æstus animi, atque angores contrahat, qui uitam efficiunt amarissimam? Ne minem nominabo, necq̃ sanè necesse est: obruimur enim exemplorum copia. Sed certè communis uita usque eò ueris bonis, & recta uiuendi regula, ac ratione orbata est, ut neque in cupiditatibus modum, neque in aduersis secundis'ue modestiam sciat retinere. Cuius quidem erroris tam latè diffusi, tamq̃ uniuerſi, correctionē, sola Philosophia pollicetur, si qui reperiantur, qui se illi curandos instituēdosq̃ permittant. Sit igitur hæc à nobis, tanquam primis ducta lineamentis, simplex adhuc, & inchoata Philosophiæ descriptio: esse eam scientiam uidelicet, semetipso rectè conuenienterq̃ utendi: atque ita utendi, ut totius hominis usum, & uniuerſam in homine rationem ipsa complectatur. Nam cæteræ artes atque scientiæ, quæ nominatim alicui certo generi addictæ præfectæq̃ sunt, & in eo uno uersantur, nō sunt hominis propriæ ut homo est, sed talis

hominis

hominis, puta geometræ, aut statuarij, aut musici. Philosophia autem totum illud ipsum quod est homo, perficit, atque exornat: id porro integrum quidam est, & uniuersum, è quo ceu fonte ex amplissimo, deducti riuuli, in singulares deinde, & limitibus certis circumscriptas diuiduntur artes: in quas singulas tantum de homine ingreditur, quantum de ratione, quod multò quidem contractius, angustiusq; est, quàm totus homo, & tota ratio. Quare quæ uniuersam rationem scientia perpolit, ea merito ars artium nominanda est, & scientia sciëtiarum. Sed quando primam Philosophiæ quasi formam delineauimus, ducendi nunc colores sunt, singulaq; illustranda: & omnes eius pulchritudines, quæ innumerabiles penè sunt, in suo lumine collocandæ. Diximus Philosophiam scientiam esse bene & laudabiliter semetipso utendi: in eoq; munere, si quis id aptè riteq; exequatur, beatam uitam præcipuè contineri diximus. Nunc istud ipsum munus præclarum atque eximium, quibus ab iniitijs nascatur, intelligi nobis oportet: nempe enim rectum nullius rei usum tenere possumus, nisi prius cognouerimus, quid illa res sit, & quam uim habeat, quasq; ad res agendas à natura sit parata. Itaque primo inceptu, statim ad præceptum illud reuocamur, quod in foribus Delphici templi inscriptum, quia superius ingenio uidebatur esse hominis, uni omnium Deo prudentissimo est attributum: Nos uidelicet ipsos

ipſos ut noſcamus. Et nimirum ſi commodè uti no-
bis ipſis uolumus, ab hac cognitione proficiſcamur
oportet: quî enim poterimus rectum tenere iter, ſi
neque naturam noſtram ipſi, nec quæ naturæ con-
ſentanea ſunt, percepta habuerimus? Noſcendi igitur
nobis noſmetipſi, & in id curriculum uitæ indu-
cendi, in quod natura ipſa nos immittit. Quæ ſanè
noſtrum cognitio, non ab exquisitis & abditis pri-
mò rationibus, ſed à communi hominum intelli-
gentia petenda eſt: ſit enim poſteà increbrefcente
ſtudio, & progredientibus rationibus, ut noſtri no-
bis notio in dies reddatur certior. Quæ ex his qui-
dem in præſentia quæ ſunt in promptu, & omni-
bus patent, explicanda nobis eſt, in conſpectuq; po-
nenda. Perſpicuum enim eſt, idc; planè extat, treis
eſſe in hoc inferiore mundo animantium naturas:
quorum partim uiuunt duntaxat, idc; alieno mu-
nere, nihil ipſa afferentia ex ſeſe, quam ob rem hoc
magis, quàm illud ſequi, & appetere uelle uidean-
tur: quam uitam degunt cuncta ea, quæ tenentur
ſôlo infixæ, eamq; uegetabilem uitam appellamus.
Partim iam ſenſibus prædita, & ſuum aliquod na-
ctæ uiuendi iudicium, uim habent à natura inſitam
discernendi quodcunque oblatum illis fuerit: idc;
uel appetendi, uel aſpernandi, uel inſequendi, uel
fugiendi. Tertium porrò genus & reliquum eſt,
quod cùm ambo iſta contineat in ſeſe, ut & uiuat, &
ſentiat: habet præterea præpoſitam hiſce omnibus,
& an

& antecellentem honore, atque imperio, rationem, supra quam nullus iam est ullo ex genere uitam hîc degentium, nobilitatis ascensus. Atque hæc tria simul copulauit in genere humano, intexuitq; natura. Sed duo hîc animaduertenda sunt, unum quod patet ex se, manifestumq; est, in his tribus scilicet naturæ quasi generibus, quod maximè necessariū ad uitam sit, id cæterorum esse indignissimum, maximèq; ignobile: quod iam cum superioribus nostris sermonibus congruit, quibus dignitatem à necessitate nunquam non segregatam esse diximus: & reuera seruum semper est natura id, quod obnoxium necessitati est: liberum enim ius suum nullum id habet, sed ad alienum imperium præstò est semper, nec ullo dignitatis suæ honore censetur: hoc itaq; unum non tam nunc quidem positum à nobis est, quàm à natura omnibus propositum, animam illam quæ uitæ soli sit attributa atq; addicta, quam uegetabilem appellamus, in toto animali genere longè subiectissimam atq; ignobilissimam esse, infimumq; eam locum obtinere. Alterum uerò duorum, quæ diximus, diligentius aliquanto nobis est attendendum: omnem uidelicet naturam, quæ non solitaria simplexue sit, sed ex pluribus quasi rebus conflata consistat, genus habere suum, propriamq; generis appellationem, ex illa parte sui, quæ in quacq; re eius modi princeps sit: quòd in coniunctione plurium, uni semper naturæ traditus principatus est. Quod

cùm ita sit, & in nobis longè dominetur ratio, principatumq; ipsa teneat : quicquid sumus ipsi, totum id accipimus & possidemus e ratione, ut sit ratio illud ipsum planè, quodcunque est homo : Sequitur deinceps, ut distinguamus quæ harum partium cuiusq; uis, quæq; facultas sit, seorsum primum & per se, deinde in iugatione cum alijs partibus copulatuq; exposita : Etenim aliud est, quòd unaquæq; animæ pars per se singulariter agere nata est : aliud, quòd in aliarum partium comitatu & coniunctione : quòd naturæ simplicis, simplex est actio : conflata, mixtaq; coniuncta. Sed de mixtis mox : nunc simplicia illa munia, atque officia singularum animæ partium uideamus. Ac illius primum quæ sine cura ulla nostra, sine rectione uiuit in nobis ac uiget, quam uegetabilem animam nominamus : ea enim est qua alimur, & sustentamur, & extenuamur, & augetur, accipimusq; habitum hunc, & figuram corporis quæ in nobis est, & fingimur carnibus, ossibus, neruis, cute, sanguine, & ad gignendum quod in eodem genere simile nobis sit, natura proni sumus : cui sunt animæ quædam membra attributa, quæ sine nutu nostro, & confidant, & excidentur, eaq; est una fundamentum & stabilitas animarum reliquarum : quæ nisi adesset, neque sensus in nobis, neque ratio esse posset : & tamen ipsa ita est necessaria, ut sit reliquarum longè infima. Atque hætenus ferè huius animæ pertinet potestas. Illa uerò

uerò sentiens, quæ aliquo iam cognoscendi iudicio prædita est, uim habet sibi peculiarem uidendi, audiendi, tangendi, olfaciendi, gustandi: atque inter hæc sensilia differentias notandi, contrariaq; in suo cuiusque sensili genere distinguendi: necnon rerum motus, figuras, magnitudinesq; percipiendi, oculis quidem & aspectu quàm maxime, sed cæteris quoque sensibus nonnihil. Eiusdem est animæ officium, ea quæ sensibus semel compræhensa sunt, etiam postea quàm illa abierint è conspectu, interiore nihilominus animi facultate quadam, imaginibus repræsentare, & tanquam in thesauro in memoria recondere, aliquantumq; ibidem temporis spatium custodire: quòd illis formis & imaginibus, ad inquirendum maxime aliquid, & ad declinandum, animalia moueantur. Tertia est ratio peculiaris generis nostri, quæ nullo alio in genere animantium cernitur: per quam nos omnibus mundanis rebus præfecti sumus, cuius munus proprium & primaria facultas est, intueri quidem illud primò, & per se, quod semper idem est, atque eodem modo se habens, quod necessariò immortale est, atque diuinum, in eoq; tanquam in familiari & cognato genere uersari, ueritatisq; ibidem pasci cibo, suauiore multo, quàm ambrosiæ & nectaris. Quando quidem in eis solis, quæ sibi perpetuò constant, & usquequaq; immutabilia sunt, habitat ipsa ueritas, eadem in fluxis & continenter labentibus, tanquam

simulachris, & similitudinibus illuditur. Sed si ad
 hæc quoque, quæ non uniusmodi semper sunt,
 ipsam conuerti rationem oporteat, in ijs eius sit of-
 ficiū præscribere, ordinare, dirigere, imperare:
 quòd huius naturæ præcellentis ac diuinæ solius
 est imperandi, & præcipiendi potestas. His sin-
 gulatim de unaquaque partium animæ à nobis sic
 expositis, ueniendum deinceps est ad functiones
 eas, quæ ex partium coniunctione inter se, copu-
 latuque existunt: quarum mediusfidiū incredi-
 bilis est multitudo: nec numero ea solū, sed mo-
 dis etiam, & conditionibus, multiformis, ac uaria.
 Sed nos genera duntaxat ipsa perstringemus: ad
 minutissimas partes explicandas non accedemus.
 Ex parte igitur sentiente, & uegetante, ambaru-
 que inter se iugatione, atque complexu, primum
 cura & studium custodiendæ salutis, deinde uo-
 luptas, molestiaq; exoritur. De ea uoluptate nunc
 loquor, quæ maximè sentitur in ipsa coniunctio-
 ne molestiæ: ut sitientis est ideo cum uoluptate bi-
 bere, quia cum molestia sitiat: cuius quidem mole-
 stiæ ea est uis, ut cum primū desierit sitis, simul
 item desinat bibendi delectatio: hoc genus uoluptas-
 tis (nam est aliud quoddam purius, atq; præstātius,
 quod nulla omnino admixtum molestia est, de quo
 alio loco fiet mentio) hoc inquā mixtæ uoluptatis ge-
 nus, quod etiā uehementius uideri solet, propter ap-
 positionē, adiunctionēq; cōtrarij. Dicimus ex hac co-
 pulatione

pulatione sensibilis, & uegetabilis animæ primò nasci, ut in ipsa quidē uegetabili situm, fundatūq; sit, à sentiente autem percipiatur, & iudicetur. Verum habet id terminatas in animantibus cæteris uarietates; in homine uerò si rationalis anima huic curæ se submiserit, & ad sectandas huiusmodi uoluptates sit conuersa, crebrius idem multò & multiplicius factum, innumerabiles illas gignit cupiditates, quas uolitare in anima ipsa passimq; discurrere ac tumultuari sentimus. Hinc iræ, hinc reconciliationes in gratiam, hinc amores, hinc odia, hinc libidines, hinc ambitus, hinc suspiciones, obtrectionesq; , hinc alacritates, consternationesq; animorum, & quæ quasi capita omnium huiusmodi perturbationum sunt, spes, metus, letitiæ, dolores. Sed nos his breuiter percurtis, ad illam alterā complexionem, temperationemq; rationalis animæ cum reliquis duabus naturis, accedamus. Ex qua quidem copulatione non pauciores profectò q̃ ex cæteris effectus proueniunt; etsi ex alieno hi tamē sunt genere. Nanque ipsa ratio, quæ si pura sit per se, atque simplex, in eo, quod idem semper est, cōtemplando, perpetuò inhæreat; neq; sponte se usquā à diuina illa disjungat ueritate; indidem huc euocata, atque huic corpori nodo inextricabili, quoad in his fuerit locis, adstricta, comitatu importuno sensuum & cupiditatum, desciscat à semetipsa necesse est: & ad hæc infirma, instabiliaq; consideranda torquea-

tur : quorum primo obtutu tanquam caligine occaecata atque conniuens, ut quæ ex illo illustri æternæ ueritatis loco, in tenebras repente uenerit, aduocare sibi cogitur communes quasi ministros & suos, & sensuum, per quos item cōmune opus cum illis unà peragat, atque exequatur, fidem, opinionem, consilium, cogitationem : quorum fides quidem, mentis animicq; est assensio, assertioni credentis, quæ sine ratione quippiam confirmet : opinio autem intus concepta existimatio est, non sine ratione quidem, sed tamen infirma ratione subnixæ : quæ rem aliquam arbitratur aut esse, aut non esse, aut huiusmodi eam, aut alio modo existere. Ac in his duobus ratio consistit tamen, & requieta est, quòd eo est contenta, quod quoquo modo sibi fuerit oblatum : in illo autem altero pari, consilio, cogitationeq; iactatur adhuc, positaq; est in motu : necdum eò peruecta, quò affectat & tendit : est enim cōsiliū, quasi itineris & uia inuestigatio quædam, conquisitioq; adiumentorum, quibus id queamus, quod designauimus consequi : cogitatio uerò eiusdem ferme modi est indagatio : uerū non ea efficiendi quidem quippiam, sed tantū intelligendi causa suscepta. Hactenus informata nobis sit, & tanquā leui ducta penicillo agnitio nostrimet : quæ etsi propria Philosophiæ consideratio est, non maxima tamen uidetur indigere admonitione ad spectandum & percipiendum, Nunc hoc rationale animi
mal

mal, quod uocatur homo, tribus ex naturis cohærens, atque conflatum: quod fungi debeat actiones, & singularum naturarum proprias, & omnium cōmunes: fungicq; ratione, & ordine, si uitam eam uelit degere, quæ felix & beata sit: tradamus Philosophiæ instituendum, ac poliendum: ut uideamus si dictis eius atque promissis, facta etiam consentiant. Quid promittit illa autem? nempe scientiam se, & facultatem homini præbituram, qua is semetipso commodè uti, & ad omnia rectè exhibere se possit. Atqui nihil omnium rerum melius, neque præstabilius profectò est: neque ego solus hoc dico, sed tu quoque Phædre, & quicumque educi liberalius sunt: nemoq; potius omnium mortalium tam abiecto animo, tamq; infima & sordida conditione uitæ est, quin si diligentius consulat semetipsum, & cogitationes suas expendat, hanc huiuscemodi scientiam omnibus anteponat opibus, atque fortunis: quippe qui ex ea se affecuturum omnia optata sua confidat, & ad suorum uotorum summam peruenturum. Veniat igitur in medium promissum hoc magnificum, & graue, ut excutiat a nobis, & consideretur, in quo sic primum ordietur Philosophia. Etenim fingamus sisti illi à nobis & commendari, ac de manu in manum (ut aiunt) tradi hunc eum ipsum, quem cupimus huius tam eximiæ facultatis, & præclari suimet usus fieri compotem: illa enim, credo, ut primum aspexerit adolescētem, nostrosq; sermones

sermone audierit, hac initio statim oratione utetur: Equidem præstabo (inquit) quod pollicita sum, uiamque bene & beatè uiuendi sine ullo errore tradam; sed opus est animo non repugnante: quamquam hoc fortasse non satis sit: ingenium adsit oportet, & ueluti oculi in corpore, sic in mente luminis acies, ad intuendam formam ueræ pulchritudinis à natura parata: quam postea ego quocumque fuerit opus, meo arbitratu dirigam, atque cōuertam. Sed quod dixi de non repugnantia, ob eam causam dixi, quòd ferè ad me qui accedunt, afferunt prauas secum è uulgo opiniones, quas nulla nostra ratio potest euellere: aut enim in aliqua populari sententia statuti atque firmati, uelut expetendas præcipuè esse opes, honores ambiendos, uoluptatem sequendam, ad omnem deinde uocem ueritatis obfudesunt: aut etiam si rationi se præbeant dociles, uno aliquo uitio, nonnunquam etiam pluribus contaminati atque imbuti, permulta secus faciunt, quam uera illis dicat, ac præcipiat ratio: Ex quo neque illis magna ex me utilitas, & mihi grauis ex ipsis calūnia conflatur. Videor enim postea ob hanc præcipuè causam, sapientiam tradere, non rerum, sed uerborum: quod tamen secus est: mea enim disciplinæ institutio, ad res potissimum, & ad facta ipsa spectat: formatrix autem orationis hætenus quoque sum, ut sine fūco & fallacijs, cum optimis eam moribus, & cum præclaris animi cogitationibus uelim congruere

gruere. Quòd si tu (ita enim prosequetur ad adolescentem conuersa) ita ad nos paratus uenis, ut te nobis totum sis permissurus, eijcias è te ipso oportet omnem opinionem alienam constantis & firmæ rationis; animumq; tuum mihi purum & purgatum præbeas, quo possim ego in eo diuinam illam speciem, quæ à me una fingitur, atque exprimitur magnanimi uiri & uerè præstantis inscribere. Quid respondet adolescens? primùm pudore credo deijcet oculos: post nouis quibusdam ardoris stimulis, ad spem magnarum rerum intrinsecus excitatus, quod de Alcibiade scriptum reliquit Plato, flens sese & salutem suam Philosophiæ commendabit. Sequetur itaq; primâ illam nostrimet, quam diximus, cognitionem, altera præceptio: ut consideremus attentèq; intueamur, cum trium illarum partium, ex quibus cõstituti sumus, singularum proprii & sui fines sint, in queis cuiusq; earum sit positum bonum: nos ex naturis illis omnibus in unam rem cõflatos, non posse unius tantum partis extremo & fini cõtentos esse: sed quemadmodum treis animæ habitus & facultates obtinemus, ita tria nobis habere proposita bona, quorum singula partibus singulis, conjunctè autem omnia uniuersitati ipsi conueniant. Persequamur enim uero quod cuiusq; partis extremum, atque idem bonum sit: quò melius deinceps queamus iugum illud, & uinculum totius communionis aspicere. Illi igitur parti & animæ inferiori ac igno-

y biliori,

biliori, per quam sustentamur, & alimur, ceu finis,
 & ultimum incolumitas proposita est, quæ eadem
 salus & uita est intelligenda, genusq; illud boni,
 quod utile appellatur, in hoc genere animæ præci-
 puè est fundatum: utile enim potissimum id uoca-
 mus, quod ad salutem & incolumitatem uel dan-
 dam, uel conseruandam, uel restituendam etiam
 pertinet, quod inter reliqua bona maximè neces-
 sarium est: etenim est cæterorum tanquam solum, fun-
 damentumq; bonorum, quo subducto, atq; sublas-
 to, reliqua non uideantur bona uspiam posse cons-
 sistere. Atque huius quidem etiam boni participia
 illa sunt, quæ omni carent sensu: ut stirpes, arbo-
 resq;, & cætera eiusdem modi, quorum est natura in
 toto animanti genere longè subiectior: nihilq; in se
 continens, nisi quod necessitatis sit: ideoq; honore
 nullo, nec nobilitate prædita. Altera est natura iam
 sentiens, uimq; & facultatem habens huiusmodi ins-
 sitam, ut affici quodāmodo rerum appulsionibus,
 idq; ipsa sentire, ac propterea moueri ad appeten-
 dum, uel ad aspernandum, possit: cuius finis & pro-
 prium bonum intelligitur uoluptas: certè enim nisi
 aliud quid præsit, quod moderetur, & corrigat, sem-
 per ut ad suum summum, summèq; expetitur bo-
 num, sensus ad perfruendā rapiuntur uoluptatem.
 Tertium porro animæ genus, quod rationis partis
 ceps, uel ea ipsa potius est ratio, cœleste atque diuin-
 um: cuius præ nobilitate ac præstantia, reliqua ge-
 nera

nera aut nullius quodammodo, aut certè ita parui sint momenti, ut ne comparanda quidem sint: finem suum & ultimum propositum sibi habet, si ipsum per se solum species, scientiam & ueritatem: si cum reliquis coniunctum, decus atque honestatem. Est enim honestas, quam eandem dignitatem, decentiã, amplitudinemq; appellare iure possumus: si acutè inspiciamus, nil aliud profectò, quàm ueritas, cum reliquis aliarum partium finibus, utilitate uidelicet, uoluptateq; coniuncta. Vt enim luminis natura candens ipsa per sese, & suo quodam splendore lucida, si illustrãdis rebus admisceatur, colores eos excitat, qui uarietate & pulchritudine decentes sunt: Sic ueritas adiuncta hominũ studijs & affectionibus, cum in agendo, regendo, communicãdoq; expromitur, illam in primis gignit, quam ingenuæ mentes tantopere mirantur, conuenientiam rerum omnium, & dignitatem. Atq; his tribus finibus proprijs trium partium iam cognitis, in quorum unoquoq; suum cuiq; parti bonum est: uideamus nunc totum hoc complexum, & copulatum, quod est homo, quos ad fineis à natura directum sit, & quam uitam agere debeat, quoq; modo semetipsum in usum sui adhibere, si ad extremum & ultimum suæ naturæ bonum sit peruenturum. Atq; horum quidem trium, primum illud Philosophia duntaxat docet: reliqua autem duo præterea etiam tradit. Quid est autem quod doceat? Nempe sicut nos coniuncti, & tempe-

rati ex tribus naturis sumus, sic tria illa bona in unū miscenda nobis esse, & capienda, si beatam, & expletam suis omnibus numeris uitam uelimus confesqui. Quid ais Zeno? Quid nouas uerborum contechnationes implicas, quibus nos captare, & illaqueare coneris? Bonum esse quod honestum sit: Assentior, & ex præstantissimo quidem genere confiteor esse bonum: At id solum bonū, prorsus nego: nisi aut unicum tantūmodo bonorum genus in natura rerum sit: quod cuinam quæso queat probari? cū omnibus rebus natura & specie inter se plurimum differētibus, suum cuiq; earum in fini atq; extremo sit positum bonum, quod esse idem diuersorū non possit: & ni ita sit, frustra pleraq; creata à natura, & nullos ad finis effecta intelligātur. Aut si alia quoq; bonorū genera sint, quoniam de hominis bono nominatim nūc quærimus, ex unica natura nos, hoc est, mente duntaxat & ratione, oporteat esse factos. Atqui alias prætereà naturas in nobis obtinemus: Vbi ergo repētē deserimus illarū bonū? quod si assequi possimus, intelligamus id certē ad aliquā partē nostri pertinere: Nisi fortē reliquarū partium bona stare, atq; cōiungi cum rationis bono nō possunt: quod usq; cō falsum est, ut in illis præcipue sibi accommodandis, & concordibus secum faciēdis, enitescat & elaboret nostra ratio. Sumus ergo ad ista tria bona & appetēda, & cōsequenda à natura facti: quorum quidē cōmunio bonorū, in ipsa partiū nostrarum

strarum coniunctione spectatur. Sic enim debemus exquirere, & consecrari singula, ut ad communis-
tem tamen omnia referamus: atque hic illud perui-
dendum est, usque eò congruere tria hæc inter se bo-
na, & uelut conflata esse, ut quâquam unum quod-
que illorum suo & proprio genere censeatur, socie-
tatem tamen cum reliquis generibus, & naturalem
quandam intelligatur habere cognationem: nam &
quod utile cui est, id suapte etiam natura conueniēs
illi est, ac iucundum: & honestas suam utilitatem ac
iucunditatem secum adiunctam habet: & cum uo-
luptate, quæ è natura sit, sua est utilitas, conueniens
tiâq; coniuncta. In quo perspicuè natura contra
Stoicorum rationē decernit, illud uerè perfectum,
& cumulatam hominis bonum esse, quod sit ex his
tribus in unum quasi temperatum, atque mixtum.
Sed nos cum suos cuiusq; naturæ fineis appellauis-
mus, illis nominibus singulos indicauimus, quæ
præcipuam, & principem in una quaque natura ra-
tionem boni declararent, ad quam cætera adiuncta
bona pro accessionibus ducerentur: quemadmo-
dum in sequentibus fiet manifestum. Etenim nota-
tis iam, & constitutis finibus ad quos hominis uita,
naturâq; contendit, aperiendus dehinc est commu-
nis penè cunctorum hominum error: quos igna-
ros, quatenus quicquam cōueniat, illamq; partium
in nobis consensionem uiolantes & distrahentes,
stultitia in uita, quasi furia quædam, incitat, atque

perturbat: ut neque placati sibi ipsi, neque cum cæ-
 teris concordēs esse possint: quos cū ab hoc tanto
 malo se abducturam Philosophia polliceatur, & in
 possessionem summi boni inducturam, perspicia-
 mus, quæso prius aliquantum magnitudinē mali:
 ut quantum deinde illi beneficium debeatur à no-
 bis, melius agnoscamus. Etenim si quisquam est, cui
 hæc tanta communis uitæ confusio curam aliquam
 injiciat noscendi, & contemplandi, unde illa & qui-
 bus quasi radicibus exorta, quotidie magis frutice-
 tur, & ingrauescat: is reperiet primū ignoratio-
 nem suā in uno quoque, deinde prauum usum, qui
 nec rectus esse ignoranti semetipsum potest, hanc
 tantam errorū syluam profudisse, per quam exclus-
 sa luce ueritatis, totum ferme uitæ iter nobis impe-
 ditum atque cæcum factum est. Nam aut fines eos,
 ad quos natura generati sunt, nequaquam homi-
 nes mente, & intelligentia compræhendētes, ferun-
 tur fortuito, & temere: & ut ad unum aliquod stu-
 dium, quasi fluctu, delati sunt, ita inherescunt in eo,
 cæteraq; nosse & uestigare contemnunt: ex quo sta-
 tim diuellitur in nobis naturæ illa consensio, ma-
 iorq; pars nostri neglecta à nobis inaccurataq; re-
 linquitur: Aut qui plureis fineis tenere constituunt,
 ignari quid postulet illorum unusquisque, & quan-
 tum cuique tribuendum sit: inepta & dispari com-
 positione, non illos conciliant inter se, sed commit-
 tunt: ex quo seditiones graues, & prælia in animis
intus

intus excitari necesse est. Ac ut rem exemplis notior rem faciamus, diximus utilitatem, uoluptatem, dignitatem, humanorum esse desideriorum ultima, copulata ipsa inter sese, quando & nos conflati ex triplici natura sumus; ut cuique naturæ suum ultimum sit, non illud quidem adiunctum omnino, & separatum à cæteris, sed proprium tamen cuiusq;, atque præcipuum. Quid ergo? Non ne cernimus ex hominum numero nonnullos, qui cum utilitatem nimis adamauerint, quod ad eam sunt, aut consuetudine diuturna, aut propinquorum imitatione atque exemplo, aut æqualium hortationibus adducti, paruam uoluptatis eius quæ alieno ex genere sit, nullam omnino dignitatis ducunt rationem; sed ambo hæc genera reliqua in una sibi utilitate constituentes, uni illi seruiunt uitæ, quæ animantibus quoque reliquis & stirpibus communis est: cuius fundamentum, & stabilitas in parte animæ ignobilissima consistit: reliquas uerò naturæ partes, deserunt, atque despiciunt. Itaque rei faciundæ maxime addicti, & mancipati, nullum sordidum, neque turpem iudicant quæstum, unde ad uitam utilitas aliqua perueniat: ex quo infinita in illis quotidie magis pecuniæ cupidō adnascitur. Atque hi sunt, qui solliciti semper, & anxij, minutatim, & pauxillatim omnia expedientes, nati esse uidentur ad omne perferendum dedecus: litigiosi, difficiles, scrupulosi: qui ne irrisi quidem, & ludibrio habiti, animaduertere possunt

possunt, quàm misera conditione uiuant: tantumque illud pertimescunt, ne quid ab ijs petatur, aut auferatur: itaque & fugiunt bonorum cœtus, & à consuetudinibus hominum abstinent: nec audent quicquam facere, aut dicere unquam fortiter. Hos tu homines esse statuas, infimæ illi uitæ, & ignobilissimo generi bonorum addictos: ac tanquam spongas lapidî, sic ipsos auro affixos, & pecuniæ? His e regione alij, nulla neque uitæ, neque utilitatis habitatione, ad uoluptatem unam toti sunt delati: in eâque exquirenda undique ac perfruenda, summam sibi uitæ constituunt: cuius quidem uoluptatis, eius nimirum quæ populo & nota, & nominata est uoluptas, regnum in parte naturæ sentiente cōstitutum est: nam neque uoluptas est, nisi sentiatur, sensusque perfundantur, & deliquescant ex ea: Et memoria præteritorum, expectatioque futurorum, quæ ambo in solis sentientibus sunt, productas tempore & spatio, facit sentiri uoluptates: quas sola instantis breuitas temporis inanitudines, & imperceptas transire cogeret. Ergo ad uoluptatem qui sunt omnistudio conuersi, cum genus eius nullum repudient, nec prætermittant: in eo tamen genere plurimum adhærescunt, quod ex sentiente ac uegetante anima coniunctum est: quando id quidem omnium est acerrimum, & ad concutiendum totum hominem maxime uehemens: est autem id positum in eo, ut cum pars illa uitalis & uegetabilis, quæ cæterarum partium

tium rudis & corporea maximè est, defectionem naturæ suæ, & maiorem aliquem discessum à temperamento patitur, in quo molestia iam inest, & quasi naturæ tristitia quædam non mediocris : si subleuetur, ad naturamq; restituitur, incredibili quadam uideatur sibi perfrui suauitate : quòd ut in comparatione nigri color albus, sic in adiunctione molestiæ uoluptas acrior sensibus nostris appareat. Atq; hæc huiusmodi in primis plebeia & sordida sunt uoluptates, quæ ab hominibus nequam, atq; ignauis potissimum expetuntur : quarum uim conditionemq; cunctarum, in una si placet specie, eademq; notissima, parumper consideremus. Est enim morbus uulgaris sanè, & omnibus notus, quem psoan Græci uocant, nos uertimus scabiem : cùm sanguis intus biliosus & acescens, sparsim è cute conatur erumpere : & quacuncq; funditur, propter acumen, stimulis pungit, inficitq; corpus, & inficiendo pruritus acreis ciet, qui sunt quasi fermenta quædam & nuncij appropinquantis doloris. Huic malo, & molestiæ subuenimus scalptione, atque unguibus, uel asperæ rei alicuius fricatione, & attritu. Ponite uobis nunc ante oculos formam atq; imaginem huius prurientis : uidetis ne ut miserè ipse se exerceat, mixtamq; ex uoluptate, & ex molestia, indignantis simul & lætantis, exhibeat faciem : cùmq; intrare eò digitis planè non possit, ubi maxime fodicat, & stimulat uis morbi, quemadmodum cutem suam di-

z laceret,

laceret, uocibusq; inconcinnis obganniat, anhelitus efflet graues, & mirandum in modum corpus, uultum, membraq; iactet, atque distorqueat: qualem hunc, quæso, & quo ex genere hominem esse statueritis? Atqui talis ferè est, attentè si inspexeritis, uniuersa eorum uita, qui se potissimùm dicant, & dedunt corporis uoluptatibus: alij enim in epulis, & ebrietatibus hoc idem efficiunt: alij in congressionibus corporum, turpitudinèq; libidinum: nonnulli etiam sitim medicamentis colligunt, ut sit potandi maior quædam iucunditas: plures sine fame & siti, & sine uehementi aliqua cupiditate, sola recordatione suauitatis adducti, uino, gulæ, libidiniq; insensuiunt: qui semet etiam inuitant ipsi, excitantq; languentis: nihilq; prorsus præterire earum rerum uolunt, quas aliquando nouerint afferre delectationem solitas. Quod quidem proprium & præcipuū falsæ atque corruptæ in nobis rationis malum est: idemq; non necessarias suscitans cupiditates: Nam cætera animantia quoquo pacto se gerant, cum contrarijs molestijs ad appetendas illiusmodi uoluptates compulsa sunt, naturæ tamen plerumq; finibus continètur. Homo solus corporis uoluptatem, non necessitate (nam ea quidē faceret sibi ipsa modum) sed ratiocinatione falsa demetiens, in eiusmodi genere cupiditatū, insatiabilis prorsus, & infinitus efficitur. Atq; horum duorum generum quæ memorauimus, auari illius dico, huiusq; uoluptarij, tanta est à

est à ratione recta animi & uoluntatis auersio, ut nulla bestia sit, quàm utrunq; est istorum, aduersus uocem ueritatis agrestior: nam neque castigatores ullos hi perferunt, & rectè suadentibus semper sunt inimici: ipsi uerò ultro eludunt etiam cæteros, suaq; cuiq; alibi studia, quàm in corporis uoluptatibus collocāda esse negant, propterea quia quicquid non manu & corpore teneatur, inane id totum, & superuacaneum iudicant esse. Sunt alij, nimis cupidi illi quidem, & studiosi uoluptatum, sed tamen in eo uisio aliquanto leniores, qui uoluptates potissimum eas consecretantur, quæ sensuum propriæ sunt: nec ita magnam habent cum illa corporea parte contractam rationem, ut qui musicis & cantibus assidue dediti, personare aures suas uocum, & fidium, & tiliarum cantu semper uolunt: aut qui oculis rapiuntur in omnem cupiditatem, ut signorum, tabularum pictarum, argenti uestisq; stragulae, gemmarum quoque & margaritarum studio propè infinito ducantur, domos autem suas ita refertas habeant atque exornatas, ut nil festiuius, neque concinnius ne cogitari quidem possit. Sunt etiam qui odoribus præter modum delectentur, & eorum innumerabilem undique conquirant uarietatem. In quibus tribus sensuum uoluptarijs generibus, luxuria præcipuè ea inest, quæ etsi libero homine putatur esse dignior, frangendis tamen & uiri, & uirtutis neruis, uim permagnam habet. Restat ut de ge-

nere illo tertio & præcellente dicamus, quod si peculiari suo solum munere fungatur, & in una contemplatione ueritatis positum ad reliquas partes aspectum nullum referat: homines efficiet squalleis & mæstos, nil ferè habentes cum humanitate commercij: & ad omnia quæ occurrerint quasi obstupescerent. Sin autem cum sensibus sociatū atq; iunctum, illis ut ministret, & subserviat, adductum fuerit: cō maxime adnitetur, ut popularem gloriam, & potentiam in primis assequatur: uimq; aliquam uehementiorē nactum, urbes, populos, regna sæpenumero euertet. Sin autem animo fuerit infirmiore, & tenuioribus opibus, ad illa cōuertetur, ut nimio uisitu cultuq; corporis, aut alio quodā ostentationis artificio, cogat se spectari. Sed quid ago? sanus'ne sum, qui tantam errorum molem, quantam omnis uita fert, euoluere me posse atq; explicare sim ratus?

Hic CITRARIUS, Imò fecisti tu planè operæpretium, inquit, qui ista nobis ante oculos adduxisti, ex quibus facilè deinde sit ad reliqua coniectura accedere: Video enim iam planè, & cum animo meo cogitans intueor: non hos solum, qui in unius partis finis præcipuè insistant, sed istos etiā qui cunctarum fines partium, atq; extrema cōsecantur, nisi apto cōmensu quodam, & bene examinata ratione id faciant, inæqualem eos, & confragosam uitam ducere, conficiq; semper solitudinibus & molestijs: ut non minutissimis corpusculis Democritū inane, quàm

quàm huiusmodi dissidij & conflictationibus animorum, refertior uita sit : quibus quidem rebus lumen afferri, atque ordinem, præclarissimam rem esse, intelligere mihi uideor: si tamen hoc præstari à Philosophia ipsa possit. A T Q V I, inquam, pollicetur illa hoc quidem : Sed illud quoque, Citrari, intelligere te puto, ordinem istum, atque lumen, de quo narras, sine cognitione certa earum rerum, ad quas adhibitori nosmetipsos sumus, haberi planè non posse. Q V I D N I intelligam? inquit : an quisquam rerum earum, quas minimè nouit, prudens director esse potest? Q V I D S I, inquam, homo eiusmodi est, ut si se totum præstaturus sit, cuius rei disciplinam, ut antea diximus, Philosophia profitetur, omnia illa intelligat, & noscat necesse est: quibus cum, commercio, aut usu, aut cognatione aliqua est implicatus, num tibi uidebitur quicquam in rerum natura penè esse, quod non illi cognitum, & perceptum esse debeat? V I X uideor hoc posse inficiari, inquit. A T Q V I confiteare hoc quidem necesse est: omnia enim prorsus illi noscenda, & compræhendenda sunt: uerūtamen modo quodam singulari atque suo: Est enim duplex rerum cognitio: Altera, quæ in partibus explicat se, atque dispertit: Altera, quæ in genere summo, atque uniuerso est collecta. Primam illam artes & opificia, & circumscriptæ terminis, limitibusq; scientiæ: secundam uerò cognitionem Philosophia sola comple-

ctitur: atque ut dicebamus, talem præstare hominem, aut talem, huius esse, uel illius artis: ipsum autem hominem præstare quicquid ipse est, proprium esse Philosophiæ. Item dicimus nunc in cognitione talem esse rem, aut tantam, aut huiusmodi ad scientias artesque peculiares: id autem ipsum simpliciter, quod res quæque est, ad Philosophiam unam ut cognoscat, pertinere. Quid est ergo quod uehementius homines in errorem inducat & fraudem, quam inferioribus niti notionibus, superiores autem illas & primas non tenere? Vt puta, diuitias sibi bonum arbitrari, cum quid bonum sit, & quæ sit eius rei uis ac natura, in uniuersum non intelligatur. In quo quidem uno principe bono atque summo, eiusque cognitione & scientia, omnium deinde bonorum, quæ ex illo effluunt, posita & collocata est ueritas. An tu alium fontem bonorum ullum & noscendorum & tenendorum existimas esse, quam ueritatem? Veritas est lumen illud atque ordo, quem modò adhiberi rebus aiebas oportere. Quod cum animi oculus cognitione, intelligentiaque compræhenderit, idque & actionibus suis proponere, & præferre sibi ipse coeperit: tum tutò uestigia ponere, tum uanos illos terrores, inanesque blanditias falsarum opinionum, quæ totam improvidam uitam perturbant, depræhendere, atque discutere, & se in arce ueri boni poterit constituere. Veritas enim est, quæ instruit nos & docet, quid quæque res, quantique sit, & quantum eadem

eadem nobis conferat ad uiuendum. Veritas est, quæ nos nostrimet gnaros & prudentes esse facit: nec solum primam illam & inchoatam, quam suprà diximus, sed absolutam, & integram nobis dat nostrum cognitionem. Veritas, cum res nobiscum, nosq; cum ipsis rebus comparat, atque componit, modum ipsa una & dimensum illum tradit, per quæ res nobis, nosquemet rebus ipsis ita applicamus, & adiungimus, ut neque obruamur nimia copia earum, neque remaneamus ipsi uspiam inanes. Quid est, quod uerorum bonorum & intelligētiam monstrat nobis, & adipiscendorum tradit facultatem? Quid nos ipsa uia & explorato itinere ad optatos fineis ducit? Quid potissimum facit, ut sine metu, & sine pœnitentia rectis consilijs usi, pacatam, ac iucundam traducamus uitam? Nimirum omnium huiusmodi bonorum, & aliorum etiam maiorum, ac præstantiorum, quæ à notione uulgi magis remota sunt, origo nobis, & caput, & stabilimentum, est ipsa ueritas. Vt ambulare in tenebris sine lumine, sic periculosum, & præceps est peragrarè, & conficere uitæ uiam sine ueritate: & mehercule, si alterutrum è mundo tollendum sit, multò minore incōmodo diurno sidere, quàm ueritatis luce careamus. Quis enim falso bono potiri uoluit aliquando: aut quis unquam extitit, qui duos, & graueis in uita cum exantlasset labores, eo ad extremum præmio contentus esse posset, quod inanis & falsa utilitas

attulisset: Quapropter, Phœdre, cum sapiētiae omne iudicium ad multitudinis opinionem contulisti, hancine spreuisti Philosophiæ uocem, quæ ueritatis studium primarium esse omnibus uult: rectasq; etiam opiniones, si quæ aliquando absque certa ueritatis cognitione existunt, cæcis comparat, casu rectum iter insistentibus? an est quod proferri indignius possit, quàm sapientiam nescire se ipsam, sed tantummodo quadam opinione de se niti? Quis hoc è uulgo infimus homo non facit? Ergo satis erit nobis, non quidem scire beatè uiuere nos, sed solum opinari uiuere nos beatè. Quot multos enim uero hominum, quotidie ista opinio decipit? Non est hac opinione contenta, non in hoc nostra conquiescit Philosophia: Scire nos id ipsum ac nosse se apprimè uult: Itaque tradit uias noscendi, & intelligendi, neque beatam uitam, nisi scienter illa animaduertatur, & agnoscatur, ullius nobis ad iucunditatem animi, esse momenti putat: non plus quidem quàm stipiti aut arbori, quæ ramis pomisq; insigniter adornata, suam ipsa uiriditatem feracitatemq; non attendat. Quòd si ueritas quoque definienda est, & tanta res tam paucis in cōspectu quasi ponenda: Dicimus, ueritatem aliam in ipsis rebus inesse, aliam autem in nobis. In rebus ueritas est, primum illud ipsum, quod quæque per se res est, quod tantum habet una quæq; res de natura, quantum habet de ueritate: Deinde, rerum ipsarum inter
se con

se consensio & concordia, cum responsus quidam in his sit, aptaq; compositio: secunda quodam modo naturæ ueritas est: orta illa quidem ex superiore illa, & simplice: sed nobis, qui ab humilioribus scandendo ad alta nos attollimus, anterior, & primò obuia. Ad has porrò naturæ percipiendas ueritates, cum se applicat nostra intellectio, ad easq; sese componit, atque exæquat: tunc naturalis illa ueritas, tanquam in speculo, relucens in anima nostra, imaginem diuinæ nobilitatis in nobis constituit: si & noscamus opera, atque consilia præpotentis Dei: & quoad homini licitum est, in consilijs item nostris illa imitemur. Ac ut præclaro hoc ab auspicio, & ueritatis tanquam fundamento, proficiscamur ad reliqua: percipiendum uobis illud est, trinas illas in nobis facultates animæ atque partes, ex quibus nostra omnis natura compacta sit, non posse ritè præstare commune omnibus munus, nisi in suo quæq; peculiari munere priuatim prius instructa & erudita sit: quod in illa infima parte statim fit manifestum: ea enim sola à cæteris partibus abiuncta, opus tueri suum potest: in sensibus quidem, quis non uideat, non posse hoc album atrumue, quod ad functiones uitæ pertineat, appeti aut uitari: nisi prius atrum cognoscatur, atque album. Quanquam de cæteris minus negotij fortasse sit: ratio quidem nostra, quæ illud ipsum est, quod sumus nos, domina & rectrix humanæ uitæ, per quā

A habe

habemus, atque obtinemus, non quod uiuimus dumtaxat (id enim potuit uegetabilis pars, quæ infimi generis & muneris est, præstare) neque uerò etiam illud, quod cum uoluptate & suauitate uiuimus: Est enim sensibilis in nobis facultatis in primis hæc oblectatio: Sed quòd decoram, & splendidam, & cum dignitate agimus uitam, præcipuū est in communitate rationis munus, atque officium. Hæc igitur inquam ratio, nosse ipsa prius, & apprimè tenere debet, quid pulchrum sit, quid honestum, quid splendidum, antequàm illud in commercium reliquarum partium deferat: Et denique princeps omnīs ueritas rerum illi percipienda est, antequàm eam exprimat, ac referat in ueritate actionum. Quæ cum totam ratio uitam hominis contineat, partesque illi ceteræ pareant, eamque consequantur: nimirum de ea nobis potissimum sermo habendus est, ut uideamus primū, qui rectus illi usus suimet per semetipsam & separatim à reliquis sit: deinde qui in reliquarum partium comitatu & coniunctione. Quod his duobus rite expositis, cunctam uim Philosophiæ, ut opinor, explicatam & perspicuam habituri sumus. Est igitur rationis, cuius nomen à ratio deductum est, discernere ea, quæ rata esse debeant: hoc est, uera, firma, constantia: quam facultatem profectò in his mortalibus & fluxis reperire ipsa nequit. Quocirca ad ea conuertat se, & conferat oportet, quæ sunt perpetua, & immortalia: quòd

quod si etiam in his, quæ gignuntur passim, & intereunt, aliqua imago existeret perpetuitatis, quæ lis fortasse in ipsis generibus inest, quorum uniuersum semper permanet, indiuidua quotidie dilabuntur: in optima tamen, & constantissima parte naturæ illa quærenda est, ut ubi maximè lucet, ibi potissimum ueritas exquiratur. Est enim eiusdem scientiæ & facultatis, cum tractare de re, quæcunque illi res subiecta sit facultati, tum de ea summa absoluteissimæque tractare. Cum igitur peculiare officium rationis sit, indagare ueritatem: in diuinis autem & sempiternis maximè existat ueritas: diuinorum indagatio in primis rationi est proposita. Hic me recens ista Academiæ non permouet, quæ percipi & compræhendi negat posse ueritatem. Neque enim illi ne istud quidem ipsum esse perceptum potest. Non est omnino de singulis argumentandi locus: Tantum contrà dico, si ita res se habeat, quemadmodum autumat illa, & perstrepat: frustra & in nobis, & in natura ipsa factam & constitutam esse rationem: Vt enim suprâ demonstrauimus, quod usum sui nullum habet, id non modo frustra est, sed neque ullo pacto esse potest omnino. Vt si intellectio non sit, ne ratio quidem existat: cuius officium cum sit intelligere, solum autem quod uerum est id intelligatur: adempta ueritate intelligendi, funditus tollitur è natura, &

A : exterm

exterminatur ratio, cui conclusioni constanti & firmæ quàm multa incommoda absurdaq; sequantur, profectò intelligitis. Sunt alij agrestiores, negantes utilem homini esse diuinorum cognitionem: quos patet nullam utilitatem agnoscere, præter eam, quæ tactu & corpore percipiatur: At ea maxime bruta & aspernabilis præstantibus animis iudicatur utilitas. Sed ut redeamus, unde digressi sumus: Ratio semetipsa uolens uti, & separatim exequi munus suum intuendæ ueritatis, sensuum quidem adminiculo primum nixa est: initium enim illi primum animaduertendi, deinde pertentandi, ac paulatim altius erigendi se, atque attollendi à sensilibus factum est: ex admiratione enim eorum, quæ in natura sensili maximè spectabilia sunt, primum orta esse dicitur Philosophia: post uerò ubi fatis his instructa, & adminiculata ratio esse coepit: cum ad principes naturæ causas, illasq; generales notitias, rerumq; rationes inuestigandas se datura esset, ne simulachris sensilibus distraheretur, quæ uaria & multiformia, sæpeq; inter se repugnantia, mentem, cogitationemq; obturbant: necesse habuit subsidio sibi aduocare artes alias quasdam, tanquam puriores exercitationes fuimet: quarum usu tractationeq; assuefacta, posset paulatim extollere se, atque eminere, ut Arithmeticam, omnemq; mathematicam cognitionem: cuius ea uis est, ea'que
exerc

exercitatio, ut mentibus nostris rerum in corporibus iacentium, atque insitarum, naturam speciemq; proponat, sine ulla corporis mixtione. In primis autem & maximè adsciuit Dialecticam, quæ ars nulli nominatim rei naturæue præfecta: ipsas tantummodo ratiocinationes per sese, & mentis quasi ex uno in aliud transitiones ac peragrationes, metiri, & perpendere, & æstimare nata est: quæ cui uis delictet ratiocinationi ratiocinatio conueniat, aptaq; sit: quam quæ antecedit, aut consequatur: quid sit repugnans in illis, & ambiguum: quid distinctum, & illustre: quæ sit plurium inter se ratiocinationum contextio, aut etiam disparatio: & quarundam insociabilitas, aliarum ita arctè hærens connexio, ut diuelli nō possit: his enim ipsa ratio in se prius examinatis, ac perpenſis, ubi uires suas domi iam perspexit, exploratasq; habere cœpit, tum demum sic egredi in aciem, & ad contemplationem naturæ tutò ausa est accedere. Ac primo quidem ortu Philosophiæ, antiquitus (sicut monumentis literarum est mandatum) ex rerum illa cœlestium aspectu excitata ad cupiditatem cognoscendi, cū Solis & Lunæ, errantiumq; syderum, nec non eorum quæ semper cœlo inhærent, motus, formas, pulchritudinesq; spectasset, uicissitudinesq; notasset anniuersarias, & cum admiratione maxima tantarum descriptiones rerum contemplata esset, ex ratis ordinibus eorum, perpetuisq; cursibus, eadem semper inter

ualla lege certa seruantibus, suspicari cœpit, esse autorem, & principem huic mundo quendam, cuius imperio & nutu mouerentur cuncta, & regerentur: Neque sola hac suspitione contenta, ad peruelligandum se dedit, si quid posset de eo firmi, certiq; concipere. Amoto igitur oculorum sensuumq; adminiculo, ipsum motum in sese, ipsumq; tempus, & quæ horum duorum considerationi adiuncta sunt, infinitatem diuisionum, æternitatem seculorum, diuersitatem naturarū, inquirere est conata: cumq; uideret nil tam cognatum esse cuiq; naturæ, quàm motum proprium illi & congruentem, quòd in eo primum natura rei cuiusque ostenditur: perspicere cœpit, ex dissimilitudine naturalium motuum, dissimiles item rerum naturas indicari: itaque & cœlum propterea ex alio genere esse intellexit: atque ista inferiora corpora sunt quatuor, quæ generationi supeditant: quòd illud orbiculari motu deferatur: ipsa hæc recto. Et cum orbicularis motus perpetuus esse possit, rectus autem nequaquam: distincta à terrenis cœlestia mortalitate esse, & immortalitate intellexit. Porro autem cum motus omnis aliquid quærat, quod nō habet in se: idq; cupiat assequi, ex quo omne quicquid moueatur, haud planè perfectum, nec cumulatū omni bono esse intelligatur: ipsum autorem & principem uniuersi, unde omnis ista tantarum rerum, motuumq; descriptio ortum atque ordinem suum obtinet, unum & sempiternum, eundemq;

demq; præpotentem & prorsus immutabilem necessariò esse cognouit: Ad quem intelligendum, riteq; compræhendendum, quando quidem sine eo nec ueritatis, nec ordinis, nec conuenientiae ullius, ipsiusq; decori notio ulla firma & stabilis haberi potest: cum in primis uocet nos, & acuat Philosophia: utinam eò tam faciliè aspirare possent mentes nostræ, quàm nos id auemus, & cum ardore maximo expetimus. Sed si minus nominatim, & directè, aliis qua tamen circuitione, & exemplo, informanda nobis nunc est præclara hæc, & admirabilis Dei summi cognitio: cuius similitudinem in ea re capiemus, quæ sensibus nostris una omnium maxime aperta patensq; est. Siquidem hoc Sole, qui fons diurni luminis est, nihil nec cogitari potest illustrius. Quoniam autem sicut omnis cognitio mente atque intelligentia nobis est compræhendenda: sic sensum quendam habemus, qui simili ferè modo naturam luminis percipiat: noscenda huius ipsius sensus uis, actioq; est, ut eam deinceps cum mente & actionibus mentis comparemus. Nam cum omnium sensuum facultas, ad ea quæ cuiq; sensui subiecta sunt, percipienda, nata sit: in sensibus reliquis satis est adesse subiectam rem ut sentiatur: in oculo & uisione non est satis: tertiam enim quandam naturam adesse oportet, & eam quidem multo præstantiorem, splendoris, luminisq; uidelicet, quæ ad hanc rem eam ipsam facta, creataq; est, ut uisioni ipsa sit adiu

adiumento: tantò fabricator ille cunctorũ sensuum
Deus, uim uidendi cæteris pretiosiore finxit: iu-
gauit enim facultatem & uidentis rei, & uisæ, ut ad
uidendi actum ueniri posset splendidissimo naturæ
genere: nisi fortè uile & abiectũ est in natura quod
nominamus lumen. Atqui huius tam ampli, tamq̃
preclari muneris, quod lucere est: itemq̃ eius, quod
effluit, manatq̃ ex isto, quod est cernere, atque cer-
ni, unum in cœlo dominum autoremq̃ agnoscimus,
per quem optimè ista, perfectissimèq̃ fiunt:
quem nuncupamus Solem: nempe quia solus cœ-
lum atque terras lumine suo compleat, reliquaq̃ ab
eodem astra mutuentur lucem eam, quam possidēt:
porrò oculus ad Solem, tanquam ad suum bonum
natura est conuersus: non quòd oculus quidem,
nec quòd ipsa uisio efficiantur Sol: sed quia sensus
hic unus maximè est solaris, uisq̃ ea omnis, quæ ad
uidendum sit, ex hoc sidere tota hauriatur, & per-
fluat, usque eò quidem, ut & quòd intuemur Solem
cũ ipsum, & quòd præterea reliqua cernere omnia
possumus, totum ab illo cœlesti lumine teneamus.
Hunc igitur ipsum Solem, diuinæ illi essentiae &
unitati, quæ cunctorum summa, & princeps causa
est, fonsq̃ bonorum omniũ, & uerum ipsa solumq̃
suapte uí bonum, imagine quadam comparamus,
similemq̃ ostendimus: ut eodem modo illa in intel-
ligibili loco: Sic enim conuertimus, quod Græci
νοητόν: Et sanè necesse est, fidentius uti uerbis in sum-
mis

mis rebus explicandis, & declarandis : quod etiam modò factum à nobis est, cùm essentia nomē, Græco nomini, quod *νοία* est, Latinum reddidimus : faciemusq; in eo quoque, si necesse fuerit, ut uerbum infinitum, sine persona & tempore, nominis loco ponamus : quod cùm Græcis ipsis perquam usitatum sit, uidetur quoq; nobis interdum esse concedendum. Sed ut dicere cœperamus, ita illa alta & longè eminens rerum omnium ratio intelligibili in loco, ad mentem habet se, & ad ea, quæ mente percipiuntur, quemadmodum in hoc uisibili sol sese habet ad oculum, & ad ea quæ oculis comprehenduntur : oculi enim si ad eas intuendas res conuersi sint, quarum colores non diurnum sidus, sed nocturnæ luces offundant, hebescent quodāmodo, & retunduntur : similesq; fiunt cæcutientium, & hallucinantium oculis, ea re quidem, quòd pura ipsi uisione minimè tunc fruuntur : Si uerò eò se moueant & intendant, quæ sol illustrat : tum & clarè, liquidoq; cernunt, & eadem quoque claritas in eis ipsis inest. Igitur in anima eadem proportione est noscenda ratio, atq; attendenda : Dum enim anima ad id percipiendum intendit se & adnititur, in quo ueritas & ipsum esse è regione refulget : quod est, ut lux à Sole, sic istud ex Deo intelligibile quasi lumen : intelligit id planè atq; noscit, mentemq; sibi ipsa habere in se & possidere tum uidetur. Cùm uerò eò se conuertit, ubi tenebræ admixtæ sunt : in id quod gene-

B ratur,

ratur scilicet, & quod corrumpitur, quodq; simu-
 latis & fictis obtunditur imaginibus: tunc halluci-
 natur nimirum, & quasi somniat: uarijsq; ultro ac
 citro iactata opinionibus, mentis sibi ipsa, ac intelli-
 gentiæ uidetur inops. Hoc igitur summè præcellens
 ac diuinum, quod & rebus cognitis præbet uerita-
 tem, & cognoscentibus uim cognoscendi: caput
 ipsum naturæ totius, & absolutissimam speciem o-
 mnis boni, in Sole nobis similitudine propinqua,
 repræsentari cernimus: quod idem omnis scientiæ
 & ueritatis est causa: ueritatis, inquam, in rebus qui-
 dem factis, quatenus illas ut sint facit: nostra autē in
 anima, quatenus eam lumine illo intelligibili, & ex
 sese, & ex rerum essentijs ab eodem ipso manantibus,
 informat, atq; illustrat: qua quidem ex ueritate ge-
 neratur scientia, quæ est rerum eodem modo sem-
 per se habentium firma mentis intelligentiæq; com-
 præhensio. Sed ut in natura uisibili, oculum & lucem,
 solares quidem uirtutes, & facultates conuenit ap-
 pellare: Solem autem nequaquam, quod Sol utriusq;
 his multò præstantius quiddam, atq; eminentius in
 sese habeat: sic in intelligibili genere, scientiam &
 ueritatem, res nimirum bonas atq; diuinas, non ta-
 men Deum ipsum atq; illud supremum bonū exis-
 timare debemus: quippe quod admirabili quodam
 interuallo uirtutis, amplitudinis, potestatis, his o-
 mnibus antecellat: magnificētiusq; multò sit, quàm
 ut ueritatis, & scientiæ finibus possit includi. Atque
 ut perg

ut pergamus etiam ad ulteriora, in eadem tamen si-
 militudine insistentes, Sicut Sol ips, quæ cernuntur,
 non solum facultatem hanc præbet, ut queant cer-
 ni, sed generationem etiam, & accrementum suppe-
 ditat, & educationem: quod horum omnium geni-
 tis rebus atq; alitis, Sol causa est, neque ipse tamen
 uspiam est generatio: sic his quæ cognoscuntur &
 intelliguntur, non hoc tantum ab summo adest na-
 turæ bono, ut intelligantur, sed ut sint ea etiam, atq;
 existant, & ut suam quodq; illorum obtineat essen-
 tiam. Sed ut aliquando abeamus à similitudinis com-
 paratione, quam præsertim uel leuiter indicasse af-
 fatim uobis sit, dico hoc munus esse menti nostræ
 peculiari ipsius officio attributum, ut in intelligibili
 percipiendo genere, & inquisitione ueritatis se exer-
 ceat: quam si in æternis, & sibi semper constanti-
 bus non perspexerit, neq; in illis ueritati familiarem
 se effecerit: næ illa in his uariantibus semper & dif-
 fluentibus, nunquamq; in eodem permanentibus
 statu, frustra uenari illam, & indagare conabitur:
 infirmisq; semper nutabit assensionibus, & ambi-
 guis opinionibus distrahetur: uiam uitæ certè nul-
 lam unquam inibit, qua æquo animo usque ad ex-
 tremum patiatur se deduci: sed reuocabit crebro se,
 & retexet, sæpeq; in poenitentias graueis, & mæro-
 res, tanquam in scopulos saxaq; delata, faciet uete-
 rum suorum consiliorum naufragium. Quod in il-
 lis magnis & præpotentibus uiris, qui in hac urbe

& Repub. quondam, alijsq; item in ciuitatibus ac populis, autoritate & gloria rerum gestarum florere uisi sunt, ferme omnibus contigit. Sed, ut sint, qui hanc præcipuæ, summæq; ueritatis absolutâ notionem ad communē hanc peragendā uitam haud ita multum esse necessariam putent: in quo etsi imprudentia labuntur, habent tamen paratam ex hominum quotidianis moribus, & studijs, erroris sui defensionem. Nos qui ueram hominis præstantiam, ac dignitatem è Philosophia quærimus, summumq; ex ea bonum nitimur consequi: si rerum altissimarum cognitione nos esse instructos uolumus, num sumus propterea iure repræhendendi? Atqui dicimus planè, sine ijs, ordinem rectè uiuendi teneri nullo modo posse: nisi enim prius ratio ipsa explicauerit semet, totamq; perspexerit, & domestica sui primùm, æternæq; secum ueritatis scientia erudita, tum demum accesserit ad considerandum hæc humana, eaq; tractandum, ac dirigendum, ars bene uiuendi perpetuò cōstare nulla poterit. Sed cum rerum earū, quæ in mūdo & natura sunt, causarumq; quibus illæ effectæ in lucem prodierūt indagatiōe omniū, & curā cognoscēdi Philosophia profiteatur: singulari est explicatio in suis libris atq; locis, cum ab autoribus cæteris, tum uerò in primis ab Aristotele petēda: non enim nobis propositū est in præsentia singulas res persequi. Illud propositū, ut quoniā ratio nostra non ad intelligēdum solūm, quod ipsa
per se

per se & seorsum facit,uerum etiam ad agendū atq̃
 imperandum,quod est illi in communitate cum cæ-
 teris partibus officiū,genita factaq̃ est: istud ipsum,
 in principe & moderatore omnium rerum Deo,
 consideret prius, & intueatur,quod regere est & im-
 perare: ut illius deinde exemplo & imitatione eru-
 dita, diuinam quandam illinc magnificentiam, &
 administrandis rebus facilitatem, ad hæc humana
 & inferiora transferat: quod est totum illarū actio-
 num,quæ positæ in consilijs sunt, non in operibus
 manu factis: quarum quidem actionum splendor
 omnis, & pulchritudo hæret in ipso homine, penis
 usq̃ insita est. Etsi enim cœlum hoc, totusq̃ iste
 mundi ornatus,pulchritudine & decore præclaris-
 simus sit, diuinicq̃ ordinis conuenientiam & uenu-
 statem, cum admirabilitate maxima, mortalibus
 oculis ostendat:ut quod undique effulgeat pulcher-
 rimorum luminū distinctione & copia, cursibusq̃
 propè immensis,& non enarrabilibus torqueatur,
 usque eò quidem, ut satiari mentes humanæ non
 queant spectando illud, atque mirando: tamen
 pulchriora multò sunt,& magnificentiora Dei cons-
 ilia,quibus editum id in natura, & eiusmodi factū
 est. Videndum est igitur hoc consilium, & tantæ
 gubernationis ratio est noscenda:quò nos,qui par-
 ticipes esse diuinitatis cupimus, ad rationem, ean-
 dem deinde, simileq̃ consilium, nostra & cogitata,
 & acta accommodemus. Nec uerò dubium esse pos-

test, quin decor, & dignitas, & pulchritudo, in summo Deo, omnibus rebus ortum causamq; præbuerit. Est enim pulchritudinis, maximè conciliare amorem, appetitumq; gignere congregandi, & potiundi: quo quidem appetitu ex illa Dei specie honestissima in natura excitato, cunctus iste mundi, & corporum omnium apparatus, ad conquiendum Deum, ut suum bonum, se erexit. Pulchrum porro est, quod & in semetipso decens est, & commodum, atque utile cæteris. De illa pulchritudine nunc loquor, quæ mente intelligentiaq; compræhenditur: cuius umbram quandam fert, hæc quæ in corporibus descripta est pulchritudo, tantam ipsa quoque uim possidens, ut non absurdè de illo rege uideatur dictum, speciem primùm dignam esse imperio. Sed ut ad pulchrum princeps, illud quod est rationis & intelligentiæ, redeamus, Nemo unquam ueriores, digniores, appositiores pulchri ac decori speciem rationem uel expresserit, quàm hanc, quæ sit in eo, quod est prodesse cæteris, sibi sufficere, & conueniēs esse, quod utrunque in pulchro inesse est necessarium. Nam ut in corporum formis uidemus, quarum omne oculorum est iudicium, si qua pars corporis, à cæteris partibus sui dimensus, portione discrepet: non uerè illum, in quo insit uitium hoc, formosum posse appellari, propterea quod species in eo à conuenientia discessit, egetq; alio quopiam, ut expleatur & perficiatur: iccirco & amabile minus est

est, & minus appetitur, quòd neq; delectare admodum potest propter incongruentiam, neque adiuuare propter egestatem: eget enim & ipsum aliunde adiumento: sic illud simplex, & menti propositum pulchrum, quod omnes congruentias honestatesq; in se continet, nulla ipsum parte sui imminutum, nec indigens, contráq; omni bono ac decore cumulat, atq; completum, concursus omnium rerum excitat ad obsequendum, & obediendum sibi, ut quælibet res ad nutum præstò sit, cupiatq; illi nauare operam suam: quippe quæ experiatur & sentiat pro eo, quantum illi se dediderit, & ad accipienda illius imperia se subiecerit, tantum se & iucunditatis, & commodi ad suam explendam naturam esse reportaturam. Hac igitur imperium ratione Deus, & hac facilitate regit uniuersa ac permouet: quòd semper agit id, quod se ipsum primùm deceat: deinde sit utile cæteris: & cum alijs bonum utilitatis impartiuerit, ipse suum retinet, quod est decori, dignitatis, amplitudinis bonum. Quò etiam fit, ut in effectiõibus naturæ & operibus, nulla uerior ratio, neque constantior reddi possit, quam ob rem quicque sic effecerit Deus, quàm hæc, quòd ita eum facere decuit, & quia rei effectæ illud fuit optimum: ut & à dignitate illius qui agit, & ex eius, quod agitur, emolumento ac commodo, ualida in primis fortisq; sit argumenti conclusio. In quo tamen ipso ubique, & præcipuè, decorum illud elucet, quod præcla

præclarum in se atque munificum, dupliciꝫ hac de causa amabile cæteris, facit, ut facile imperium sit in uolētibus, nulloꝫ nisi conatuꝫ ue laborioso, omnis rerum molitio gubernatioꝫ transigatur. Et hæc-
 nus quidem Philosophia hominis rationem in suo & proprio munere continet, ut in speculandis na-
 turæ operibus illam exerceat, eaqꝫ eam edoceat, in quibus origo est, & sedes, & domicilium ueritatis. Quæ quatenus in summis & sempiterna immuta-
 bilitate constantibus uersatur rebus, iure ac merito dicta est sapientia; fontes enim in illis sunt & scientiæ omnis, & prudentiæ. Qua uerò ad mutantia genitabiliqꝫ confertur, scientia naturalis, eadem Græcè Physice est appellata. Moralis autem, cùm humanis dirigendis actionibus adhibetur. Qua tri-
 membri diuisione in Philosophia exposita atque monstrata, præclare illa definitur rerum esse sci-
 entia, & diuinarum simul, & humanarum. Nunc quando iam satis, quod ad præsentem quidem nos-
 tram disputationem pertinet (nam ad rem ipsam, pleniorẽqꝫ doctrinam non satis) de officio seorsum & per se humanæ mentis est dictum: quod in prioribus duabus illis Philosophiæ partibus, sapientia uidelicet, & naturali scientia, positum est: Restat communis totius hominis, non iam partis in eo separatim alicuius actio, atque exercitatio, moralis scientiæ propria: ad quam cum nunc Philosophia deductura est: rectumqꝫ suimet in ea usum, ita
 illum

illum edoctura, ut nulla neq; uirtutis, neque officij pars, quæ ad beatam consequendam uitam pertineat, in hoc quoq; genere prorsus relinquatur. Et enim ab illis altissimæ ueritatis consilijs, & rerum æternarum speculandis rationibus, in quibus tanquam cognata illarum, atq; eiusdem cum illis nobilitatis consors, semetipsam mens præcipuè agnoscebat: fruebaturq; tum uero, & suæ naturæ munere, & sapientiæ nomine: deflexa ad animaduertendum conditionem necessitatis suæ, quòd cum alienis & longè dissimilibus sibi generibus conflata, permulta obire simul cum ijs, atque unà agere cogeretur: primo quidem aspectu uehementer perturbata est: assueta enim tranquillitati, & ordini rerum sibi constantium, & nusquam ab eo, quod idem est, digredientium: ut uidit motus sociarum partium incertos, & uarios, nullum neq; modū, neq; ordinem suapte sponte retinere, eosq; cum importunos sibi, ac sepe numero molestos, tum inter se ipsos quoque rixari dissentientes: defleuit quidem illa primò conditionem status sui: quòd à beata illa cura fruēdæ, & cōtemplandæ ueritatis direpta, in turbam sese & in factionē impediuiisset: uerūtamen celeriter ad officium cōuersa, cum intueretur consiliū & uoluntatē summi Dei, non solū æquo, sed alacri etiam animo ad obediendū illi se dedit. Quid enim faceret secus, in illa serie rerū, ex quibus nexus est mundus, exercitata atq; alita: quarū admirabilis, cōtinensq; complexus,

plexus, paratus ubiq; ad obediendū Deo, apprime
 eam instruere potuerat, suū cuiq; rei bonū, in ordi-
 ne & obediētia huiusmodi, maximē quærendū esse:
 Igitur in hanc deliberationē se cōtulit, ut quos diuī-
 na fors sibi dedisset comites, cum eis statueret pacatē
 & cōcorditer uiuere. Atq; ut in re perdifficili & ar-
 dua, ad Philosophiæ, quò solebat, confugiēs opem,
 admonita ab ea ipsa est, ut agitationis & incertioris
 agēdæ uitæ disciplinam, ab eis rebus acciperet, quas
 stabiles & certas in natura cognouisset: regendiq; &
 imperandi ordinem totum atq; exemplū, illinc huc
 transferret. Quod quidem sic agere constituit: pri-
 mumq; illud animaduertere cœpit, expressam esse
 in sese, & in corpore eo, quod ipsa rectura esset; ima-
 ginem quandam tum præpotentis Dei, tum eius
 mundani operis, quod creatum factumq; à Deo,
 eiusdē etiam imperio & numine regeretur: ut quem
 admodum Deus in summo omnium consistens, re-
 bus incitatis & mobilibus imperat, immotus ipse,
 & semper permanens in eodem, globisq; corporum
 coelestiū alias præponit mentes, quæ in eum ipsum
 intuentes, ac nusquam ab eius lege & ordine defle-
 ctentes, moueant ceteriora corpora: ipsas uerò ua-
 rias & multiplices elementorum concursiones, con-
 flictus, illisiones, quoniam minutatim sub ordinem
 certum redigere non licebat, illa uniuerſa lege coër-
 cuit, qua paribus omnia librata ponderibus, & uim
 inter se æquam obtinentia, finibus se suis singula
 continent:

continent; neque aliud alij supergredi, aut uiribus
& potentia preponderare est licitum; Sic mens ipsa,
tanquam alter in corpore humano Deus, stabili uel
ritate semper nitens, reliquas animæ partes mouens
do corpori appositæ, suapte sponte ordinis finis
umq; expertes, ad intuendum eum ordinem, quem
uera in sese descripsisset ratio, reuocaret: formamq;
illis decori pulchritq; offerret: qua specie diuina illa
lectæ illæ ad amorem, studioq; accensæ eiusdem
imitandæ pulchritudinis, & participandæ, cum
suum etiam præsertim in eo commodum sentirent,
atque experirentur, facile rationi imperium, & nula
impeditum controuersia, relinquerent. Itaque
mens stipata egregio comitatu illarum cognitionū,
quas in contemplandis rebus æternis antea perce-
pisset, sapientiā primū deuocauit de cœlo, eamq;
nonnihil hæc quoque inferiora ut animaduerneret,
compulit: uocauitq; eo nomine prudentiam: quod
hoc uerbum à peruidendo ductum, uoce ipsa indi-
cat, in res obscuras & suapte natura perspicuæ lus-
cis expertes, aciem esse ingenij, & mentis intenden-
dam. Porro autem sapientia in eo aliquandiu com-
morata, ut cupiditatum, & affectionum, omniumq;
earum appetitionum, quæ multiplices, ac uariæ in
animis nostris concurrant, causas, sineis, naturamq;
cognosceret, cum uideret eas temeritate quadam
præcipientes, subitasq; ferri, & ad ea expetenda, aut
refugienda, quæ per sensus interpretes, lætabilia,

formidolosa'ue oblata essent, sine modo discurrere: intellexit harum rerum causam esse comitatum illum, quo sentiens anima, cum uegetante coniungitur: quòd ex huiusmodi coniunctione plus illi partii abiectæ & ignobili, ab alijs sæpe partibus tribuatur, quàm sit æquum. Itaque prudentiam, quam ab se instructam consilijs, & rationibus ad res gerendas iam adhibebat, rectionemq; illi rerum humanarum in diuinis ipsa resistens, per manum quasi tradebat: admonuit, ut notaret, animumq; aduerteret, primam directionem humanæ uitæ, & fundamentum uniuersæ salutis, potissimum in eo consistere, si singulæ in homine animæ partes, suum unaquæq; & pensum, & precium obtineret: neque alteri altera de eius quicquam iure, honoréue decerperet. hoc enim uno modo demonstraui, concordiam, & pacem in animis constitui, uiamq; ad beatam uitam posse inueniri: si, quæ regendis, & in unitate continentis ciuitatibus, in primis necessaria est, prima in ipso homine iustitia extitisset: quòd ea uirtus uirtutum est sedes, & fundamentum reliquarum: per quam quisq; suarum rerum diligens curator, atque custos, aliena minimè appetit: neq; munus interrumpit alieni officij: quod ubi fit, ibi cum lætitia, & cum tranquillitate maxima uita degitur. Hoc igitur primum suscipiens prudētia, idq; exprimere ac proferre in agendis rebus studens, pensitatis cunctarū in homine partiū cōditionibus & meritis, statuit parti illi

illi uitali & infimæ tantum esse tribuendum, quantum ad uitam, & ad incolumitatem sat esset: cumq; ea pars consilio omni orba, legem, lumenq; rationis non modo nullum habeat ipsa in sese, sed ne aliunde quidem possit accipere: quo etiam nomine contemptissima est partium reliquarum, & obscurissima: quandoquidem, quod nec sua, nec aliena splendeat ratione, ordinis & elegantie totum est expers; tamen quia necessaria ad consistendum est, stabilitatemq; & ueluti solum, reliquis partibus animæ præbet, non mediocri studio à nobis conseruanda est: ut illo tanquam firmamento innixi, ad potentiora obeunda uitæ officia nos attollamus. Quam ob rem primum illi tempus, & prima curatio, superpeditandis uitæ necessitatibus attribuitur. Quo nomine ea etiam fit alicuius honoris particeps: ut si nobilitate cæterarum postrema est, anterior sit tempore; usque eò mirabilis ille prudentiæ contextus, in temperando, ac constituendo concordi homine, omnia inter se uinculis amabilibus illigat, atq; constringit. Sentientem uerò animam, quæ non omnis penitus necessitate deuincta est, sed habet aliquid in se liberale & splendidum: nam & uoluptatibus fruatur purioribus, & intelligibilem pulchritudinem illam, in aspectabiles oculis species, & sensilia simula lachra quodammodo transfert: eadem mens à prudentia instructa, ut sociam, æqualemq; complexa, eius rationis, quam ipsa in se insitam, atq; innatam

continet, & ueritatis eius, quæ ex intelligētia rerum
semper in eodem manentium, illi percepta est, par-
ticipem facere conatur. Qua ex communione men-
tis atque sensus, ritè & ordine per prudentiam fa-
cta, dignitatis species illa, quæ una omnium rerum
humanarum pulcherrimum est oculis præclarissi-
mumq; spectaculum, in uita & moribus & actioni-
bus hominum exprimitur. Vt enim alio loco me
recordor dixisse, in copulatu & compositione res-
rum plurium, consensus ille, atque ordo, & æqua-
bilis omnium inter se conuenientia, intelligentiæ at-
que menti ueritas est: oculis & sensibus pulchritu-
do ac dignitas: ut dignitatem definire si uelimus,
rectè sic dicamus, translatam illam ad sensum & ad
oculos, esse ueritatem: quæ dignitas aspectibus sub-
iecta, cum tantos amores sui in omni hominum ge-
nere concitet, cunctumq; orbem propè terrarum
irrequietum, & sollicitum semper habeat: intra eos
fineis est ingenijs liberalibus permittenda, ut ne una
quam prodat, neque deferat ueritatem: hoc est, con-
centum & concordiam animæ partium ne diuellat:
in quo & ambitioni, & populari gloriæ, & huic im-
peradi cupiditati, qua homines proiectè nimirum,
& præter modum efferuntur, posita lex erit. Vult
igitur mens, partem hanc sensilem ita suis frui uo-
luptatibus, ut aliena commoda non præterrumpat:
& neque illud inferius animæ genus, suis defraudet
utilitatibus: neque rursus menti ac rationi ad con-
stantiam

stantiam, & ueritatem omnia reuocanti intempesti-
 uis suis interpellationibus officiat: eademq; ratio,
 quæ totius hominis rector est, cum ad sua munera
 fungenda ipsa se confert, habet tamen semper alieni
 quoque temporis, & opportunitatis rationem: ut,
 ubi socijs, & cognatis partibus optimè prospexe-
 rit, tum libera & uacua, diuinis illis iucunditatibus
 sese impleat: ita æquatis omnium officijs, perpen-
 sisq; muneribus, cum unicuique datur parti quod
 est illi consentaneum, neque alia de alia pars parte
 quicquam detrahit: regnatq; quod ad regnandum
 natum est: paret, quod ad parendum: tum iustitia
 primùm in interiore homine per prudentiam exis-
 tit: Deinde ex iustitia oritur temperantia, ordo qui-
 dam uitæ, & ornatus, ac moderatio appetitionum
 omnium, nō uoluptatum illa penitus contemptrix,
 sed ingenuis ex eo genere, & liberalibus uoluptati-
 bus modestè dedita. Quarta uerò & difficilima
 omnium uirtus, quæ est fortitudo, oritur quidem
 illa ex superioribus, sed non tam optabilis ea uiro
 forti est, quàm interdum necessaria: non enim labo-
 res, ærumnæ, pericula, mortes, ipsa per se appetun-
 tur: neque libens quispiam uitam & salutē proijcit:
 sed ubi in discrimen uenitur, ut aut ista suscipienda
 sint, aut honestas amittenda, sine cunctatione ulla
 uir magnus atque præstās, honestatem sibi mauult,
 quàm uitam retinere. Quod contingere nequit, nisi
 in animis ita & uirtute, & disciplina cōstitutis, ut in
 illis

illis maxima sit autoritas rationis : quæ cum præscripserit aliquid, quod rectum esse, ac decere decreuerit, iusseritq; id agi, reliquæ ad obtemperandum partes præstò sint, imperiumq; rationis nauiter exequantur. Verùm cum uirtutes omnes reliquæ, tum in primis hæc, de qua loquimur, fortitudo, maximè alitur & corroboratur rerum æternarum scientia, & cognitione. Nam, nec qui infinitatem temporis mente compræhenderit, is ob cupiditatem uitæ paululum propagandæ, aliquid indignum forti uiro admittet; nec qui immensitatem mundi, orarum, regionumq; fuerit animo peruagatus, regnū ullum tanti æstimabit, ut eius assequendi causa, iusiurandum uiolare, arbitretur esse fas : denique pulchri ac decori illa cognitio, cui firmè & probè fuerit mente concepta, hic cœlestibus opibus scientiæ & ueritatis locuples factus, atq; (ut heros noster Plato inquit) natiuum in anima aurum possidēs, nunquam profectò pecuniæ gratia sordidum quicquam, & illiberale efficiet. Ex quo intelligi potest, uirtutum omniū semina, quæ à natura in animis nostris sata sunt, ex una ritè ali, ex coliq; Philosophia : neque sine ea unquam ad bonam frugem posse adolescere : cum, qui naturalibus uirtutibus tantūmodo, aut etiam more opinionèq; comparatis, nixi sunt : hi, ut unam in partem aliquam præclarè se dederint, in alia tamen parte non mediocriter sunt prolapsi. Plena exemplorum est historia : sed mihi properandum necessariò

fario est : inclinatur enim iam ad uesperum dies. Talis ergo iste uir, quem Philosophia instituerit, recteque eum semetipso edocuerit uti, constitutis per prudentiam partium singularum terminis, ut aliam alia pars non supergradiatur, nec opprimat, regnum civile & patrium obtinente intus ratione: placatus sibi ipse atque concors, tranquillam & felicem deget uitam, diuinamque illam regendi artem adhibebit, quæ quidem omnium est potentissima & maxima : ut quod in eo præstat, eminetque, mens & ratio uidelicet, suum decorum ipsa in rebus omnibus agendis, præcipue atque semper, alienum autem procuret bonum. Quo uno modo potissimum, & inferiores partes sua sorte contentæ, tranquillè se habebunt : & propter decori illius in principe parte pulchritudinem, amore summo & studio ad parendum adducuntur. Verum ita institutus hic quidem homo est, ut secum solus ipse possit, aut cum familia sua commodissime uiuere : qui iam in publicum producendus est, & in communes consuetudines deducendus : non commentatus antea in tenebris, ut modò Phædrus dicebat, sed in lumine illo celestium ueritatum, & ad exemplar illarum conformatione suimet exercitatus, atque prudens : Qui cum dictante ratione, & gubernatione illa summi rectoris Dei sic monstrante, intellexerit, non se sibi soli natum esse, sed & patriæ præterea, & ciuibus suis, partemque sui non minimam cognato quoque, & civili generi esse debitam: cumque se ipse so-

D ciabile

ciabile in primis esse animal attenderit, uirtutem uideritque eam, quæ maximè naturam hominis contineat, sine exercitatione, atque opere imperfectam existere: neque efficere posse beatam uitam, si non promatur ad res gerendas, & adhibeatur: quod iam & homines, quibus cum uersetur, & instrumenta ad agendum, quibus utatur, requirit ac postulat: in quo nonnulla pars nimirum attribuenda est Fortunæ. Cum, inquā, ista omnia noster Philosophus cognouerit, sine tergiuersatione ulla ad obtemperandum rationi sese dedet: prudenterque, & accuratè omnia circumspectans ubique præeunte eius consilijs Philosophia, instrumentum primarium conuiuendi & communicandi, quo prima interni hominis effigies oculis spectantium obijcitur, atque proponitur, formabit aptè & compositè orationem: eamque tanquā alterā personam perinde excolet, ut si totum sese in illa sit expressurus. Curabit igitur ut commodè, ut distinctè, ut propriè possit loqui: uerbisque utetur lectis, ex cōmuni quidem sumptis loquēdi usu: sed tamen uiuidis magis, quàm sonantibus: copiam autē orationis hætenus adhibebit, ut aptè, & rotundè sensa animi sui, cum significatione mediocri interiorum motuum, explicet atque exponat: nam oratorios quidē illos animorum impetus, forensibus causarū patronis derelinquet: ipse uerò sedatè, & grauiter, leni gestu atque uultu, omnia persequetur: Atque ab hoc aditu talis & animi, & in agendo prudētiæ atque uirtutis, ad
conui

conuictus hominū, ad commercia, ad cōsuetudines intromissus : cūm quacuncq; se intulerit, quicquidq; gesserit, illud in semetipso exemplū summi & p̄pōtētis Dei secum deferat, ut custodiat semper decorū suum, & alienū procuret bonum : quāro à uobis, & abs te in primis, Phædre, num huiusmodi cūm sit, uideatur cœtibus hominū regēdis, & gerēdæ Reip. autor fore idoneus? cūm præsertim ipse quidē optime se rexerit: per Philosophiā autē inspexerit, quod in unoquoq; hominum diuersis ex naturis & partibus conflātū est, idem notari in ciuitate & distingui posse. Quam igitur uim prudētiæ edoctus à Philosophia, & in illis altissimis causis crudītus, in semetipso prius exercuerit, eandem trāsferet ad hominū, urbiumq; rectionē : ac plebem quidem infimā, quæ maximè necessarias in ciuitate obit partes, ut uersetur in agris colendis, oneribus uehēdis, materia cædenda, opere faciundo : infimæ illi in homine parti genitabiliq; collatam, pastu contentam, & cōiugio, procreationeq; liberorū: curabit, ut sit suis opportunitatibus instructa, omnemq; ab illa iniuriā remouebit, diligētia adhibita, ut ne illa unquam opere tamen uacet, sed tempestiuus aliquibus semper laboribus distringatur. Eademq; ratione, si quid illi fortē exuberare senserit, & superfluere, relicto semper quod satis sit, reliquum in publicas utilitates cōuertet : neq; secius tamen urgente aliqua calamitate, eadem egenti atq; oppressæ, de publico opitulabitur.

Genus autem alterum ordinis mediij, quod sensibili in nobis animæ comparatum est, ut magis honoratū, quàm primum, liberalius quidem habebit, & cultius: particepsq; consiliorū ac dignitatis, quoad licebit, efficiet. Sed tamen quoniam sensilibus id oblectationibus maxime est additū, inter quas dominantur hæ, quæ oculorum sunt, in externas illud & peregrinas mittet regiones: quò varias in illis species rerum intuendo, mercesq; cōmendo, patriam, urbemq; suam, rerum spectabiliū, & earundē utiliū, commoditatibus refarciat: luxuria tamen semper, præcipueq; amputata: ne fortè sublatū studijs inanibus insolensq; effectū, dum suis finibus egredi, & in alienos conatur inuadere, ueriores impediatur utilitates consensionis publicæ. Nobilitatē uerò, hoc est, ipsos optimates, qui non tam ex fortuna sint aut genere, q̃ ex uirtute pendendi, mentis in homine & rationis instar, uniuersæ ciuitati præficiet: quorū erit curatio, prouidere ac præcipere, ut omnia gerantur in Rep. rectè atq; ordine: partesq; in societate & cōcordia teneantur, nihilq; cuiq; desit, quod necessariū sit ac legitimū: quos ubi uacare ipsos operibus publicis cōtigerit, tū eos maius illud in se bonū atq; præstantius quod obtinent, in rebus item præstantioribus collocare disponereq; præcipiet: ut mentem, animūq; uidelicet, ad diuinarum rationum speculationem: opes uerò ingenij, autoritatis, fortunæ, cōferant, & conuertant ad liberalitatem ac beneficentiam:

tiam: omnibusq; modis nitantur & elaborēt, ut uirtutem uberrimè atq; amplissimè exercent: in cuius unius studio atque usu, fructus beatæ uitæ, nec solum princeps illa & propria optimatum ordinis dignitas, sed utilitas etiam honestiore multo ex genere, & uoluptas ea quæ purissima est omnium uoluptatum ac suauissima continetur. Atque hæcenus quidem illa in Deo præstans, & eminens diuini rectoris effigies, à Philosophiâ cognita, in homine impressa, in cunctam postremò ciuitatem inducta, & translata est. Sed, ut ad eum, quem Philosophia hoc modo instituit, docuitq; semetipso rectè uti, reuertamur: aliquandoq; peroremus: Cernitis profectò quicquid in natura est, quod sit pulcherrimum, ac magnificentissimum, id totum in hac una specie hominis uerè Philosophi, mentibus uestris expositum esse. Nam primùm diuinum illud & longè dominans, quod unitatis, & ueritatis, & sapientiæ summæ est compos, extat præclarè in hoc Philosopho, atque cernitur: unus enim & iste quoque cōcordia, & conspiratione suarum partium omnium, & in eisdem sibi semper constans, diuinarumq; rerum ueritatibus instructus, nunquam à sapientiæ consilijs deseritur, nunquam uarietate opinionum distrahitur: sed quacuncq; se infert, regulam illam rectè agendæ uitæ: id est, ueritatem, tanquam lumen de cælo libatum, præ se ferens: res quantumuis obscuras ac dispersas, & in lucem producit, ut uideri: & in uni-

tatem colligit, ut mente compræhendi possint. Quodq; in Principe & Rege totius naturæ Deo maximè præcellit, eximiumq; est, quod ille diuinis bonis omnibus confertus, ac redundans, neq; alienas opes fortunæ expectat, & suas ipse in aliorum largè effundit commodum: suaq; id solum interesse iudicat, uti quicquid agit, maximè ipsum deceat, cæteris idem iucundum utileq; sit: quod in hac pulchri & decori perfecta absolutaq; specie, omne imperium, omnis maiestas, omnis ueræ dignitatis atq; potentiæ inest ratio. Similiter id in nostro, qui cœlestium diues bonorum, mentemq; insignibus donis ueritatis illustratus, nulla effrænata cupiditate animi ad ea fortunæ bona appetenda proripitur, quæ præter subsidium necessitatemq; naturæ, extraordinarijs præterea cupiditatibus sunt proposita: magisq; id sibi studio & curæ habet, ut alijs sit ipse adiumento, & commodo, quàm ut aliorum opibus augeatur: solum autem suum & proprium bonum ipse id existimat, quod est aptum, conueniens, decorum, pulchrum. Ac quemadmodum propter decori eiusdem dignitatem atque præstantiam, facile est Deo in omnem naturam imperium: ut illi, sponte sua ac uolentes, cœlestes primum globi, siderumq;, & stellarum æterni ignes: deinde propiora quoque nobis elementa, stirpiumq; & animantium cuncta genera, sedulo, libenter, enixeq; obediant: quod amore pulchri illius incensa atque correpta, quod
in Deo

in Deo præstantissimè elucet, proximè se ad eum conantur adiungere, illiç quoad licitum est, cupiūt inhærere. Item hominis ratio pulchritudine simili prædita, nempe quoad imitatio assequi primigenum & summum exemplar potest: eiusdemç honesti ac decori Philosophiæ beneficio particeps, primum interioris animæ partes studiosè sibi habet obtemperantes: ut amoris imperio, quod fortissimum est, & uehementissimum, non uir, neque metu, infirmis imperij custodibus, facilimè omnia & regat, & tueatur: deinde in commercia & societates hominum translata, ubi Rempublicam & ciuilem statuerit ad se pertinere (non enim Philosophum nos patre operario, neque rursus ex stipite aut lapide natum esse uolumus: sed ex eiusmodi sanguine, in quem liberalium artium cogitatio, & studia humanitatis, uideantur aliquando cadere potuisse) quos nam progressus uobis uidetur habitura? Nonne qui ab hac præclara disciplina profectus fuerit, ut primum agere cœperit secus, quàm ab egregia illa Phædri sapientia est præceptum, ut non sequatur, nec imitetur populum, nec se inconsultis ferri opinionibus sinat: tantumç absit, ut præripiat alijs opum adipiscendarum palmam, quod ruentibus, tumultuantibusç cæteris, solus ipse stabili, & quieto animo permaneat: neque se ulla eiusmodi cupiditate permittat trahi: conuertet in se primò aspectus populi, deinde multorum sermones excitabit

tabit, mirantium & percontantium, qui nam sit, & unde, qui tam robusto, & alto sit animo, ut non eisdem rebus ipse, quibus uulgus, moueatur: quod si quos etiam eorum, qui ad rapiendum, & congerendum, mala cupidine incitati se proiecerant (ut sæpe fit) spes, aut fortuna grauior fefellerit: nonne hic, qui se continuit, ac repressit, plus multum uidisse, quam ceteri, sagaxque in primis & prouidus esse existimabitur. Et quoniam uita fert, rerumque & temporum exigunt inclinationes, ut periculum cuique sui, ex natura, & instituto suo faciendum sæpe sit: qui hanc constantiam recte, ordineque omnia agendi, quam Philosophiam nominamus, ad omnes res adhibuerit: nec cuique rei plus minusue, quam quantum par sit, æquumque, tribuerit: fidem & ueritatem sanctissimam habuerit in uita, nusquam ab eo, quod deceat, honestumque sit, discesserit: eorum qui ad ipsius curam, fidemque pertinebunt, commoda in primis, ornamentaque prouiderit: maximum ipse sibi ornamentum retinuerit dignitatem: postremo in tota uita, in suis dictis, consilijs, factisque omnibus, similis sui undique, & semper sibi congruens, æquabilisque constiterit: quod nemo plane, nisi idem sit, qui est Philosophia sit eruditus, atque instructus, probe potest & ad amussim facere: uerendum credo erit, ne non omnium in se amores, atque studia, omnium mentes animosque conuertat. Admonebuntur (mihi credite) homines specie illa honesti, quæ in graui uiro
& con

& considerato eximia est: commouebuntur, impellentur, primum, ut oculorum animorumq; contuitus in illum unū cuncti coniiciant: deinde, ut ament: postremo, cum tota illius uitæ iam ratio deliberatioq; patuerit, ac perspecta fuerit, ut se & sua omnia illius fidei, uigiliæ, prouidentiaq;, studiosissimè permittant: quī enim poterūt agere secus, cum uiderint illum nil meditari aliud in uita, neque præ se ferre, quàm ut Deum, præclara imitatione, in se ipso referens, suum decorū honestumq; perpetuo custodiat: alienum autem procuret bonum? Species hæc inquam præstabilis, planèq; diuina, semper hominum mentibus atq; animis dominata est: semper uoluntates omnium in potestate habuit. Quid deinde autem, quid eueniet? Tantum'ne tu putas, Phædre, sapientē tuum per astutias & simulationes, uasramq; illam gerendarū rerum calliditatem, honoris & fortunarum adipisci posse, quanta hunc fortunæ & honorum præmia, non dico consequentur, sed planè obruent? Etenim quæ usquam natio est tam immanis, & barbara: quis tam crudelis, impiusq; tyrānus, qui non specie tali istius uiri cōmoueatur? ut etiam si eum diligere fortasse non possit, scelere ipse & feritate præditus: hac tamē percussus tam eximiæ forma dignitatis, incidat in admirationem? Nam qui sensu humaniore præditi homines sunt, summi, infimi, ciues, externi, nequaquā ulli profectò se & sua fidentius commendabunt, quàm isti ipsi: nec quē-

E quam

quam cupidius ad suas fortunas regēdas accersent, quā hunc, quem uiderint in aliorum bonis cōmodisq̃ procurandis, suum ipsum omne bonū & commodum constituentem, itaq̃ omnia suscipientem ac gerentem, ut suorum laborū & operum, ad ceteros utilitas, ad ipsum autem fructus uirtutis atq̃ officij, qui maximus in uera uita & uberrimus est, perueniat: coletur igitur, honorabitur, amabitur, ipsiusq̃ consilio & autoritate gerentur plurima: neq̃ ipse tamen alienis negotijs se offeret, neq̃ expetet admodum publicis procurationibus se distringi: sed quicquid eiusmodi aget, atq̃ suscipiet, totum officio dabit atq̃ humanitati: ipse uerò in illa beatissima curarum cœlestium & diuinarum permanebit, quoad poterit, contemplandarum: uitamq̃ eam in primis amplectetur, quæ maximè è natura est, maximeq̃ hominis propria. Siquidem non corpus, neq̃ animus reliquus, sed mens sola est id illud ipsum, quod est homo. Quapropter ueras idem etiā ac proprias hominis cōsequetur uoluptates: non illas animæ infimæ, quæ & brutæ maximè, & eadē falsæ inanesq̃ ferè sunt: neq̃ rursus eas, quæ in sensibus cōsistunt, uagas & errantes, & uarietate ipsa semper instabiles: sed cum has utraq̃ modo rationeq̃ finitas, tum illas plenè & cumulatè, quæ arctè, & compressè, & peculiariter attingunt hominem, inq̃ eum ipsum penitus se infundunt, & illiquefaciunt, suntq̃ menti & ijs, quæ ex mentis officio geruntur, agnatæ maximè & fam

& familiares : quarum ut uerissima, atq; purissima, sic iucundissima & suauissima est perceptio. Quocirca homo præceptis Philosophiæ edoctus, ac semetipso in omnem partem recte utens, similem sese (quoad fas est) efficiet Deo : tum in uitæ ratione, dū quo ille modo omnia agit, eodem iste modo cuncta & aget, & exequetur, ut deceat sibi, semper, pro sit alijs : tum in perpetua animi lætitiâ, ac uoluptate. Qui si præter has cōmuneis Philosophiæ rationes, quæ similitudinem & imitationem præpotētis Dei insinuant nobis atq; proponūt, illa quoq; præterea maxima atque amplissima eiusdem Dei beneficia in genus humanum cognouerit : quæ uni tantum generi, nominiq; nostro, qui CHRISTVM filium unigenum Dei colimus, & profitemur, propriè ac singulariter data sunt : quod in hac una religione & salus hominibus est, & uera beatæ uitæ in terris ratio, in cœlo immortalitatis adeptio : nedum per Philosophiâ, à pura & integra religione non dehæxerit, quemadmodū tu, Phædre, dudum calūniabare : sed magis in ea etiam statuatur, & cōfirmabitur : ad eos enim amores, qui cōmunibus beneficijs Dei summi debentur, accedent alijs magis peculiare, & proprijs, per quos fortissimè cum Deo erit colligatus. Non enim de leuibus sophistis in præsentia, neq; (ut opinor) de futilibus hominibus quibusdā : sed de cōsideratis, & integris, & cōstātib; est sermo : qui omnia metiuntur cōsilio & probitate, neq; à maiorū suorū,

E 2 de quo

de quorum integritate, & sapiētia optimè sentiant, decretis atque scitis ullo pacto recedunt: sed quò ingenio hominis, atque doctrina perueniri nō potest, de eo patiūtur Dei immortalis numine, & ueterum autoritate sanctissimorum hominū, facili sibi persuaderi. HIC paulūm cum requiessem, Exposui uobis, inquam, quemadmodum quidem potui, & uim utilitatemq̃ Philosophiæ, & eius uiri qui ritè, ac legitimè Philosophetur, speciem atque formam: Quæ mea expositio sic uniuersè facta, satis nē respondere Phædri calumniæ uideatur, uestrum iam est iudicium. Mihi quidem & magnitudo rei, & breuitas tēporis, & mehercule, rem, si quo modo ea est, fateri uolumus, mei etiam ingenij ad tantum tollendum pondus exilitas, uehementer obstitit, quominus uobis omnia, quemadmodum quidem cupissem, potuerim exprimere; in quo non recuso, quin meæ tarditati culpam, non Philosophiæ ipsi assisnetis. HIC GALLVS, Sane quàm probasti tu mihi, Sadolete, defensionem tuam, inquit: nec uideo, Philosophia quid possit esse diuinius. Itaque ego, qui in eam antea propensione animi ferebar: nunc planè illius amore totus ita ardeo, ut non sim eam unquā è complexu meo dimissurus: illud aueo, quàm maximè & quàm primūm, ut ista quæ sunt à te disputata, in Commentarium referantur, quoc̃yus queam exēplū Vrbinū mittere ad meos amicos, taleis uiros, qualeis tu quoc̃y in primis existimas


mas

mas. SUMMOS & singulareis dicis, inquam, quorum conuentu apud lectissimam omnium foeminarum Helisabetam reginam Vmbriae, illa ciuitas atque adeo Italia omnis ornata est. VERO, nec iniuria, inquit: non enim usquam alibi terrarum, neque nostra, opinor, neque antiquorum memoria, tot & taleis principes ingenij ac literarum, facile uno in loco quisquam possit nominare, quot nunc Urbini praclarum coetum constituunt: quippe cum illic adsit, & Petrus Bembus, maxima celebritate & nomine uir: quem praeter eximiam omnis uirtutis & humanitatis laudem, uere parentem, cum Romanae ueteris, tum recentis huius Italiae eloquentiae possumus appellare: & duo fratres Italiae uel praecipua lumina, Federicus & Octauianus Fregusi, nobilitate, dignitate, prudentia, literis maxime illustres: itaque spectatum ac nobile par Baldasarus Castillioncus, & Caesar Gonzaga: qui militaribus ambo & bellicis uirtutibus insignes, ad illam fortitudinis laudem, optimarum quoque & literarum, & artium, non inferius decus, addidere. Quamquam ne singulos colligam, illam ego urbem hoc tempore, non hominum cuiusque modi domicilium, sed Musarum diuersorum esse puto. AT EGO, inquit Citrarius, habeo statim queis cum communis, familiareis hos nostros, quorum quotidianis coetibus domus tua, Galle, celebrabatur, Camillum Porcium, & Blossum Palladium: quorum ingenijs, spectabili quoque morum & sermonis elegancia, soliti sumus oes

E 3 apprimè

apprimè delectari: Etsi, quanquã uterq; utranq;, ta-
men alter eorũ oratoriam magis laudẽ, alter poëti-
cam est profecutus: Tum autẽ Camillum Paleotũ,
& Philippum Beroaldum, hunc iuniore dico: Nam
ille senior haud sanè usquequaq; doctorum iudicio
idoneus est qui probetur: hi autem duo suis ingenij
& uirtutum ornamentis, nō municipio Bononiensi
modò, unde oriundi sunt, sed huic urbi tantæ, non
exiguum decus potuerũt asserre. Nam Euangelistã
Mathalenũ, tuũ familiarissimũ, Sadolete, quemq;
nos omnes plurimũ ipsius merito, & quanquã do-
ctus admodum uir est, humanitatis tamen ac libera-
litis causa præcipuè diligimus: quo ego gaudio
sublatum iri puto, cũ te operã hanc nauasse Phi-
losophiã, laudemq; ex eo cõsecutum esse intelliget.
VTINAM quidem, inquam, talibus ingenijs,
mea hæc opera & uolũtas iure probata sit. Sed quid
ait nobis Phædrus? EGO'NE? inquit: te alieno
quodã in hominũ genere tuũ istũ sapientẽ, tanquã
in somnijs constituisse. Nam his quidẽ hominibus,
quibus cum uiuimus, mea sapiẽtia ad manũ semper
futura est paratior. Quæ cũ essent dicta, surrexi-
mus omnes, aliquotq; deambulationibus ultro &
citro factis, reliquum cõuiuiũ, uarijsq; sermonibus,
Phædro in primis multa facetè, urbaniterq; dicẽte,
hilarem & lætum consumpsimus diem.

F I N I S.

















Santo G.
Restaura
del Libro

